

Relation de ce qui s'est passé
en la Nouvelle-France en
l'année 1634 : envoyée au R.
Père [Barth. Jacquinot],
provincial [...]

Le Jeune, Paul (1592-1664). Auteur du texte. Relation de ce qui s'est passé en la Nouvelle-France en l'année 1634 : envoyée au R. Père [Barth. Jacquinot], provincial de la Compagnie de Jésus en la province de France / par le P. Paul Le Jeune de la même Compagnie, supérieur de la résidence de Kébec. 1635.

1/ Les contenus accessibles sur le site Gallica sont pour la plupart des reproductions numériques d'oeuvres tombées dans le domaine public provenant des collections de la BnF. Leur réutilisation s'inscrit dans le cadre de la loi n°78-753 du 17 juillet 1978 :

- La réutilisation non commerciale de ces contenus ou dans le cadre d'une publication académique ou scientifique est libre et gratuite dans le respect de la législation en vigueur et notamment du maintien de la mention de source des contenus telle que précisée ci-après : « Source gallica.bnf.fr / Bibliothèque nationale de France » ou « Source gallica.bnf.fr / BnF ».

- La réutilisation commerciale de ces contenus est payante et fait l'objet d'une licence. Est entendue par réutilisation commerciale la revente de contenus sous forme de produits élaborés ou de fourniture de service ou toute autre réutilisation des contenus générant directement des revenus : publication vendue (à l'exception des ouvrages académiques ou scientifiques), une exposition, une production audiovisuelle, un service ou un produit payant, un support à vocation promotionnelle etc.

[CLIQUER ICI POUR ACCÉDER AUX TARIFS ET À LA LICENCE](#)

2/ Les contenus de Gallica sont la propriété de la BnF au sens de l'article L.2112-1 du code général de la propriété des personnes publiques.

3/ Quelques contenus sont soumis à un régime de réutilisation particulier. Il s'agit :

- des reproductions de documents protégés par un droit d'auteur appartenant à un tiers. Ces documents ne peuvent être réutilisés, sauf dans le cadre de la copie privée, sans l'autorisation préalable du titulaire des droits.


- des reproductions de documents conservés dans les bibliothèques ou autres institutions partenaires. Ceux-ci sont signalés par la mention Source gallica.BnF.fr / Bibliothèque municipale de ... (ou autre partenaire). L'utilisateur est invité à s'informer auprès de ces bibliothèques de leurs conditions de réutilisation.

4/ Gallica constitue une base de données, dont la BnF est le producteur, protégée au sens des articles L341-1 et suivants du code de la propriété intellectuelle.

5/ Les présentes conditions d'utilisation des contenus de Gallica sont régies par la loi française. En cas de réutilisation prévue dans un autre pays, il appartient à chaque utilisateur de vérifier la conformité de son projet avec le droit de ce pays.

6/ L'utilisateur s'engage à respecter les présentes conditions d'utilisation ainsi que la législation en vigueur, notamment en matière de propriété intellectuelle. En cas de non respect de ces dispositions, il est notamment passible d'une amende prévue par la loi du 17 juillet 1978.

7/ Pour obtenir un document de Gallica en haute définition, contacter utilisation.commerciale@bnf.fr.




~~4040~~

5464

of

Simple Index



¹²
L.K. 732 (Réserve)
(2)

~~1771~~

(Variante de MacCoy, n° 12)
cf. p. 177

RELATION

DE CE QVI S'EST PASSE'

EN LA

NOVVELLE FRANCE,

EN L'ANNE'E 1634.

Enuoyée au

R. PERE PROVINCIAL

de la Compagnie de IESVS

en la Prouince de France.

Par le P. Paul le Jeune de la mesme Compagnie,

Superieur de la residence de Kebec.

Oratorij Parisiensis coed. imp.

B 70



A PARIS,

Chez SEBASTIEN CRAMOISY, Imprimeur
ordinaire du Roy, rue S. Jacques, aux Cicognes.

M DC. XXXV.

AVEC PRIVILEGE DV ROY.



Extrait du Priuilege du Roy.

PA R Grace & Priuilege du Roy, il est permis à Sebastien Cramoisy, Imprimeur ordinaire du Roy, marchand Libraire Iuré en l'Vniuersité de Paris, d'imprimer ou faire imprimer vn liure intitulé, *Relation de ce qui s'est passé en la Nouvelle France en l'année mil six cens trente - quatre, Enuoyée au Reuerend Pere Barthelemy Iaquinot, Prouincial de la Compagnie de IESVS en la Prouince de France, Par le P. Paul le Jeune de la mesme Compagnie, Superieur de la Residence de Kebec: & cependant le temps & espace de neuf années consecutives. Avec defenses à tous Libraires & Imprimeurs d'imprimer ou faire imprimer ledit liure, sous pretexte de desguisement, ou changement qu'ils y pourroient faire, à peine de confiscation, & de l'amende portée par ledit Priuilege. Donné à Paris le 8. Decembre mil six cens trente-quatre.*

Par le Roy en son Conseil,

V I C T O N.

1847

NOTIV



RELATION

DE CE QVI S'EST

PASSE' EN LA NOVVELLE

FRANCE SVR LE GRAND

Fleuve de S. Laurens en l'année

mil six cens trente-quatre.



ON R. PERE,

Les Lettres de vostre Reuerence, les témoignages de son affection pour la cōuer-
sion de ces peuples, les effets de son amour
en nostre endroit, la venuë de nos Peres
qu'il luy a pleu nous enuoyer pour renfort
cette année, les desirs qu'ont vn si grand
nombre des nostres de venir en ces con-
trées sacrifier leurs vies & leurs traux
pour la gloire de Nostre Seigneur: Tout
cela ioinct avec le bon succez qu'eurent

A

2 *Relation de la nouvelle France,*
les vaisseaux l'an passé à leur retour, &
l'heureuse arriuée de ceux qui sont venus
cette année, avec le zele que tesmoignent
Messieurs les associez de la Compagnie de
la nouvelle France pour la conuersion de
ces peuples barbarres. Tous ces biens
ioincts ensemble venās fondre tout à coup
dans nos grands bois par l'arriuée de Mon-
sieur du Plessis General de la flotte qui
nous met dās la iouissance des vns, & nous
apporte les bonnes nouvelles des autres,
nous comblent d'une consolation si gran-
de, qu'il me seroit bien difficile de la pou-
voir bien expliquer: Dieu en soit beny à
iamais, si sa bonté continuë de se respan-
dre sur ces Messieurs, comme nous l'en
prions de toute l'estenduë de nostre cœur,
tant d'ames plongées dans vne nuit d'er-
reur qui dure depuis vn si long-temps, ver-
ront en fin le iour des veritez Chrestien-
nes: Et nostre bon Roy, Monseigneur le
Cardinal, Messieurs les Associez, Mon-
sieur le Marquis de Gamache grand appuy
de nostre Mission & quantité d'autres, par
la faueur desquels le Sang du Fils de Dieu
leur sera vn iour appliqué, auront la gloire
& le merite d'auoir contribué à vne si sain-
cte œuvre.

en l'année 1634.

3

Je distingueray la Relation de ceste année par chapitres, à la fin desquels ie mettray vn journal des choses qui n'ont autre liaison que la suite du temps auquel elles sont arriuées. Tout ce que ie diray touchant les Sauvages, ou ie l'ay veu de mes yeux, ou ie l'ay tiré de la bouche de ceux du pays, nommément d'un vieillard fort versé dans leur doctrine, & de quantité d'autres avec lesquels i'ay passé six mois peu de iours moins, les suiuant dans les bois pour apprendre leur langue. Il est bien vray que ces peuples n'ont pas tous vne mesme pensée touchant leur creance, ce qui fera paroistre vn iour de la contrariété entre ceux qui traicteront de leurs façons de faire.

Des bons deportemens des François.

CHAPITRE I.

NOus auons passé cette année dans vne grande paix & dans vne tres-bonne intelligence avec nos François. La sage conduite & la prudence de Monsieur de Champlain Gouverneur de Ke-

4 *Relation de la nouvelle France,*
bec & du fleuve saint Laurens qui nous honore de sa bien-veillance, retenant vn chacun dans son deuoir, a fait que nos paroles & nos predicatiōs ayent esté bien receuës, & la Chappelle qu'il a fait dresser proche du fort à l'honneur de nostre Dame, a donné vne belle commodité aux François de frequenter les Sacremens de l'Eglise, ce qu'ils ont fait aux bonnes Festes de l'année, & plusieurs tous les mois avec vne grande satisfaction de ceux qui les ont assiste. Le fort a paru vne Academie bien réglée, Monsieur de Champlain faisant faire lecture à sa table le matin de quelque bon historien, & le soir de la vie des Saints; le soir se fait l'examen de conscience en sa chambre & les prieres en suite qui se recitent à genoux. Il fait sonner la salutation Angelique au commencement, au milieu & à la fin du iour suivant la coustume del'Eglise. En vn mot nous auons subiect de nous consoler voyans vn chef si zelé pour la gloire de Nostre Seigneur & pour le bien de ces Messieurs.

Croiroit-on bien qu'il s'est trouué vn de nos François en Canada qui pour contre-carrer les dissolutions qui se font ailleurs

en l'année 1634.

5

au Carnauval, est venu le Mardy gras dernier, pieds & testé nuë sur la neige & sur la glace depuis Kebec iusques en nostre Chappelle, c'est à dire vne bonne demie lieüe, ieusnant le mesme iour pour accomplir vn vœu qu'il auoit fait à Nostre Seigneur, & tout cela sans autres tesmoings que Dieu & nos Peres qui le rencontrent.

Pendant le saint temps de Carefme, non seulement l'abstinence des viandes defenduës & le ieusne s'est gardé, mais aussi tel s'est trouué qui a fait plus de trente fois la discipline, deuotion bien extraordinaire aux soldats & aux artisans tels que sont icy la plus part de nos François.

Vn autre a promis d'employer en oeuvres pies la dixiesme partie de tous les profits qu'il pourra faire pendant tout le cours de sa vie. Ces petits eschantillons font voir que l'Hyuer n'est pas si rude en la nouuelle France qu'on n'y puisse recueillir des fleurs du Paradis.

Je mettray en ce lieu, ne scachant où le mieux placer ailleurs, ce qu'un de nos François tres-digne de foy & recogneu pour tel, nous a raconté de Iacques Michel Huguenot qui amena les Anglois en

6 *Relation de la nouvelle France;*
ce pais cy: Ce miserable la veille de sa
mort ayant vommy cōtre Dieu & contre no-
stre saint Pere Ignace mille blasphemes,
& s'estant donné cette imprecation qu'il
vouloit estre pendu s'il ne donnoit vne
coupple de soufflets avant la nuit du iour
suiuant à vn de nos Peres qui estoit pris
de l'Anglois, vomissant contre luy des in-
iures fort messeantes, il fut surpris bien
tost apres d'une maladie qui luy osta toute
cognoissance & le fit mourir le lendemain
comme vne beste: Quatre circonstances de
ce rencontre donnerent de l'estonnement
aux Huguenots mesmes, la maladie qui le
prit quelques heures apres ses blasphemes,
l'erreur des Chirurgiens qui estoient en
nombre, lesquels donnerent des remedes
soporiferes à vn letargique, son trespas si
soudain & sans cognoissance, expirant sans
qu'aucun s'en apperceust quoy qu'il y eust
six hommes aupres de luy, la fureur des
Sauuages enuers son corps qui le deterre-
rent & le pendirent selon son impreca-
tion, puis le ietterent aux chiens: Les An-
glois qui estoient dans le fort de Kebec
ayant sceu cette histoire tragique, dirent
tous estonnez, que si les Iesuites scauoient
tout cela qu'ils en feroient des miracles.

Or nous le sçauons maintenant & cependant nous n'en ferons ny prodiges ny miracles : mais nous dirons seulement qu'il ne fait pas bon blasphemer contre Dieu ny contre ses saints, ny se bander contre son Roy trahissant sa patrie : Mais venons maintenant à nos Sauvages.

*De la conuersion, du Baptisme & de
l'heureuse mort de quelques
Sauuages.*

CHAPITRE II.

Quelques Sauvages se sont faicts Chrestiens cette année, trois ont esté baptisez cest Hyuer en mon absence, en voicy les particularitez toutes pleines de consolation que nos Peres m'ont raconté à mon retour.

Le premier estoit vn ieune homme nommé Sasousmat aagé de 25. à 30. ans, les François le surnommoient Marfolet : Le ieune homme entédant vn iour vn Truchement parler des peines d'Enfer & des recompenses du Paradis, luy dit, mene

8 *Relation de la Nouvelle France,*

moy en France pour estre instruit, autrement tu respondras de mon ame, donc estant tombé malade il fut plus aisé de l'induire à se faire Chrestien, le Pere Brebœuf m'a donné de luy ce memoire.

„ Ayant appris la maladie de ce ieune hōme
„ ie le fus visiter, & le trouuay si bas qu'il a-
„ uoit perdu le iugemēt, nous voila dōc dans
„ vn regret de ne le pouuoir secourir, ce qui
„ fit prēdre resolution à nos Peres & à moy
„ de presenter à Dieu le lendemain le Sa-
„ crifice de la Messe à l'honneur du glo-
„ rieux S. Ioseph Patron de cette nouvelle
„ France, pour le salut & conuersion de ce
„ pauvre Sauvage: à peine auīōs nous quit-
„ té l'Autel qu'on nous vint aduertir qu'il
„ estoit rentré en son bon sens, nous le fuf-
„ mes voir, & l'ayans sondé nous le trouuaf-
„ mes remply d'un grand desir de receuoir
„ le S. Baptesme, nous differasmes neant-
„ moins quelques iours pour luy donner
„ vne plus grande instruction. En fin il m'en-
„ uoya prier par nostre Sauvage nommé
„ Manitougatche, & surnommé de nos Frā-
„ çois la Nasse, que ie l'allasse baptizer, di-
„ sant que la nuit precedente il m'auoit
„ veu en dormant venir en sa Cabane pour
„ luy conferer ce Sacremēt, & qu'aussi tost

en l'année 1634.

9

que ie m'estois assis aupres de luy que
rout son mal s'en estoit allé, ce qu'il me
confirma quand ie le fus voir: ie luy refu-
say neantmoins ce qu'il demandoit pour
animer davantage son desir, si bien qu'un
autre Sauvage qui estoit present ne pou-
uant souffrir ce retardement, me deman-
da pourquoy ie ne le baptizois point puis
qu'il ne falloit que ietter vn peu d'eau sur
luy & que s'en estoit fait, mais luy ayant
reparty que ie me perdrois moy mesme si
ie baptizois vn infidelle & vn mécreant
mal instruit: le malade se tournant vers
vn François, luy dit, Matchounon n'a
point d'esprit, c'est ainsi que s'appelloit
cet autre Sauvage, il ne croit pas ce que
dit le Pere, pour moy ie le crois entiere-
ment. Sur ces entrefaites les Sauvages
voulans decabaner & tirer plus auant dans
les bois, Manitougatche qui commēçoit à
se trouuer mal, nous vint prier de le rece-
voir & le pauvre malade aussi en nostre
maison, nous prîmes resolution d'auoir
soin des corps, pour aider les ames que
nous voyons bien disposées pour le Ciel.
On met dōc sur vne traine de bois ce bon
ieune homme, & on nous l'amene sur la
neige, nous le receuons avec amour &

10 *Relation de la Nouvelle France,*

„ l'accommodons le mieux qu'il nous est
„ possible, luy tout remply d'aise & de con-
„ tentement de se voir avec nous, resmoi-
„ gna vn grand desir d'estre baptizé, & de
„ mourir Chrestien. Le lēdemain qui estoit
„ le 26. de Ianuier estant tombé dans vne
„ grāde syncope nous le baptizasmes, croyās
„ qu'il s'en alloit mourir, luy donnans le
„ nom de François en l'honneur de S. Fran-
„ çois Xauier, il reuint à soy, & ayant appris
„ ce qui s'estoit passé, il se monstra plein de
„ ioye d'estre fait Enfant de Dieu, s'entre-
„ tenant tousiours iusques à la mort, qui fut
„ deux iours apres, en diuers actes que ie
„ luy faisois exercer tantost de Foy & d'Es-
„ perance, tantost d'Amour de Dieu & de
„ regret de l'auoir offencé, il prenoit en ce-
„ la vn plaisir fort sensible, & recitoit tout
„ seul avec de grands sentimens ce qu'on
„ luy auoit enseigné, demandant vn iour
„ pardon à Dieu de ses pechez, il s'accusoit
„ tout haut soy-mesme comme s'il se fust
„ confessé, puis la memoire luy manquant,
„ Enseigne moy (me disoit-il) ie suis vn
„ pauvre ignorant, ie n'ay point d'esprit,
„ suggere moy ce que ie dois dire; vne autre
„ fois il me pria de luy ietter de l'eau beniste
„ pour l'aider à auoir douleur de ses pechez,

cela m'estonna, car nous ne luy auions “
pas encores parlé de l'usage de cette eau, “
nous ayant inuité à chanter auprès de luy “
quelques prieres de l'Eglise, nous le voyōs “
pendant ce sainct exercice les yeux esle- “
uez au Ciel avec vne posture si deuote “
que nous estions tous attendris, admirans “
les grâdes misericordes que Dieu operoit “
dedans cette ame, qui en fin quitta son “
corps fort doucement le 28. de Ianuier “
pour aller iouir de Dieu.

Quand la nouuelle de sa conuersion &
de sa mort fut sceuë de nos François à Ke-
bec, il y en eut qui ietterent des larmes de
ioye & de contentemens, benissans Dieu
de ce qu'il acceptoit les premices d'une
terre qui n'a presque porté que des espi-
nes depuis la naissance des siecles.

Il arriua vne chose biē remarquable peu
d'heures apres sa mort, vne grāde lumiere
parut aux fenestres de nostre maison, s'é-
levant & s'abbaisant par trois fois, l'un de
nos Peres vid cēt esclat, & plusieurs de nos
hommes qui sortirent incontinent, les vns
pour voir si le feu n'estoit point pris en
quelque endroit de la maison, les autres
pour voir s'il esclairoit, n'ayans trouué au-
cun vestige de cette flamme ils creurent

que Dieu declaroit par ce prodige la lumiere dont ioüissoit cette ame qui nous venoit de quitter. Les Sauvages de la Cabane du defunct virent dans les bois où ils s'estoient retirez cette lumiere, ce qui les espouuenta d'autant plus qu'ils creurent que ce feu estoit vn presage d'une future mortalité en leur famille.

L'estois pour lors (moy qui escriis cecy) à quelques quarante lieuës de Kebec dās la cabane des freres du defunct, cette lumiere s'y fit voir à mesme temps & à mesme heure, comme nous l'auons remarqué; depuis le Pere Brebœuf & moy confrontans nos memoires, & mon hoste frere du trespassé l'ayant apperceuë sortit dehors tout espouuanté, & la voyant redoubler s'escria d'une voix si estonnante, que tous les Sauvages & moy avec eux sortismes de nos cabanes: ayant trouué mon hoste tout esperdu ie luy voulus dire que ce feu n'estoit qu'un esclair, & qu'il ne falloit pas s'espouuanter, il me repartit fort à propos que l'esclair paroissoit & disparoissoit en vn moment, mais que cette flāme s'estoit pourmenée deuant ses yeux quelque espace de téps: de plus, as-tu ia mais veu, me dit-il, esclairer ou tonner dans vn froid si

cuisant comme est celuy que nous ressentons maintenāt? Il est vray qu'il faisoit fort froid, ie luy demanday ce qu'il croyoit dōc de ces feux, c'est, me fit-il, vn mauuais augure, c'est, vn signe de mort, il m'adiousta que le Manitou ou le diable se repaissoit de ces flammes.

Pour retourner à nostre bien-heureux defunct, nos Peres l'enterrerent le plus solemnellement qu'il leur fut possible, nos François s'y trouuans avec beaucoup de deuotiō. Manitougatche nostre Sauuage ayant veu tout cecy en outre, considerant que nous ne voulions rien prendre des hardes ou des robbes du trespasſé, lesquelles il nous offroit, il resta si edifié & si estonné qu'il s'en alloit par les cabanes des Sauvages, qui vindrent bien-tost apres à Kebec, raconter tout ce qu'il auoit veu, disant que nous auions donné toute la meilleure nourriture que nous eussions à ce pauvre ieune homme que nous en auions euevn soin cōme s'il eust esté nostre frere, que nous nous estions incommodez pour le loger, que nous n'auions rien voulu prendre de ce qui luy appartenoit, que nous l'auions enterré avec beaucoup d'hōneur. Cela en toucha si biē quelques-vns,

14 *Relation de la nouvelle France,*
notamment de sa famille, qu'ils nous amenèrent sa fille morte en travail d'enfant pour l'enterrer à nostre façon, mais le P. Brebœuf les rencontrant leur dit, que n'ayât pas esté baptizée nous ne la pouuions mettre dans le Cimetiere des enfans de Dieu. De plus scachant qu'ils font ordinairement mourir l'enfant quand la mere le laisse si ieune, croyans qu'il ne fera que languir apres son deceds, le Pere pria Manitouchatche d'obuier à cette cruauté, ce qu'il fit volontiers, quoy que quelques-uns de nos François estoient desia resolu de s'en charger au cas qu'on luy voulust oster la vie.

Le second Sauvage baptizé a esté nostre Manitouchatche autrement la Nasse, i'en ay parlé dans mes Relations precedentes, il s'estoit comme habitué aupres de nous auant la prise du pais par les Anglois, commençant à defricher & à cultiver la terre, le mauuais traictement qu'il receut de ces nouueaux hostes l'ayât esloigné de Kebec, il tesmoignoit par fois à Madame Hebert qui resta icy avec toute sa famille qu'il souhaittoit grandement nostre retour. Et de fait si tost qu'il sceut nostre venuë il nous vint voir, & se caba-

na tout aupres de nostre maison, disant qu'il se vouloit faire Chrestien, nous asseurant qu'il ne nous quitteroit point si nous ne le chassions, aussi ne s'est-il pas beaucoup absenté depuis que nous sommes icy, cette communication luy a fait concevoir quelque chose de nos mysteres. Le seiour qu'a fait en nostre maison Pierre Antoine le Sauvage son parent luy a seruy, dautant que nous luy auõs déclaré par sa bouche les principaux articles de nostre creance. O que les iugemens de Dieu sont pleins d'abismes ! Ce miserable ieune homme qui a esté si bien instruit en France s'estant perdu parmy les Anglois, comme i'escriuis l'an passé, est deuenu apostat, renegat, excommunié, athée, valet d'un Sorcier qui est son frere: Ce sont les qualitez que ie luy donneray cy apres parlant de luy: & ce pauvre vieillard qui a tiré de sa bouche infectée les veritez du Ciel, a trouué le Ciel, laissant l'Enfer pour partage à ce renegat, si Dieu ne luy fait de grandes misericordes: Mais suiuanz nostre route, apres la mort de François Sasousmat dont nous venons de parler, ce bon homme ennuyé de n'auoir avec qui s'entretenir: car pas vn de nous ne sçait

16 *Relation de la nouvelle France,*
encores parfaictement la langue, se retira
avec sa femme & avec ses enfans, mais la
maladie dont il estoit desia attaqué, s'aug-
mentant, il presse sa femme & ses enfans
de le ramener avec nous, esperant la mes-
me charité qu'il auoit veu exercer enuers
son compatriote, on le receut à bras ou-
uerts, ce qu'ayant apperceu, il s'escria, ie
mourray maintenant content puis que ie
suis avec vous. Or comme ses erreurs a-
uoient vieilly avec luy, nos Peres reco-
gneurent qu'il pensoit autant & plus à la
santé de son corps qu'au salut de son ame,
tesmoignant vn grand desir de viure, re-
mettant son Baptisme iusques à mon re-
tour, neantmoins comme il s'alloit affoi-
blissant ils souhaitterent de le voir vn pe-
tit plus affectiōné à nostre creance, ce qui
les incita d'offrir à Dieu vne neufuaine
à l'hōneur du glorieux Espoux de la sain-
cte Vierge pour le bien de son ame, le cō-
mencement de cette deuotion fut le com-
mencement de ses volonteiz plus ardan-
tes, il se monstra fort desireux d'estre in-
struit commençant à mespriser ses super-
stitions, il ne voulut plus dormir qu'il
n'eust au prealable prié Dieu, ce qu'il fai-
soit encores deuant & apres sa refection,
si bien

si bien qu'il diffiera vne fois plus de demie-heure à mâger ce qu'õ luy auoit présenté, pource qu'on ne luy auoit pas fait faire la benediction, demandant au Pere Brebœuf qu'il luy fist dire douze ou treize fois de suite pour la grauer en sa memoire. C'estoit vn contentement plein d'edification, de voir vn vieillard de plus de soixante ans, apprendre d'un petit François que nous auons icy, à faire le signe de la Croix, & autres prieres qu'il luy demandoit. Le Pere Brebœuf voyant que ses forces se diminueoient, & que d'ailleurs il estoit assez instruit, luy dit que sa mort approchoit, & que s'il vouloit mourir Chrestien, & aller au Ciel, qu'il falloit estre baptisé. A ces paroles il se monstra si ioyeux qu'il se traïsna luy mesme comme il peut en nostre Chapelle, ne pouuant attendre que les Peres qui preparoient ce qu'il falloit pour conferer ce Sacrement le vinssent querir: vn de nos François, son Parrain, luy donna le nom de Ioseph. Deuant & pendant son baptisme, qui fut le troisieme d'Auril, le Pere l'interrogeant sommairement sur tous les

articles du Symbole, & sur les commandemens de Dieu, il respondit nettement & courageusement qu'il croyoit les vns, & s'efforceroit de garder les autres si Dieu luy rendoit la santé, montrant de grands regrets de l'auoir offensé: sa femme & l'une de ses filles estoient presentes, celle là ne pouuoit tenir les larmes & l'autre se monstroir, toute estonnée, admirant la beauté des saintes ceremonies de l'Eglise.

Ie retournay de mon hyueruement d'avec les Sauvages, six iours apres son baptisme, ie le trouuay bien malade, mais bien content d'estre Chrestien. Ie l'embrassay comme mon frere, bien resioüy de le voir enfant de Dieu, nous continuasmes de l'instruire, & de luy faire exercer des actes des vertus, notamment Theologiques, pendant l'espace de douze iours, qu'il suruecut apres son baptisme.

Les Sauvages desirans le penser à leur mode avec leurs chants, avec leurs tintamarres, & avec leurs autres superstitions, tascherent plusieurs fois de nous l'enleuer iusques là, qu'ils amenèrent vne traine pour le reporter, & l'un de

leurs forciers ou iongleurs le vint voir
 exprés pour le débaucher de nostre
 creance : mais le bon Neophyte tint
 ferme, respondant qu'on ne luy parlaſt
 plus de s'en aller, & qu'il ne nous quit-
 teroit point, que nous ne l'enuoyaffiōs.
 Ce n'est pas vne petite marque de l'ef-
 ficacité de la grace du ſainct Baptesme,
 de voir vn homme nourry depuis ſoi-
 xante ans & plus, dedans la Barbarie,
 habitué aux façons de faire des Sauua-
 ges, imbu de leurs erreurs & de leurs
 refueries, reſiſter à ſa propre femme, à
 ſes enfans, & à ſes gendres, & à ſes amis
 & à ſes compatriotes, à ſes *Manitouſio-*
uets, forciers ou iongleurs, non vne
 fois, mais pluſieurs pour ſe jeter en-
 tre les bras de quelques eſtrangers,
 proteſtant qu'il veut embraffer leur
 creance, mourir en leur Foy & dedans
 leur maiſon. Cela fait voir que la gra-
 ce peut donner du poids à l'ame d'un
 Sauvage naturellement inconstante.

Enfin, apres auoir inſtruit noſtre bon
 Ioseph du Sacrement de l'Extreme-
 Onction, nous luy conſerasmes, & iu-
 ſtement le Samedy ſainct ſon ame par-
 tit de ſon corps, pour s'en aller celeſ-

20 *Relation de la nouvelle France,*
brer la feste de Pasques au Ciel. L'un
de ses gendres l'ayant veu fort bas,
estoit demeuré auprès de luy pour voir
comme nous l'ensevelirions apres sa
mort, desirant qu'on luy donnaist vne
Castelogne & son petunoir, pour s'en
servir en l'autre monde: mais comme
il alloit porter la nouvelle de cette
mort à la femme du deffunct, nous
l'ensevelismes à la façon de l'Eglise
Catholique, honorant ses obseques le
mieux qu'il nous fut possible. Mon-
sieur de Champlain pour tesmoigner
l'amour & l'honneur que nous por-
tons à ceux qui meurent Chrestiens,
fist quitter le travail à ses gens, &
nous les enuoya pour assister à l'office,
nous gardasmes le plus exactement
qu'il nous fut possible les ceremonies
de l'Eglise, ce qui agreea infiniment
aux parens de ce nouveau Chrestien;
vne chose neantmoins leur depleut
quand on vint à mettre le corps dans
la fosse, ils s'apperceurent qu'il y auoit
vn peu d'eauë au fonds, à raison que
les neiges se fondoient pour lors &
degouttoient là dedans, cela leur frap-
pa l'imagination, & comme ils font

superstitieux les attrista vn petit. Cet
erreur ne sera pas difficile à combattre,
quand on sçaura bien leur langue;
voila à mon aduis les premiers des
Sauuages adultes baptisez, & morts
constans en la foy dans ces contrées.

Le troisieme Sauuage baptisé cette
année, estoit vn enfant âgé de trois à
quatre mois seulement, son Pere estant
en cholere contre sa femme, fille de no-
stre bon Ioseph, soit pource qu'elle le
vouloit quitter, ou qu'il estoit tou-
ché de quelque ialousie, il print l'en-
fant & le ietta contre terre pour l'as-
sommer: Vn de nos François suruenant
là dessus, & se souuenant que nous
leurs auions reCOMMANDÉ de conferer
le Baptesme aux enfans qu'ils ver-
roient en danger de mort, au cas qu'ils
ne nous peussent appeller, il prit de
l'eauë & le baptiza: ce pauvre petit
neantmoins ne mourut pas du coup,
sa mere le reprit & l'emporta avec soy
dans les Isles quittant son mary, qui
nous a dit depuis qu'il croit que son fils
est mort, sa mere estant tombée dans
vne maladie qu'il iuge mortelle.

Le quatrieme estoit fils d'vn Sau-

22 *Relation de la nouvelle France,*
uage nommé Khioirineou, sa mere
s'appelloit Ouitapimoucou, ils auoient
donné nom à leur petit Itaouabififiou
ses parens me promirent qu'ils nous
l'apporteroient pour l'enterrer en no-
stre cimetiere au cas qu'il mourut, &
qu'ils nous le donneroient pour l'in-
struire s'il guerissoit, car il estoit mala-
de, faifans ainsi paroistre le contente-
ment qu'ils auoient que leur petit fils
receut le saint Baptisme: Je le bapti-
say donc, & luy donnay le nom de Iean
Baptiste, ce iour estant l'octaue de ce
grand Saint. Le sieur du Chesne Chi-
rurgien de l'habitation, qui vient vo-
lontiers avec moy par les Cabanes,
pour nous aduertir de ceux qu'il iuge
en danger de mort fut son parrain.

Le cinquiesme fut baptizé le mesme
iour, son Pere auoit tesmoigné au sieur
Oliuier truchement, qu'il eut bien
voulu qu'on eust fait à son fils ce qu'on
fait aux petits enfans François, c'est à
dire qu'on l'eust baptizé, le sieur Oli-
uier m'en ayant donné aduis i'allay
voir l'enfant, ie differay le baptisme
pour quelques iours, le trouuant en-
core plein de vie; en fin le P. Buteux &

moy l'estans retournez voir, nous appellasmes Monsieur du Chesne, qui nous dit que l'enfant estoit bien mal. ie demanday à son Pere s'il feroit content qu'on le baptizât, tres-cōtent (fit-il,) s'il meurt ie le porteray en ta maison, s'il retourne en santé il sera ton fils, & tu l'instruiras. Je le nommé Adrian du nom de son Parrain, il se nommoit auparavant Pichichich, son Pere est surnommé des François Baptiscan, il s'appelle en Sauvage Tchimaouirineou, sa mere Matouetchiouanoueou. Ce pauvre petit âgé d'environ 8. mois s'enuola au Ciel, la nuit suiuate son Pere ne manqua pas d'apporter son corps, amenant avec soy dix-huict ou vingt Sauvages, hommes, femmes & enfans, ils l'auoient enuelpé dans des peaux de Castor, & par dessus d'un grand drap de toile, qu'ils auoient achepté au magazin, & encore par dessus d'une grande escorce redoublée. Je déuelpay ce paquet, pour voir si l'enfant estoit dedans, puis ie le mis dans un cercueil que nous luy fismes faire, ce qui agreea merueilleusement aux Sauvages : car ils croyent que l'a-

24 *Relation de la nouvelle France,*
me de l'enfant se doit servir en l'autre
monde de l'ame, de toutes les choses
qu'on luy donne à son depart, ie leur
dis bien que cette ame estoit mainte-
nant dedans le Ciel, & qu'elle n'auoit
que faire de toutes ces pauuretez neāt-
moins nous les laissasmes faire, de peur
que si nous les eussions voulu empes-
cher, ce que i'aurois peu faire, (car le
Pere chanceloit desia,) les autres ne
nous permiffent pas de baptizer leurs
enfans quand ils seroient malades, où
du moins ne les apportassent point
apres leur mort. Ces pauvres gens fu-
rent ravis, voyants cinq Prestres re-
uestus de surplis honorer ce petit an-
ge Canadien, chantant ce qui est or-
donné par l'Eglise, couvrans son cer-
cueil d'un beau parement, & le parse-
mant de fleurs: nous l'enterrasmes avec
toute la solemnité qui nous fut possi-
ble.

Tous les Sauvages assistoient à tou-
tes les ceremonies, quand ce vint à le
mettre en la fosse, sa mere y mit son
berceau avec luy & quelques autres
hardes selon leur coustume, & bien-
tost apres tira de son laiët dans vne pe-

rite escuelle d'escorce quelle brusla sur l'heure mesme. Je demanday pourquoy elle faisoit cela, vne femme me repar-
tit, qu'elle donnoit à boire à l'enfant, dont l'ame beuvoit de ce lait. Je l'in-
struisis là dessus, mais ie parle encores si peu qu'à peine me pût elle enten-
dre.

Après l'enterrement nous fîmes le festin des morts, donnans à manger de la farine de bled d'Inde, meslée de quelques pruneaux à ces bonnes gens, pour les induire à nous appeller quand eux ou leurs enfans seront malades. Bref ils s'en retournerent avec fort grande satisfaction, comme ils firent paroistre pour lors, & particuliere-
ment deux iours apres.

Le Pere Buteux retournant de dire la Messe de l'habitation, comme il visi-
toit les Cabanes des Sauvages, il ren-
contra le corps mort du petit Iean Baptiste qu'on enueloppoit comme l'autre, ses parents, quoy que malades, luy promirent de l'apporter chés nous. On ma desia fait recit (dit la mere de l'honneur & du bon traictement que vous faictes à nos enfans, mais ie ne

26 *Relation de la nouvelle France,*

veux point qu'on d'eueloppe le mien. Là dessus le Pere du premier trespaslé luy dist, on ne fait point de mal à l'enfant on ne luy oste point ses robbes, on regarde seulement s'il est dedans le paquet, & si nous ne sommes point trompeurs, elle acquiesça & presenta son fils pour estre porté dans nostre Chapelle, dans laquelle le Pere Buteux nous l'amena en la compagnie de ses parens & des autres Sauvages; nous l'enterrasmes avec les mesmes ceremonies que l'autre, & eux luy donnerent aussi ses petits meubles pour passer en l'autre monde, nous fismes encores le festin qu'ils font à la mort de leurs gens, bien ioyeux de voir ce peuple s'affectionner petit à petit, aux saintes actions de l'Eglise Chrestienne & Catholique.

Le quatorziesme de Iuillet ie baptizay le sixiesme, c'estoit vne petite Algonquine aagée d'environ vn an, ie ne l'eusse pas si tost fait Chrestienne, n'estoit que ses parens s'en vouloient aller vers leur pays. Or iugeant avec Monsieur du Chesne, que cet enfant traouillé d'vne fieure ethique, estoit en

danger de mort, ie luy conferay ce Sacrement, elle fut appellée Marguerite, on la nommoit en Sauvage *Memich-tigouchioniscoueu*, c'est à dire, femme d'un European, son Pere se nomme en Algonquain *Pichibabich*, c'est à dire Pierre, & sa mere *Chichip*, c'est à dire un Canard, ils m'ont promis que si cette pauvre petite recouure sa santé qu'ils me l'apporteroient, pour la mettre entre les mains de l'une de nos Françoises, comme ce peuple est errant, ie ne sçai maintenant où elle est, ie crois qu'elle n'est pas loing du Paradis, si elle n'y est desia.

La septiesme personne que nous auons mis au nombre des enfans de Dieu, par le Sacrement de Baptême, c'est la mere du petit Sauvage, que nous auons nommé bien-venu; elle s'appelloit en Sauvage *Ou routiucoueu*, & maintenant on l'appelle Marie, ce beau nom luy a esté donné, suiuant le vœu qu'auoit fait autresfois le R. Pere Charles l'Allement, que la premiere Canadienne que nous baptizerions, porteroit le nom de la sainte Vierge, & le premier Sauvage, celuy de

28 *Relation de la nouvelle France,*
de son glorieux Espoux saint Ioseph,
nous n'ations point cognoissance de
ce vœu, quand les autres ont esté bap-
tizés. J'espere que dans fort peu de
iours il sera entierement accompli:
mais pour retourner à nostre nouuel-
le Chrestienne, l'ayant trouuée proche
du fort de nos François, abandonnée
deses gens, pource qu'elle estoit ma-
lade, ie luy demanday qui la nourris-
soit, elle me respondit que les Fran-
çois luy donnoient quelque morceau
de pain, & que quelques vns reuenans
de la chasse, luy iettoient par fois en
passant vne tourterelle, si vous vous
voulez cabaner, luy dis-je, proche de
nostre maison, nous vous nourrirōs, &
vous enseignerons le chemin du Ciel;
Elle me repartit d'une voix languissan-
te, car elle estoit fort mal, hélas! i'y vou-
drois bien aller, mais ie ne sçauois
plus marcher, ayepitié de moy, enuoye
moy querir dans vn Canot. I'en y man-
quay pas le lendemain matin 23. Iuillet
ie la fis apporter proche de nostre mai-
son; la pauvre fême me demãdoit bien
si elle n'entreroit point chez nous, elle
s'attẽdoit que nous luy feriōs la mesme

charité que nous auions fait aux deux premiers baptizés, mais ie luy respōdis qu'elle estoit fēme, & que nous ne pouuions pas la loger dās nōtre maisonnette qui est fort petite, que neātmoins nous luy porterions à manger dans la Cabane, & que tous les iours ie l'irois voir pour l'instruire, elle fut contente. Quand ie commençay à luy parler de la sainte Trinité, disant, que le Pere, & le Fils, & le saint Esprit, n'estoient qu'un Dieu qui a tout fait: ie le sçay bien, me fit-elle, ie le crois ainsi; Je fus tout estonné à cette repartie, mais elle me dit que nostre bon Sauuage Ioseph luy rapportoit par fois ce que nous luy disions, cela me consola fort, car en peu de temps elle fut suffisamment instruite pour estre baptizée: i'estois seulement en peine de luy faire conceuoir vne douleur de ses pechez, les Sauuages n'ont point en leur langue, si bien en leurs mœurs, ce mot de peché: le mot de meschanceté & de malice signifie parmy eux vne action contre la pureté, à ce qu'ils m'ont dit: i'estois donc en peine de luy faire conceuoir vn deplaisir d'auoir offencé

30 *Relation de la nouvelle France.*

Dieu, ie luy leus par plusieurs fois les Commandemens, luy disant que celuy qui à tout fait haïssoit ceux qui ne luy obeïssoient pas, & qu'elle luy dit qu'elle estoit bien marrie de l'auoir offensé: La pauvre femme qui auoit bien retenues deffences que Dieu a fait à tous les hommes de mentir, de pail- larder, de desobeir à ses parents, s'accusa tout seule de toutes ses offences par plusieurs fois: disant de soy mes- me, celuy qui as tout fait aye pitié de moy, IESVS, Fils de celuy qui peut tout, fais moy misericorde: ie te promets que ie ne m'enyreray plus ny que ie ne diray plus de paroles des honnestes, que ie ne mentiray plus, ie suis marrie de t'auoir fasché, i'en suis marrie de tout mon cœur, ie ne mens point, aye pitié de moy, si je retourne en santé, ie croiray tousiours en toy, ie t'obeiray tousiours, si ie meurs aye pitié de mon ame; l'ayant donc veüe ainsi disposée, craignant d'ailleurs qu'elle ne mourust subitement, car elle estoit fort mala- de, ie luy demanday si elle ne vou- loit pas bien estre baptizée, ie vou- drois bien encore viure, me dit-elle,

ie cogneu qu'elle s'imaginoit que nous ne donnions point le baptême qu'à ceux qui deuoient mourir incontinent apres; ie luy fist entendre que nous estions tous baptizés, & que nous n'estions pas morts, que le baptême rendoit plustost la santé du corps, qu'il ne l'ostoit; baptise moy donc au plustost me fit elle: ie la voulus esprouuer, il estoit arriué quelques canots de Sauvages à Kebec, ie luy dis, voila vne compagnie de tes gens qui vient d'arriuer, si tu veux t'en aller avec eux, ils te receuront, & ie te feray porter en leurs cabanes; la pauvre creature se mit à pleurer & à sanglotter si fort, qu'elle me toucha, me resmoignant par ses larmes qu'elle vouloit estre Chrestienne, & que ie ne la chassasse point: enfin voyant son mal redoubler, nous prîmes resolution de la baptizer promptement; ie luy fist entendre qu'elle pourroit mourir la nuit, & que son ame s'en iroit dans les feux, si elle n'estoit baptizée: que si elle vouloit receuoir ce sacrement en nostre Chapelle, que ie l'y ferois apporter dans vne couuerture, elle resmoigna qu'elle

32 *Relation de la nouvelle France*,
en estoit contente: ie men vay, luy
disie, preparer tout ce qu'il fault,
prends courage, ie t'enuoieray bien-
tost querir: la pauvre femme n'eut pas
la patience d'attendre, elle se traïsne
comme elle pût, se reposant à tous
coups, en fin elle arriua à nostre maison
esloignée de plus de deux cent pas de
sa cabane, & se jetta par terre n'en
pouuant plus, estant reuenue à foy, ie la
baptizay en presence de nos Peres, &
de tous nos hommes: elle me respondit
brauement à toutes les demandes que
ie luy feis, suiuant l'ordre de conferer
ce Sacrement aux personnes qui ont
l'vsage de raison: Nous la reportasmes
dans sa cabane toute pleine de joie, &
nous remplis de consolation voiant la
grace de Dieu operer dans vne ame où
le diable auoit fait sa demeure si long
temps. Cecy arriua le premier iour
d'Aoust.

Le lendemain quelques François
m'estant venus voir, l'allans visiter,
ils la trouuerent tenant vn Crucifix en
main, & l'apostrophant fort douce-
ment: Toy qui est mort pour moy,
fais moy misericorde, ie veux croire en
toy

toy toute ma vie, aye pitié de mon ame; Je rapporte expressement toutes ces particularitez, pour faire voir que nos Sauvages ne sont point si barbares qu'ils ne puissent estre faits enfans de Dieu: J'espere que là où le péché a regné, que la grace y triomphera, cette pauvre femme veit encores plus proche du Ciel que de la fanté.

Je concluerray ce Chapitre par vn chastiment assez remarquable d'une autre Canadienne, qui ayant fermé l'oreille à Dieu pendant sa maladie, semble auoir esté rejetée à sa mort. Le Pere Brebœuf l'ayant esté voir, pour luy parler de receuoir la foy, elle se mocqua de luy, & mesprisa ses paroles: sa maladie l'ayant terrassée, & les Sauvages voulans decabaner, la porterent à cette honneste famille, habituée icy depuis vn assez long temps; mais n'ayāt pas où la loger, ces Barbares la traînerent au fort, si nous n'eussions esté si esloignez, assurement ils nous l'auroient amenée; car ie me doute qu'ils la presentoiēt à nos François, voyans que nous auions receu avec beaucoup d'amour les deux Sauvages morts Chre-

tiens. Monsieur de Champlain voyant qu'il estoit defia tard luy fist donner le couuert pour vne nuit, ceux qui estoient dans la chambre où on la mit furent contraints d'en sortir, ne pouuans supporter l'infection de cette femme.

Le iour venu Monsieur de Champlain fist appeller quelques Sauvages, & leur ayant reproché leur cruauté d'abandonner cette creature qui estoit de leur nation, ils la reprirent & la trainerent vers leurs Cabanes, la rebutans comme vn chien, sans luy donner le couuert. Cette miserable se voyant delaissee des siens, exposée à la rigueur du froid, demãda qu'on nous fist appeller; mais cõme il n'y auoit point là de nos François, les Sauvages ne voulurent pas prendre la peine de venir iusques en nostre maison, esloignée d'une bonnelieuë de leurs Cabanes, si bien que la faim, le froid, la maladie, & les enfans des Sauvages, à ce qu'on dit, la tuerent; nous ne fusmes aduertis de cette histoire tragique que quelques iours apres sa mort: s'il y auoit icy vn Hospital il y auroit tous les malades du

pays, & tous les vieillards, pour les hommes nous les secourerons, selon nos forces, mais pour les femmes il ne nous est pas bien seant de les recevoir en nos maisons.

*Des moyens de convertir les
Sauvages.*

CHAPITRE III.

LE grand pouuoir que firent paroistre les Portugais au commencement dedans les Indes Orientales & Occidentales, ietta l'admiration bien auant dedans l'esprit des Indiens, si bien que ces peuples embrasserent quasi sans contreditte la creance de ceux qu'ils admiroient. Or voicy à mon aduis les moyens d'acquérir cet ascendant, par dessus nos Sauvages.

Le premier est d'arrester les courses de ceux qui ruinent la Religion, & de se rendre redoutables aux Hiroquois, qui ont tué de nos hommes, comme chacun sçait, & qui tout fraischement ont massacré deux cent Hurons, & en

36 *Relation de la Nouvelle France,*

ont pris plus de cent prisonniers. Voila selon ma pensée la porte vniue, par laquelle nous sortirons du mespris, où la negligence de ceux qui auoient cy-deuant la traite du pays, nous ont ietté par leur auarice.

Le second moyen de nous rendre recommandables aux Sauvages, pour les induire à receuoir nostre sainte foy, seroit d'enuoyer quelque nombre d'hommes bien entendus à defricher & cultiuer la terre, lesquels se ioignant avec ceux qui sçauoient la langue, trauiilleroient pour les Sauvages, à cōdition qu'ils s'arresteroient, & mettroient eux-mesmes la main à l'œuure, demeurants dans quelques maisons qu'on leur feroit dresser pour leur vsage, par ce moyen demeurants sedentaires, & voyants ce miracle de charité en leur endroit, on les pourroit instruire & gagner plus facilement. M'entretenant cēt Hyuer avec mes Sauvages, ie leurs communiquois ce dessein, les asseurant que quand ie sçauois parfaictement leur langue, ie le aiderois à cultiuer la terre, si ie pouuois auoir des hommes, & s'ils se vou-

loient arrester, leurs representant la misere de leurs courses, qui les touchoit pour lors assez sensiblement. Le Sorcier m'ayant entendu, se tourna vers ses gens, & leur dit, voyez comme cette robe noire ment hardiment en nostre presence; ie luy demandy pourquoy il se figuroit que ie mentois, pource, dit-il, qu'on ne voit point d'hommes au monde si bons comme tu dis, qui voudroient prendre la peine de nous secourir sans espoir de recompense, & d'employer tant d'hommes pour nous aider sans rien prendre de nous; si tu faisois cela, adjousta-il, tu arresterois la pluspart des Sauvages, & ils croiroient tous à tes paroles.

Ie m'en rapporte, mais si ie puis tirer quelque conclusion des choses que ie vois, il me semble qu'on ne doit pas esperer grande chose des Sauvages, tant qu'ils seront errants; vous les instruisés aujourdhuy, demain la faim vous enleuera vos auditeurs, les contrainnant d'aller chercher leur vie dans les fleuves & dans les bois. L'an passé ie faisois le Catechisme en begaiant à

38 *Relation de la Nouvelle France,*
bon nombre d'enfans; les vaisseaux
partis, mes oyseaux s'enuolèrent qui
d'un costé qui de l'autre, cette année
que ie parle vn petit mieux, ie les pen-
sois reuoir, mais s'estans cabanez delà
le grand fleuve de S. Laurens, i'ay esté
frustré de mon attente. De les vouloir
suiure, il faudroit autant de Religieux
qu'ils font de cabanes, encor n'en vien-
droit on pas à bout; car ils sont telle-
ment occupez à quester leur vie parmy
ces bois, qu'ils n'ont pas le loisir de se
sauuer, pour ainsi dire. De plus ie ne
crois point que de cent Religieux, il y
en ait dix qui puissent resister aux tra-
uaux, qu'il faudroit endurer à leur sui-
te. Je voulus demeurer avec eux l'Au-
tomne dernier, ie n'y fus pas huit iours,
qu'une fièvre violente me faist, & me
fist rechercher nostre petite maison,
pour y trouuer ma santé: Estant guar-
y ie les ay voulu suiure pendant l'Hiver,
i'ay esté fort malade la pluspart du
temps. Ces raisons & beaucoup d'au-
tres que ie deduirois, n'estoit que ie
crains d'estre lōg, me font croire qu'on
trouuillera beaucoup, & qu'on auance-
ra fort peu, si on n'arreste ces Barbares,

de leur vouloir persuader de cultiver d'eux-mesmes sans estre secourus, ie doute fort si on le pourra obtenir de long temps; car ils n'y entendent rien: De plus où retireront ils ce qu'ils pourront recueillir, leurs cabanes n'estants faites que d'escorce? la premiere gelée gastera toutes les racines & les citrouilles qu'ils auroient ramassées. De semer des poids & du bled d'Inde, ils n'ont point de place dans leurs todis; mais qui les nourrira pendant qu'ils cōmenceront à defricher; car ils ne vivent quasi qu'au iour la iournée, n'ayāt pour l'ordinaite au temps qu'il faut defricher aucunes prouisions. En fin quand ils se tueroiēt de trauailler, ils ne pourroient pas retirer de la terre la moitié de leur vie, iusques à ce qu'elle soit defrichée, & qu'ils soient bien entendus à la faire profiter.

Orauecle secours de quelques braves ouuriers de bon trauail, il seroit aisé d'arrester quelques familles, veu que quelques vns m'en ont desja parlé, s'accoustumans d'eux-mesmes petit à petit à tirer quelque chose de la terre.

Je sçay bien qu'il y a des personnes de

40 *Relation de la Nouvelle France*,
bon iugement, qui croyent qu'encor
que les Sauvages soient errants, que la
bonne semence del'Evangile ne laisse-
ra pas de germer & de fructifier en leur
ame, quoy que plus lentement, pource
qu'on ne les peut instruire que par re-
prises. Ils se figurēt encor que s'il passe
icy quelques familles comme on a des-
ja commencé d'en amener, que les Sau-
uages, prendrōt exemple sur nos Fran-
çois, & s'arresteront pour cultiuer la
terre. Je fus frappé de ces pensées au
commencement que nous vinsmes icy,
mais la cōmunicatiō que i'ay euë avec
ces peuples, & les difficultez qu'ont des
hōmes habituez dans l'oisiuete, d'em-
brasser vn fort travail, comme est la
culture de la terre, me fōt croire main-
tenant que s'ils ne sont secourus, ils
perdront cœur, notamment les Sauua-
ges de Tadoussac. Car pour ceux des
trois riuieres, où nos François font fai-
re vne nouvelle habitation cette an-
née, ils ont promis qu'ils s'arresteront
là & qu'ils semeront du bled d'Inde; ce
qui me semble n'est pas tout à fait as-
seuré, mais probable, pour autant que
leurs predecesseurs ont eu autresfois

une bonne bourgade en cet endroit, qu'ils ont quittée pour les inuasions des Hiroquois leurs ennemis.

Le Capitaine de ce quartier là, m'a dit que la terre y estoit fort bonne, & qu'ils l'aimoient fort s'ils deuiennent sedentaires, comme ils en ont maintenant la volonté, nous preuoyons là une moisson plus feconde des biens du Ciel, que des fructs de la terre.

Le troisieme moyen d'estre bien-voulu de ces peuples, seroit de dresser icy vn seminaire de petits garçons, & avec le temps vn de filles, sous la conduite de quelque braue maistresse, que le zele de la gloire de Dieu & l'affectiō au salut de ces peuples, fera passer icy, avec quelques Compagnes animées de pareil courage. Plaise à sa diuine Majesté d'en inspirer quelques vnes, pour vne sinoble entreprise, & leur fasse perdre l'apprehension que la foiblesse de leur sexe leur pourroit causer, pour auoir à trauerfer tant de mers, & viure parmy des Barbares.

A ce dernier voyage des femmes enceintes sont venuës, & ont aisemēt surmonté ces difficultez, comme auoient

42 *Relation de la Nouvelle France,*
faict d'autres auparauant. Il y a aussi du
plaisir d'appriuoiser des ames Sauua-
ges, & les cultiuer pour receuoir la se-
mence du Christianisme. Et puis l'ex-
perience nous rend certains, que Dieu
qui est bon & puissant enuers tous, au
respect neantmoins de ceux qui s'expo-
sent genereusement & souffrent volon-
tiers pour son seruice, il a des caresses
assaisonnées de tant de suauitez, & les
secourt parmy leurs dangers d'une si
prompte & paternelle assistance, que
souuent ils ne sentent point leurs tra-
uaux, ains leurs peines leur tournent à
plaisir, & leurs perils à consolation sin-
guliere: Mais ie voudrois tenir icy où
nous sommes les enfans des Hurons.
Le Pere Brebœuf nous faict esperer
que nous en pourrons auoir, s'il entre
auec nos Peres dans ces pays bien peu-
plez, & si on trouue de quoy fonder ce
seminaire. La raison pourquoy ie ne
voudrois pas prédre les enfans du pays
dans le pays mesme, mais en vn autre
endroit, c'est pour autant que ces Bar-
bares ne peuuent supporter qu'on cha-
stie leurs enfans, non pas mesme de
paroles, ne pouuans rien refuser à vn

enfant qui pleure, si bien qu'à la moindre fantaisie ils nous les enleueroient deuant qu'ils fussent instruits; mais si on tient icy les petits Hurōs, ou les enfans des peuples plus esloignez, il en arriuera plusieurs biens: car nous ne serōs pas importunés ny destournés des peres en l'instruction des enfans; cela obligera ces peuples à bien traiter, ou du moins à ne faire aucun tort aux François qui seront en leur pays. Et en dernier lieu nous obtiendrons, avec la grace de Dieu nostre Seigneur, la fin pour laquelle nous venons en ce pays si esloigné, sçavoir est la conuersion de ces peuples.

De la creance, des superstitions, & des erreurs des Sauvages Montagnais.

CHAPITRE IV.

I'Ay desia mandé, que les Sauvages croyoient qu'un certain nommé Atahocam auoit créé le monde, & qu'un nommé Messou l'auoit réparé. J'ay interrogé là dessus ce fameux Sorcier & ce vieillard, avec lesquels j'ay passé

44 *Relation de la Nouvelle France*,

l'Hyuer, ils m'ont respondu, qu'ils ne sçauoient pas qui estoit le premier Auteur du mōde, que c'estoit peut estre Atahochā, mais que cela n'estoit pas certain qu'ils ne parloient d'Atahocam, que comme on parle d'une chose si esloignée, qu'ōn'en peut tirer aucune assurance, & de fait le mot Nitatahokan en leur lāgue, signifie, ie racōte vne fable, ie dis vn vieux conte fait à plaisir.

Pour le Messou, ils tiennent qu'il a réparé le monde qui s'estoit perdu par le deluge d'eau, d'où appert qu'ils ont quelque traditiō de cette grande inondation vniuerselle qui arriua du temps de Noë, mais ils ont rempli cette verité de mille fables impertinentes. Ce Messou allant à la chasse ses loups Ceruiers dont il se seruoit au lieu de chiens, estans entrez dans vn grand lac ils y furent arrestez. Le Messou les cherchant partout, vn oyseau luy dit qu'il les voyoit au milieu de ce lac, il y entre pour les retirer, mais ce lac venant à se desgorger couurit la terre, & abisma le monde, le Messou bien estōné, enuoya le corbeau chercher vn morceau de terre pour rebastir cet element, mais il

n'en peut trouuer, il fist descendre vne Loutre dās l'abisme des eauës, elle n'en peut rapporter, enfin il enuoya vn rat musqué, qui en rapporta vn petit morceau, duquel se seruit le Messou, pour refaire cette terre où nous sommes, il tira des flesches aux troncs des arbres, lesquelles se conuertirent en brāches, il fist mille autres merueilles, se vengea de ceux qui auoient arresté ses Loups Ceruiers, épousa vne Ratte musquée, de laquelle il eust des enfans qui ont repeuplé le monde, voila cōme le Messou a tout restably. Je touchay l'an passé cette fable, mais desirant rassembler tout ce que ie sçay de leur creance, i'ay vsé de redittes. Nostre Sauuager acōtoit au Pere Brebœuf que ses compatriotes croyent qu'vn certain Sauuage auoit receu du messou le don d'immortalité dans vn petit pacquet, avec vne grande recommandation de ne la point ouurir, pendāt qu'il le tint fermé il fust immortel, mais sa femme curieuse & incredule, voulut voir ce qu'il y auoit dans ce present, l'ayant deployé, tout s'enuola, & depuis les Sauuages ont esté sujets à la mort.

Ils disent en outre, que tous les animaux de châce espee ont vn frere aîné, qui est cōme le principe & cōme l'origine de tous les indiuidus, & ce frere aîné est merueilleusement grād & puissāt. L'aîné des Castors, me disoient-ils, est peut-estre aussi gros que nostre Cabane, quoy que ses Cadets (i'entēds les Castors ordinaires) ne soient pas tout à fait si gros que nos moutons; or ces aînez de tous les animaux sont les cadets du Messou, le voila bien appareté, le braue reparateur de l'Vniuers, est le frere aîné de toutes les bestes. Si quelqu'un void en dormant l'aîné ou le principe de quelques animaux, il fera bonne chasse, s'il void l'aîné des Castors, il prēdra des Castors, s'il void l'aîné des Eslans, il prendra des Eslans, iouyssans des cadets par la faueur de leur aîné qu'ils ont veu en songe. Je leur demanday où estoient ces freres aînez, nous n'en sommes pas bien asseurez, me dirent-ils, mais nous pensons que les aînés des oyseaux sont au ciel, & que les aînez des autres animaux sont dans les eauës. Ils reconnoissent deux principes des saisons, l'un

s'appelle *Nipinoukhe*, c'est celuy qui ramene le Printemps & l'Esté. Ce nom vient de *Nipin*, qui en leur langue signifie le Printemps. L'autre s'appelle *Pipounoukhe*, du nom de *Pipoun*, qui signifie l'Hiver, aussi ramene il la saison froide. Le leurs demandois si ce *Nipinoukhe*, & *Pipounoukhe*, estoient hommes ou animaux de quelque autre espece, & en quel endroiët ils demoureroient ordinairement; & ils me responderent qu'ils ne sçauoient pas bien comme ils estoient faiëts, encor qu'ils fussent bië asseurez qu'ils estoient viuants; car ils les entendent, disent-ils, parler ou bruire, notamment à leur venue, sans pouuoir distinguer ce qu'ils disent; pour leur demeure, ils partagent le monde entre-eux, l'un se tenant d'un costé, l'autre de l'autre, & quand le temps de leur station aux deux bouts du monde, est expiré l'un passe en la place de l'autre, se succedans mutuellement; Voila en partie la fable de Castor & de Pollux. Quand *Nipinoukhe* reuiert, il ramene avec soy la chaleur, les oyseaux, la verdure, il rend la vie & la beauté au monde, mais *Pipounoukhe*, ravage tout,

48 *Relation de la Nouvelle France,*

estant accompagné de vents froids, de glaces, de neiges, & des autres appanages de l'Hiver; Ils appellent cette succession del'un à l'autre *Achitescatoueth*, c'est à dire ils passent mutuellement à la place l'un de l'autre.

De plus, ils croyent qu'il y a certains Genies du jour, ou Genies de l'air, ils les nomment *Khichikouai* du mot *Khichikou*, qui veut dire le jour & l'air. Les Genies, ou *Khichikouai*, connoissent les choses futures, ils voyent de fort loing, c'est pourquoy les Sauvages les consultent, non pas tous mais certains iongleurs, qui sçauent mieux bouffonner & amuser ce peuple que les autres. Je me suis trouué avec eux quand ils consultoient ces beaux Oracles, voicy ce que j'en ay remarqué.

Sur l'entrée de la nuit, deux ou trois jeunes hommes dresserent vn tabernacle au milieu de nostre Cabane, ils plantèrent en rond six pieux fort auant dans terre, & pour les tenir en estat, ils attachèrent au haut de ces pieux vn grand cercle, qui les environnoit tous; cela fait ils entourerent cet Edifice de Castelognes, laissant le haut du tabernacle

cle ouuert, c'est tout ce que pourroit faire vn grand homme, d'atteindre de la main au plus haut de cette tour ronde, capable de tenir 5 ou 6 hommes debout. Cette mais^{on} estât faite, on esteint entierement les feux de la cabane, iettant dehors les tisons, de peur que la flâme ne donne de l'espouuante à ces geniés ou *Khichikouai*, qui doiuent entrer en ce tabernacle, dans lequel vn ieune iongleur se glissa par le bas, retroussant à cet effect la couuerture qui l'enuir^{on}noit, puis la rabbattât quand il fut entré, car il se faut bien donner de garde qu'il n'y ait aucune ouuerture en ce beau palais, sinon par le haut. Le jongleur entré, commença doucement à fremir, comme en se plaignât, il esbranloit ce tabernacle sans violence au commencement, puis s'animant petit à petit, il se mit à siffler d'une façon sourde, & comme de loin: puis à parler comme dans vne bouteille, à crier comme vn chat-huant de ce pays-cy, qui me semble auoir la voix plus forte que ceux de France, puis à hurler, chanter, variant de t^{on} à tous coups, finissant par ces syllabes, *ho ho, hi hi, gui gui nioné*, & autres

50 *Relation de la Nouvelle France,*
semblables cōtrefaisant la voix, en sorte qu'il me sembloit oïr ces marionnettes que quelques bateleurs fōt voir en France: Il parloit tātost Mōtagnais, tantost Algonquain, retenāt tousiours l'accent Algonquain, qui est gay, cōme le Prouençal. Au commencement, cōme i'ay dit, il agitoit doucement cēt edifice, mais cōme il s'alloit tousiours animant, il entra dans vn si furieux enthousiasme, que ie croyois qu'il deust tout briser, esbranlant si fortement, & avec de telles violences sa maison, que ie m'estonnois qu'un homme eust tant de force: car comme il eut vne fois cōmencé à l'agiter, il ne cessa point que la consulte ne fust faite, qui dura enuiron trois heures: Comme il changeoit de voix, les Sauvages s'escríoient au commencement *moa, moa*, escoute, escoute: puis inuitās ces Geniēs, ils leurs disoiēt, *Pitoukhecou, Pitoukhecou*, entrez, entrez. D'autrefois cōme s'ils eussent respondu aux hurlements du jongleur, ils tiroient ceste aspiration du fond de la poitrine, *ho, ho*. I'estois assis comme les autres regardant ce beau mystere avec defence de parler: mais cōme ie ne leur

en l'année 1634.

Si

auois point voüé d'obeïssance, ie ne laissois pas de dire vn petit mot à la tra- uerse: tantost ie les priois d'auoir pitié de ce pauvre jongleur, qui se tuoit dans ce tabernacle: d'autrefois ie leur disois qu'ils criassent plus haut & que leurs Geniés estoient endormis.

Quelques vns de ces Barbares s'ima- ginēt que ce jongleur n'est point là de- dans, qu'il est transporté sans sçauoir ny ou, ny cōment. D'autres disent que son corps est couché par terre, que son ame eist au haut de ce tabernacle, où el- le parle au commencement, appellant ces Geniés, & iettant par fois des estin- celles de feu. Or pour retourner à no- stre consultation, les Sauuages ayant ouy certaine voix que contrefit le jon- gleur, poufferēt vn cris d'allegresse, di- sants qu'vn de ces Geniés estoit entré: Puis s'adressants à luy, s'escrioient, *Tepouachi, tepouachi*, appelle, appelle; sça- uoir est tes compagnōs; là dessus le jon- gleur faisant du Geniés, changeant de ton & de voix les appelloit: cependant nostre forcier qui estoit presēt prit son tambour, & chantant avec le iongleur qui estoit dans le tabernacle, les autres

respondoient: On fit dancier quelques ieunes gens, entr'autres l'Apostat qui n'y vouloit point entendre, mais le forcier le fit bien obeïr.

En fin apres mille cris & hurlements, apres mille chants, apres auoir dancé & bien esbranlé ce bel edifice, les Sauuages croyãs que les Geniés ou *Kichikouai* estoient entrez, le forcier les consulta: il leur demanda de sa santé (car il est malade) de celle de sa fême quil'estoit aussi. Ces Geniés, ou plustost le jongleur qui les contrefaisoit, respondit que pour sa fême elle estoit desia morte, que c'en estoit fait, i'en eusse bien dit autant que luy, car il ne falloit estre ny prophete, ny forcier pour deuiner cela; d'autāt que la pauvre creature auoit la mort entre les dents: pour le forcier, ils dirēt qu'il verroit le Printemps. Or cognoissāt sa maladie, qui est vne douleur de reins, ou pour mieux dire, vn appanage de seslubricitez & paillardises, car il est sale au dernier poinct, ie luy dis voyant qu'il estoit sain d'ailleurs, & qu'il beuuoit & mangeoit fort biē, que non seulement il verroit le printemps, mais encore l'Esté, si quelque autre ac-

cident ne luy suruenoit, ie ne me suis
pas trompé.

Après ces interrogations, on deman-
da à ces beaux oracles s'il y auroit bien-
tost de la neige, s'il y en auroit beau-
coup, s'il y auroit des Essans ou Ori-
gnaux, & en quel endroict ils estoient,
ils repartirent ou plustost le iongleur,
contrefaisant tousiours sa voix, qu'ils
voyoient peu de neige & des orignaux
fort loing, sans determiner le lieu, ayāt
bien cette prudence de ne se point en-
gager.

Voila comme se passa cette con-
sulte, apres laquelle se voulut arrester
le iongleur: mais comme il estoit nuict,
il sortit de son tabernacle, & de nostre
cabane si vistemment, qu'il fust dehors
auant quasi que ie m'en apperceusse.
Luy & tous les autres Sauvages qui
estoient venus des autres Cabanes à ces
beaux mysteres, estans partis, ie de-
manday à l'Apostat, s'il estoit si simple
de croire que ces Geniés entraissent &
parlassent dans ce tabernacle, il se mit
à iurer sa foy, qu'il a perduë & reniée,
que ce n'estoit point le iongleur qu'il
parloit, ains ces *Khichikouai* ou Genies

54 *Relation de la Nouvelle France*,
du iour, & mon hôte me dit, entre toy
mesme dans le tabernacle, & tu verras
que ton corps demeurera en bas, &
ton ame montera en hault: l'y voulu
entrer, mais comme i'estois seul de mō
party, ie preueu qu'ils m'auroient fait
quelque affront, & comme il n'y auoit
point de tefmoins, ils se feroient van-
tez, que i'aurois recogneu & admiré la
verité de leurs mysteres.

Or j'auois grande enuie de sçauoir de
quelle nature ils faisoient ces Geniés,
l'Apostat n'en sçauoit rien. Le sorcier
voyant que i'esuantois ses mines, &
que i'improuuois ses niaiseries, ne me le
vouloit point enseigner, si bien qu'il
fallut que ie me seruisse d'industrie: Je
laissay escouler quelques sepmaines,
puis le jettant sur ce discours, ie luy
parlois comme admirant sa doctrine,
luy disant qu'il auoit tort de m'escon-
duire, puisque à toutes les questions
qu'il me faisoit de nostre croyance, ie
luy respōdois ingenuement, sans me fai-
re tirer l'oreille: En fin il se laissa gagner
à ses propres loüanges, & me descou-
urit les secrets de l'escole: voicy la fable
qu'il me raconta, touchant la nature

& l'essence de ces Geniés.

Deux Sauvages consultants ces Geniés en mesme temps, mais en deux diuers tabernacles, l'un d'eux, homme tres-meschant, qui auoit tué trois hommes à coup de haches par trahison, fust mis à mort par les Geniés, lesquels se transportans dans le tabernacle de l'autre Sauvage pour luy oster la vie, aussi bien qu'à son compagnon, ils se trouuerent eux mesmes surpris; car se iongleur se defendit si bien, qu'il tua l'un de ces *Khichikouai*, ou Geniés, & ainsi l'on a sçeu comme ils estoient faicts, car ce Genié demeura sur la place. Le luy demanday donc de qu'elle forme il estoit, il estoit gros comme le poing, me fit il, son corps est de pierre, & un peu long; le conceu qu'il estoit faict en cone, gros par un bout, s'allant toujours appetissant vers l'autre. Ils croient que dans ce corps de pierre il y a de la chair & du sang, car la hache donc ce Genié fust tué resta ensanglantée. Le m'enquestay s'ils auoient des pieds & des ailes, & m'ayant dict que non, & comment donc, leur fis-je, peuuent ils entrer ou voler dans ces tabernacles

56 *Relation de la Nouvelle France,*

s'ils n'ont ny pieds ny aisles, le forcier se mit à rire, disant pour solution, en verité ceste robe noire n'a point d'esprit, voila comme ils me payent quand ie leurs fais quelque obiectiō à laquelle ils ne peuvent respondre.

Comme ils faisoient grand cas du feu queliettoit ce iong leur hors de son tabernacle, ie leur dis, nos François en ietteroient mieux que luy, car il ne faisoit voler que des estincelles de quelque bois pourry qu'il porte avec soy, comme ie me persuade, & si i'eusse eu de la resine, ie leur eusse faict sortir des flammes. Ils me contestoient qu'il estoit entré sans feu dans cette maison, mais de bonne fortune, ie luy auois veu donner vn gros charbon ardant qu'il demanda pour petuner.

Voila leur creance touchant les principes des choses bonnes: Ce qui m'estonne, c'est leurs ingrattitudes, car quoy qu'ils croient que le Messou a reparé le monde, que Nipinoukhé & Pipounoukhé rameinent les saisons, que leur Khichikouai leurs apprenent où il y a des Esslans, ou Orignaux, & leurs rendent milles autres bōs offices: si est ce que ie n'ay peu iusques icy re-

cognoistre qu'ils leur rendent aucun honneur: i'ay seulement remarqué que dans leurs festins, ils iettent par fois quelques cuillerées de gresse d'as le feu, prononcant ces parolles *Papeouekou, Papeouekou*, faites nous trouuer à manger, faites nous trouuer à manger: ie crois que cette priere s'adresse à ces genies, auxquels ils presentent cette gresse comme la chose la meilleure qu'ils ayent au monde.

Outre ces principes des choses bonnes, ils recognoissent vn Manitou, que nous pouuons appeller le diable, ils le tiennent comme le principe des choses mauuaises, il est vray qu'ils n'attribuent pas grande malice au Manitou, mais à sa femme, qui est vne vraye diableffe: le mary ne hait point les hommes, il se trouue seulement aux guerres, & aux combats, & ceux qu'il regarde sont à couuert, les autres sont tués: voila pourquoy mon hoste me disoit, qu'il prioit tous les iours ce Manitou de ne point ietter les yeux sur les Hiroquois leurs ennemis, & de leur en donner tousiours quelqu'un en leurs guerres. Pour la femme du Manitou, elle est

58 *Relation de la Nouvelle France*,
cause de toutes les maladies qui sont
au mōde, c'est elle qui tuë les hommes,
autrement ils ne mouroient pas, elle se
repait de leur chair, les rongant inte-
rieurement, ce qui faict qu'on les voit
amaigrir en leurs maladies: elle a vne
robe des plus beaux cheveux des hom-
mes & des femmes qu'elle tuë, elle pa-
roist quelquefois comme vn feu, on
l'entend bien bruire comme vne flam-
me, mais on ne sçauroit distinguer son
langage: d'icy procedent à mon aduis
ces cris & ces hurlemens, & ces bate-
ments de tambours qu'ils font alen-
tour de leurs malades, voulans comme
empescher cette diableſſe de venir dō-
ner le coup de la mort: ce qu'elle faict
ſi ſubtilement, qu'on ne s'en peut de-
fendre, car on ne la voit pas.

De plus, les Sauvages ſe perſuadent
que non ſeulement les hommes & les
autres animaux: mais auſſi que toutes
les autres choſes ſont animées, &
que toutes les ames ſont immortelles,
ils ſe figurent les ames comme vn om-
bre de la choſe animée, n'ayans iamais
ouy parler d'une choſe purement ſpiri-
tuelle, ils ſe repreſentent l'ame de l'hō-

me, comme vne image sombre & noire, où comme vne ombre de l'homme mesme, luy attribuant des pieds, des mains, vne bouche, vne teste, & toutes les autres parties du corps humain. Voila pourquoy ils disent que les ames boient & mangent, aussi leurs dōnent-ils à manger quand quelqu'un meurt, iettant la meilleure viande qu'ils ayent dās le feu, & souuēt ils m'ont dit qu'ils auoient trouué le matin de la viande rongée la nuit par les ames. Or m'ayans déclaré ce bel article de leur croyance, ie leurs fis plusieurs interrogations. Premièrement, où alloient ces ames apres la mort de l'homme, & des autres creatures; elles vont, dirent ils, fort loin, en vn grād village situé où le Soleil se couche: Tout vostre pays, leur dis-je (sçauoir est l'Amerique) est vne grande Isle, comme vous tesmoignez l'auoir appris: comment est-ce que les ames des hommes, des animaux, des haches, des cousteaux, des chaudières; bref les ames de tout ce qui meurt, ou qui s'vse, peuuent passer l'eau pour s'en aller à ce grand village que vous placez où le soleil se couche, trouuent

60 *Relation de la Nouvelle France,*
elles des vaisseaux tous prests pour
s'embarquer & trauerfer les eaux? non
pas, mais elle vont à pied, me dirent-ils,
passants les eaux à gay en quelque en-
droict: & le moyen, leur fis-ie, de passer
à gay le grand Ocean que vous sça-
uez estre si profond, car c'est cette grã-
de mer qui enuironne vostre pays, tu
te trompe, respondent-ils, où les terres
sont conjointes en quelque endroict,
ou bien il y a quelque passage guayable
par où passent nos ames: & de faict nous
apprenons que l'on n'a peu encore pas-
ser du costé du Nord, c'est à cause (leur
repartis-ie) des grãds froids qui sont en
ces mers, que si vos ames prēnent cette
route elles seront glacées & toutes roi-
des de froid, deuant quelles arriuent en
leurs villages.

Secondement ie leur demande, que
mangeoient ces pauures ames, faisant
vn si long chemin, elles mangent des
escorces, dirent-ils, & du vieux bois
quelles trouuent dans les forests, ie ne
m'estonne pas, leur respōdis-ie, si vous
auez si peur de la mort, & si vous la
fuyez tapt, il n'y a guere de plaisir d'al-
ler manger du vieux bois & des escor-
ces en l'autre vie.

Tiercement. Que font ces ames estant arriuées au lieu de leur demeure? pendant le iour elles sont assises tenans leur deux coudes sur leur deux genoux, & leur testes entre leur deux mains, posture assés ordinaire aux Sauvages malades : pendant la nuit elles vont & viennent, elles traouillent, elles vont à la chasse, ouy mais, repartis-ie, elles ne voient goutte la nuit, tu es vn ignorant, tu n'as point d'esprit, me firent ils, les ames ne sont pas comme nous, elles ne voyent goutte pendant le iour, & voyent fort clair pendant la nuit, leur iour est dans les tenebres de la nuit, & leur nuit dans la clarte du iour.

En quatriesme lieu, à quoy chassent ces pauvres ames pendant la nuit? elles chassent aux ames des Castors, des Porcs epics, des Esflans, & des autres animaux, se seruās de l'ame des raquettes, pour marcher sur l'ame de la neige, qui est en ce pays là: bref elles se seruent des ames de toutes choses, comme nous nous seruōs icy des choses mesmes. Or quant elles ont tué l'ame d'un Castor, ou d'un autre animal, ceste ame meurt elle tout a faict, ou bien a elle vne autre ame qui s'en aille en quelque

62 *Relation de la Nouvelle France*,
autre village. Mon forcier demeura
court à cette demande; & cōme il a de
l'esprit, voyant qu'il s'alloit enfermer
s'il me respōdoit directemēt, il esquiva
le coup: car s'il m'eut dit que l'ame
mouroit entierement, ie luy au-
rois dit que quand on tuoit premie-
rement l'animal, son ameouroit à
mesme temps: s'il m'eust dit que
ceste ame auoit vne ame qui s'en al-
loit en vn autre village, ie luy eusse fait
voir que chaque animal auroit selon sa
doctrine plus de vingt, voire plus de
cent ames, & que le mōde deuoit estre
remply de ces villages où elles se reti-
rent, & que cepēdāt on n'en voyoit au-
cun. Cognoissant dōc qu'il s'alloit en-
gager, il me dit, tais toy, tu n'as point
d'esprit, tu demande des choses que tu
ne sçais pas toy-mesme, si i'auois esté en
ces pays-là, ie te respondrois.

En fin ie luy dis que les Europeans
nauigeoient par tout le monde, ie leur
declaray, & leur fis voir par vne figure
ronde, quel estoit le pays où le soleil se
couche à leur regard, l'assurant qu'on
n'auoit point trouué ce grand village,
que tout celan'étoit que refueries, que
les ames des hommes seulement estoient

immortelles, & que si elles estoient bō-
nes, elles s'en alloient au ciel, que si el-
les estoient meschantes, elles descen-
doient dans les enfers pour y estre brû-
lées à iamais, & que chacun receuroit
selon ses œuures. En cela, dit-il, vous
mentez vous autres, d'assigner diuers
endroits pour les ames, elles vont en
vn mesme pays, du moins les nostres
car deux ames de nos cōpatriotes sont
reuenues autresfois de ce grand villa-
ge, & no^r ont appris tout ce que iet'ay
dit, puis elles s'en retournerent en leur
demeure: ils appellent la voye lactée,
Tchipai meskenau, le chemin des ames,
pource qu'ils pensent que les ames se
guident par cette voye pour aller en
ce grand village.

Ils ont en outre vne grande croyāce
à leurs songes, s'imaginans que ce qu'ils
ont veu en dormant doit arriuer, &
qu'ils doiuent executer ce qu'ils ont
resué: ce qui est vn grand malheur, car
si vn Sauuage songe qu'il mourra s'il ne
me tuë, il me mettra à mort à la premie-
re rencontre à l'escart. Nos Sauuages
me demandoiēt quasi tous les matins,
n'as-tu point veu de Castors, ou d'O-

64 *Relation de la Nouvelle France,*
rignac en dormant : & cōme ils voyoiēt
que ie me mocquois des songes, ils s'e-
stonnoient, & me demandoient à quoy
crois-tu donc, si tu ne crois à tes songes?
ie crois en celuy qui a tout fait, & qui
peut tout; tu n'as point d'esprit, com-
ment peus-tu croire en luy, si tu ne le
vois pas? Ie ferois trop long de rappor-
ter toutes les badineries sur ces sujets,
reuenons à leurs superstitions qui sont
sans nombre.

Les Sauvages sont grands chanteurs,
ils chantent comme la pluspart des na-
tions de la terre par recreation, & par
deuotion; c'est à dire en eux par supersti-
tion : Les airs qu'ils chantent par plaisir
sont ordinairement graues & pesants, il
me semble qu'ils ont par fois quelque
chose de gay, notamment les filles: mais
pour la pluspart, leurs chansons sont
massiues, pour ainsi dire, sombres, & mal-
plaisantes : ils ne sçauent que c'est d'as-
sembler des accorts pour composer vne
douce harmonie : Ils proferent peu de
paroles en chantant, variants les tons, &
non la lettre. I'ay souuent ouy mon
Sauuage faire vne longue chanson de
ces trois mots *Kaie, nir, khigatoutaouim,*
& tu

& tu feras aussi quelque chose pour moy: Ils disent que nous imitons les gazouillis des oyseaux en nos airs, ce qu'ils n'improuent pas, prenans plaisir quasi tous tant qu'ils sont à chanter, ou à ouïr chanter, & quoy que ie leur die que ie n'y entendois rien, ils m'inuitoient souuent à entonner quelque air, ou quelque priere.

Pour leurs châtis superstitieux, ils s'en seruent en mille actions, le forcier & ce viellard, dont j'ay parlé, m'en donnerent la raison: deux Sauvages, disoient ils, estans jadis fort desolés, se voyans à deux doigts de la mort faute de viure, furent aduertis de chanter, & qu'ils seroient secourus; ce qui arriua, car ayans chanté, ils trouuerent à manger: de dire qui leur donna cest aduis, & comment, ils n'en sçauent rien: quoy que s'en soit, depuis ce temps là toute leur religion consiste quasi à chanter, se seruans des mots les plus barbares qu'ils peuuent rencontrer: Voicy vne partie des paroles qu'ils chanterent en vne longue superstition qui dura plus de quatre heures, *Aiasé manitou, aiasé manitou, aiasé manitou, ahiham, hehinham,*

*banhan, heninakhé hojé heninakhé, enigo-
uano bahano anihé ouihini naninaouai nana-
houai nanahouai aouihé ahahé aouihé:* Pour
conclusion, *ho! ho! ho!* Je demanday
que vouloient dire ces parolles, pas
vn ne m'en peut donner l'interpreta-
tion: car il est vray que pas vn d'eux
n'entend ce qu'il chante, sinon dans
leurs airs, qu'ils chantent pour se
recréer.

Ils joignent leurs tambours à leurs
chants, ie demanday l'origine de ce
tambour, le veillard me dit, que peut
estre quelque vn auoit eu en songe qu'il
estoit bon de s'en seruir, & que delà l'v-
sage s'en estoit ensuiuy. Je croirois plu-
stost qu'ils auroient tiré cette supersti-
tion des peuples voisins, car on me dit
(ie ne sçay s'il est vray) qu'ils imi-
tent fort les Canadiens qui habitent
vers Gaspé, peuple encore plus super-
stitieux que celui-cy.

Au reste, ce tambour est de la gran-
deur d'un tambour de basque, il est
composé d'un cercle large de trois ou
quatre doigts, & de deux peaux roi-
dement estenduës de part & d'autre: ils
mettent dedans des petites pierres ou

petits callious pour faire plus de bruit: le diametre des plus grands tambours est de deux palmes ou environ, ils le nomment *chichigouan*, & le verbe *ni-pagahiman*, signifie ie fais iouer ce tambour: ils ne le battent pas comme font nos Europeans: mais ils le tournent & remuent, pour faire bruire les caillous qui sont dedans, ils en frappent le terre, tantost du bord, tantost quasi du plat, pendant que le forcier fait mille fingeries avec cest instrument. Souuent les assistans ont des batons en mains, frappant tous ensemble sur des bois, ou manches de haches qu'ils ont deuant eux, ou sur leurs *ou-ragans*, c'est à dire, sur leurs plats d'escorce renuersés: Avec ces tintamarres, ils ioignent leurs chants & leurs cris, ie dirois volontiers leurs hurlements, tant ils s'efforcent par fois, ie vous laisse à penser la belle musique: ce miserable forcier avec lequel mon hoste, & le renegat, m'ont fait hiuerner contre leurs promesses, m'a pensé faire perdre la teste avec ses tintamarres: car tous les iours à l'entrée de la nuit, & bien souuent sur la minuit, d'autre-

fois sur le iour il faisoit l'enragé. I'ay esté vn assez long temps malade parmi eux, mais quoy que ie le priaſſe de se moderer, de me donner vn peu de repos, il en faisoit encore pis, esperant trouuer sa guerison dans ces bruits qui augmentoient mon mal.

Ils se seruent de ces chants, de ce tambour, & de ces bruits, ou tintamarres en leurs maladies, ie le declaray assez amplement l'an passé, mais depuis ce temps là, i'ay veu tant faire de sottises, de niaiseries, de badineries, de bruits, de tintamarres à ce malheureux forcier pour se pouuoir guerir, que ie me lasserois d'escrire & ennuierois vostre reuerence, si ie luy voulois faire lire la dixiesme partie de ce qui m'a souvent lassé, quasi iusques au dernier poinct. Par fois cest homme entroit comme en furie, chantant, criant hurlant, faisant bruire son tambour de toutes ses forces: cependant les autres hurloient comme luy, & faisoient vn tintamarre horrible avec leurs bastõs, frappans sur ce qui estoit deuant eux: ils faisoient danser des ieunes enfans, puis des filles, puis des femmes; il bais-

soit la teste, souffloit sur son tambour: puis vers le feu, il siffloit comme vn serpent, il ramenoit son tambour sous son menton, l'agitant & le tournoyant: il en frappoit la terre de toutes ses forces, puis le tournoyoit sur son estomach: il se fermoit la bouche avec vne main renuerlée, & de l'autre, vous eussiez dit qu'il vouloit mettre en pieces ce tambour, tant il en frappoit rudement la terre: il s'agitoit, il se tournoit de part & d'autre, faisoit quelques tours à l'entour du feu, sortoit hors la cabane, tousiours hurlant & bruyant: il se mettoit en mille postures; & tout cela pour se guerir. Voila comme ils traictent les malades. I'ay quelque croyance qu'ils veulent coniuurer la maladie, ou espouuanter la femme du Manitou, qu'ils tiennent pour le principe & la cause de tous les maux, comme i'ay remarqué cy dessus.

Ils chantent encore & font ces bruits en leurs sueries, ils croiroient que cette medecine, qui est la meilleure de toutes, celles qu'ils ont ne leur seruiroit de rien, s'ils ne chantoient en suant: Ils plantent des bastons en terre faisant

70 *Relation de la Nouvelle France,*
vne espee de petit tabernacle fort
bas : car vn grand homme estant assis
là dedans, toucheroit de sa teste le
hault de cet odis, qu'ils entourent &
couurent de peaux, de robes, de cou-
uertes : Ils mettent dans ce four
quantité de grosses pierres qu'il ont
faict chauffer, & rougir dans vn bon
feu, puis se glissent tous nuds dans ces
estuues, les femmes suent par fois
aussi bien que les hommes : d'autre-
fois ils suent tous ensemble, hommes,
& femme pelle & melle : ils chantent,
ils crient, ils hurlent dans ce four, ils
haranguent : par fois le forcier y bat
son tambour. Je l'escoutois vne fois
comme il faisoit du prophete là de-
dans, s'escriant qu'il voyoit des Ori-
gnaux, que mon hoste son frere en-
tueroit, ie ne peus me tenir que ie ne
luy disse, ou plustost à ceux qui estoient
presens, & qui luy prestoient l'oreille
comme à vn oracle, qu'il estoit bien
croyable qu'on trouueroit quelque
masle, puisque on auoit desia trouué
& tué deux femelles, luy cognoissant
où ie visois, me dit en grondant, il est

croyable que cette robe noire n'a point d'esprit : Ils sont tellement religieux en ces crieries, & autres niaiseries, que s'ils font sueries pour se guerir, ou pour auoir bonne chasse, ou pour auoir beau temps, rien ne se feroit s'ils ne chantoient, & s'ils ne gardoient ces superstitions. I'ay remarqué que quand les hommes suent, ils ne se veulent point seruir des robes des femmes pour entourer leur sueries, s'ils en peuuent auoir d'autres: bref quand ils ont crié trois heures ou enuiron dans ces estuues, ils en sortent tous mouillés & trempés de leur sueur.

Ils chantent encore & battent le tambour en leur festins, comme ie declareray au chapitre de leurs banquets: ie leur ay veu faire le mesme en leurs conseils, y entremellant d'autres iongleries: Pour moy ie me doute que le sorcier en inuente tous les iours de nouuelles pour tenir son monde en haleine; & pour se rendre recommandable: ie luy vis vn certain iour prédre vne espée, la mettre la pointe en bas, le manche en hault (car leurs espées

72 *Relation de la Nouvelle France,*
sont emmanchées à vn long baston) il
mit vne hache proche de cette espée,
seleu debout, fit iouer son tambour,
chanta hurla à son accoustumée , il
fit quelques mines de dancier, tourna
à l'entour du feu : puis se cachant , il
tira vn bonnet de nuit, dans lequel il
y auoit vne pierre à esguiser, il la met
dans vne cullier de bois , qu'on effuya
exprés pour cest effect, il fit allumer
vn flambeau d'escorce, puis donna de
main en main le flambeau, la cueiller,
& la pierre, qui estoit marquée de quel-
ques raies , la regardans tous les vns
apres les autres, philosopphant à mon
aduis sur cette pierre, touchant leur
chasse, qui estoit le subiect de leur con-
seil ou assemblée.

Ces pauvres ignorants chantent
aussi dans leurs peines , dans leurs dif-
ficultez, dans leurs perils & dangers:
pendant le temps de nostre famine,
ie n'entendois par ces cabanes, notã-
ment la nuit, que chants, que cris,
battements de tambours , & autres
bruits: & demandant ce que c'estoit,
mes gens me disoient qu'ils faisoient

cela pour auoir bonne chasse, & pour trouuer à manger, leurs chants & leurs tambours passent encore dans les sortileges que font les forciers.

Il faut que ie couche icy, ce que ie leurs vis faire le douxième Feurier, comme ie recitois mes heures sur le soir, le forcier se mit à parler de moy *aiamiheou*, il fait ses prieres, dit-il: puis prononçant quelques paroles, que ie n'entendis pas, il adiousta *Niganipahau*; ie le tueray aussi tost: la pensée me vint qu'il parloit de moy, veu qu'il me haïssoit pour plusieurs raisons, comme ie diray en son lieu: mais notamment pour ce que ie taschois de faire veoir que tout ce qu'il faisoit n'estoit que badinerie & puerilité: Sur cette pensée qu'il me vouloit oster la vie, mon hoste me va dire, n'as tu point de poudre qui tuë les hommes? pourquoy, luy dis-je, ie veux tuer quelqu'un, me respond il? ie vous laisse à penser si i'acheuay mon office sans distraction, veu que ie scauois fort bien qu'ils n'auoient garde de faire mourir aucun de leurs gens, & que le forcier m'auoit menacé de mort

74 *Relation de la Nouvelle France,*
quelques iours auparauant, quoy qu'en-
riant, me dit il apres: mais ie ne m'y fiois
pas beaucoup, voyant donc ces gens en
action, ie r'entre dans moy-mesme,
suppliant nostre Seigneur de m'assister,
& de prendre ma vie au moment & en
la façon, qu'il luy plairoit: neantmoins
pour me mieux disposer à ce sacrifice,
ie voulus voir s'ils pensoient en moy,
ie leur demanday donc où estoit l'hom-
me qu'ils vouloient faire mourir, ils me
repartent qu'il estoit vers Gaspé à plus
de cens lieuës de nous. Ie me mis à rire,
car en verité ie n'eusse iamais pensé qu'ils
eussent entrepris de tuer vn homme de
cens lieuës loin. Ie m'enquis pourquoy
ils luy vouloient oster la vie. On me
respondit que cest homme estoit vn
forcier Canadien, lequel ayant eu quel-
que prise avec le nostre, l'auoit menacé
de mort, & luy auoit donné la maladie,
qui le trauailloit depuis vn long temps,
& qui l'alloit estouffer dans deux iours,
s'il ne preuenoit le coup par son art: ie
leurs dis que Dieu auoit deffendu de
tuer, & que nous autres, ne faisons
mourir personne: cela n'empescha point

qu'ils ne poursuiussent leur pointe. Mon
 hoste preuoiant le grand bruit qui se
 deuoit faire, me dit, tu auras mal à la
 teste, va t'en en l'autre cabane voisine:
 non, dit le forcier, il n'y a point de mal
 qu'il nous voye faire. On fit sortir tous
 les enfans & toutes les femmes, horsmis
 vne qui s'assit aupres du forcier: Je de-
 meuray donc spectateur de leurs myste-
 res, avec tous les Sauvages des autres
 cabanes qu'on fit venir: Estans tous
 assis, voicy vn ieune homme qui ap-
 porte deux paux ou pieux fort pointus,
 mon hoste prepare le fort composé de
 petits bois formez en langue de ser-
 pēt des deux costez, de fers de flesches,
 de morceaux de cousteaux rompus,
 d'vn fer replié comme vn gros hame-
 çon, & d'autres choses semblables, on
 enuelopa tout cela dans vn morceau
 de cuir: Cela fait, le forcier prend son
 tambour, tous se mettent à chanter &
 hurler, & faire le tintamarre que i'ay re-
 marqué cy dessus: apres quelques chan-
 sons, la femme qui estoit demeurée se
 leue, & tourne tout à l'entour de la ca-
 bane par dedans, passant par derriere le

76 *Relation de la Nouvelle France,*
dos de toustant que nous estions. S'estant rassise, le magicien prend ces deux pieux, puis designant certain endroit, commence à dire; voila la teste (ie crois qu'il entendoit de l'homme qu'il vouloit tuer) puis de toutes ces forces, il plante ces pieux en terre, les faisant regarder vers l'endroiect, où il croioit qu'estoit ce Canadien. Là dessus mon hoste va ayder son frere, il fait vne assez grande fosse en terre avec ces pieux : cependant les chants & autres bruits continuoient incessamment. La fosse faite, les pieux plantez, le valet du forcier, i'entens l'Apostat, va querir vne espée, & le forcier en frappe l'un de ces paux, puis descend dans la fosse, tenant la posture d'un homme animé qui tire de grands coups d'espée & de poignard; car il auoit l'un & l'autre dans cette action d'homme furieux & enragé. Le forcier prend le sort envelopé de peau, le met dans la fosse, & redouble les coups d'espée à mesme temps qu'on redoubloit le tintamarre.

En fin ce mystere cessa, il retire l'espée & le poignard tout ensanglanté, les iette deuant les autres Sauvages; on re-

couvre vistela fosse, & le magicien tout glorieux, dit que son homme est frappé, qu'il mourra bien tost, demande si on n'a point entendu ses cris : tout le monde dit que non, horsmis deux ieunes hommes ses parens, qui disent auoir ouy des plaintes fort sourdes, & comme de loing. O qu'ils le firent aise, se tournant vers moy, il se mit a rire, disant, voyez cette robe noire qui nous vient dire qu'il ne faut tuer personne: Comme ie regardois attentiuement l'espée & le poignard, il me les fit presenter, regarde, dit-il, qu'est cela; c'est du sang, repartis-je, de qui? de quelque Orignac ou d'autre animal, ils se mocquerent de moy, disants que c'estoit du sang de ce Sorcier de Gaspé; comment, dis je, il est à plus de cent lieuës d'icy? il est vray font-ils, mais c'est le Manitou, c'est à dire le Diable, qui apporte son sang pardeffous la terre. Or si c'est hōme est vraiment Magicien, ie m'en rapporte, pour moy i'estime qu'il n'est ny Sorcier ny Magicien, mais qu'il le voudroit bien estre: tout ce qu'il faict selon ma pensée n'est que badinerie,

78 *Relation de la Nouvelle France* ;
pour amuser les Sauvages, il voudroit
bien auoir communication avec le
Diable ou Manitou, mais ie ne crois
pas qu'il en ait: si bien me persuaday-
je, qu'il y a eu icy quelque Sorcier, ou
quelque Magicien s'il est vray ce qu'ils
disent des maladies & des guerisons,
dont ils me parlent: c'est chose estran-
ge, que le Diable qui apparoit sensi-
blement aux Ameriquains Meridio-
naux, & qui les bat & les tourmente
de telle sorte, qu'ils se voudroient bien
deffaire d'un tel hoste, ne se commu-
nique point visiblement ny sensible-
ment à nos Sauvages, selon ce que ie
crois. Je sçais qu'il y a des personnes
d'opinion contraire, croyans aux rap-
ports de ces Barbares, mais quand ie
les presse, ils m'aduouent tous, qu'ils
n'ont rien veu de tout ce qu'ils disent,
mais seulement qu'ils l'ont ouï dire à
d'autres,

Ce n'est pas le mesme des Ameri-
quains Meridionaux, nos Europeans
ont ouï le bruit, la voix & les coups
que ruë le Diable sur ces pauvres esclaves:
& un François digne de creance,

m'a asseuré l'auoir ouïy de ses oreilles: surquoy on me rapporte vne chose tres remarquable, c'est que le Diable s'enfuit, & ne frappe point ou cesse de frapper ces miserables, quand vn Catholique entre en leur compagnie, & qu'il nelaisse point de les battre en la presence d'un Huguenot, d'où vient qu'un iour se voyans battus en la compagnie d'un certain François, ils luy dirent, nous nous estonnons que le diable nous batte, toy estant avec nous, veu qu'il n'oseroit le faire quand tes compagnons sont presents. Luy se douta incontinent que cela pouuoit prouenir de sa religion, (car il estoit Calviniste) s'adressant donc à Dieu, il luy promist de se faire Catholique si le diable cessoit de battre ces pauvres peuples en sa presēce: Le vœu fait, iamais plus aucun Demon ne molesta Amariquain en sa compagnie, d'où vient qu'il se fist Catholique, selon la promesse qu'il en auoit faicte; mais retournons à nostre discours. L'ay veu deux autrefois faire les mesmes sortileges à nostre Magicien pretendu, &

80 *Relation de la Nouvelle France,*

garda toutes les ceremonies susdites, hormis qu'il changea de sort, car vne fois il se seruit de quatre bastons faits en forme de fuseaux à filer, sinon qu'ils estoient plus gros, & qu'ils auoient comme des dents en certains endroits: Il se seruit encore du bout de la queue & du pied d'un Porc épic, & quelques poils d'Orignac, ou de Porc épic, liez ensemble en petit faisceau: l'autre fois il se seruit encore de ces fuseaux, d'un pied de Porc épic, ou d'un autre animal, d'os de quelque beste, d'un fer semblable, & celuy qu'il attache à vne porte pour la tirer, & de quelques autres badineries: son valet le renegat luy tenant tout cela prest, & battant le tambour pendant que son Maistre estoit occupé dans la fosse. Voila vne partie des actions esquelles se retrouuent leurs chants, leurs cris, hurlemens & tintamarres.

Leur Religiō, ou pluystost superstitiō, consiste encore à prier: mais, ô mon Dieu! quelles oraisons font ils? Le matin les petits enfans sortans de la Cabane, s'escrient à pleine teste, *Cacouakhi,*
Pakhais,

Pakhais Amiscouakhi, Pakhais Mousouakhi,
Pakhais: venez Porcs-épics, venez Ca-
stors, venez Elans, voila toutes leurs
prieres.

Les Sauvages eternuans, & quel-
quefois mesme en autre temps, disent
pendant l'Hiver, criants tout haut
Etouctaian miraouinam an Mirouscamixhi,
ie serois bien aise de voir le Prin-
temps.

D'autrefois ie leur ay oüy demãder
le Printemps, ou la deliurance du mau-
uais, & autres choses semblables; &
tout cela se faiet par desirs qu'ils ex-
priment, criants tant qu'ils peuuent,
ie serois bien aise que ce iour conti-
nuast, que le vent se changeast, &c. De
dire à qui ces souhaits s'adressent, ie ne
sçauois, car eux mesmes ne le sçauent
pas, du moins ceux à qui ie l'ay de-
mandé ne m'en ont pû instruire.

J'ay remarqué cy-dessus qu'ils prient
Le Manitou de ne point ietter les yeux
sur leurs ennemis, afin qu'ils les puis-
sent tuer: voila toutes les prieres &
oraisons que j'ay oüy faire aux Sauva-
ges, ie ne sçay s'ils en ont d'autres, ie

ne le crois pas. O que ie me sentoie riche & heureux parmy ces Barbares, d'auoir vn Dieu à qui ie peusse adresser mes souhaits, mes prieres & mes vœux! & qu'ils sont miserables de n'auoir point d'autres desirs, que pour la vie presente! I'oublioie à dire icy, mais ie l'ay couché cy-dessus, qu'ils ont vne Image ou espee de sacrifice, car ils iettent au feu de la gresse qu'ils recueillent sur la chaudiere où cuit la viande, faisant cette priere *Papeouekou, Papeouekou*, faictes nous trouuer à manger, faictes nous trouuer à manger: ie crois qu'ils adressent cette oraison à leur *Khichekouai*, & peut-estre encore les autres; voicy vne superstition qui m'a bien ennuyé.

Le vingt-quatriesme de Nouembre, le Sorcier assembla les Sauvages, & se retrancha avec des robes & des couuertes en vn quartier de la Cabane; en sorte qu'on ne le pouuoit voir, ny les compagnons: il s'y trouua vne femme avec eux qui marquoit sur vn baston triangulaire long de demie picque, toutes les chansons qu'ils disoient, ie

priay vne femme de me dire ce qu'ils faisoient dans ces retranchemens, elle me respondit qu'ils prioient, mais ie croy qu'elle me fist cette respõse, pour ce que quand ie faisois oraison, eux me demandans ce que ie faisois, ie leurs disois, *Nataïamibian misî ca Kbi-chitât*, ie prie celuy qui a tout faict: & ainsi quand ils chantoient, quand ils hurloient, battans leurs tambours & leurs bastons, ils me disoient qu'ils faisoient leurs prieres, sans me pouuoir expliquer à qui ils les adressoient. Le renegat m'a dit que ceste superstition, qui dura plus de cinq heures, se faisoit pour vn mort, mais comme il ment plus souuent qu'il ne dit vray, ie m'en rapporte à ce quien est: ils appellent cette superstition *Ouechibouan*, en suite de ces longues oraisons, le Sorcier donna le patron d'un petit sac couppe en forme de jambe à vne femme pour en faire vn de cuir, qu'elle remplit à mon aduis de poil de Castor, car ie maniaay cette jambe qui me sembla molasse, & pleine d'un poil assez doux, ie demanday prou ce que c'e-

estoit, & pourquoy on faisoit ce petit sac tortu, mais iamais on ne me le voulut dire. Le sçeu seulement qu'ils l'appelloient *Manitoukathi*, c'est à dire, jambe du Manitou, ou du Diable; elle fut long temps pendue dans la Cabane au lieu où s'asseoit le Sorcier; depuis on la donna à vn ieune homme pour la porter pendue au col, elle estoit des appartenances de ces longues prieres, que ie viens de coter, mais ien'ay peu sçauoir à quel dessein cela se faisoit.

Ils gardent par fois encore vn ieusne fort rigoureux, non pas tous, mais quelques vns qui ont enuie de viure long temps; mon hoste voyant que ie ne mangeois qu'une fois pendant le Carême, me dit que quelques vns d'entre eux ieusnoient pour auoir vne longue vie; mais m'adjousta qu'ils se retiroyent tous seuls dans vne petite Cabane à part, & que là ils ne beuuoyent ny māgeoient, quelquefois huit iours, quelquefois dix iours durant: d'autres m'ont dit qu'ils sortent comme des squelets de cette Cabane, & que par

fois on en rapporte à demy-morts, ie n'ay point veu de ces grands ieusneurs, si bien de grāds disneurs: vray est que ie n'ay point de peine à croire cét excez, car toutes les fausses religions sont pleines de puerilitez, ou d'excés, ou de saletez.

I'ay veu faire vne autre deuotion au Sorcier, laquelle, comme ie crois, n'appartient qu'à ceux de sa profession; on luy dresse vne petite Cabane esloignée d'un jet de pierre ou de deux des autres, il se retire là dedans pour y demeurer seul huit iours, dix iours, ou plus ou moins: Or vous l'entendez iour & nuict crier, hurler, & battre son tambour; mais il n'est pas tellement solitaire, que d'autres ne luy aillent aider à chanter, & que les femmes ne le visitent, c'est là où il se commet de grandes saletez.

Les Sauvages sont encore fort Religieux enuers leurs morts; mon hôte, & le vieillard dont i'ay souuent fait mention, m'ont confirmé ce que i'ay desja escrit vne autrefois, que le corps mort du deffunct ne sort point par la

86 *Relation de la Nouvelle France,*
porte ordinaire de la Cabane, ains on
leue l'escorce de l'endroiect où l'hom-
est mort, pour faire passer son cada-
ure.

De plus, disent ils, l'ame sort par la
cheminée, ou par l'ouuerture qu'ils
font au haut de leurs todis, ils frap-
pent à coups de baston sur leurs Caba-
nes, afin que cette ame ne tarde point,
& qu'elle ne s'accoste de quelque en-
fant, car elle le feroit mourir: ils en-
terrent les robbes, les chaudieres, &
autres meubles avec le trespassé, pour-
ce qu'ils l'ayment, & afin aussi qu'il se
ferue de l'ame de toutes ces choses en
l'autre vie. Ils iettent comme i'ay des-
ja dit, la meilleure viande qu'ils ayent
au feu, pour en donner à manger à l'a-
me du deffunct, qui mangel'ame de
ces viandes: ils n'estendent point les
corps de leur long comme nous fai-
sons les enseuellissants, mais ils les ac-
croupissent & accourcissent comme
vne personne qui est assise sur les ta-
lons: ils couppent vn petit touffet de
cheueux du deffunct, pour presenter à
son plus proche parent. Je n'en scay

pas la raison. Mais faisons vne autre liste de leurs superstitions & de leur ignorance, celles que ie viens de rapporter, concernent en quelque façon leur religion ridicule; les suivantes le peuuent proprement appeller superstitions.

Les Sauvages ne iettent point aux chiens les os des Castors, Porcs épics femmelles, du moins certains os de terminez; bref ils pennent garde tres-soigneusement que les chiens ne mangent aucun os des oyseaux & des autres animaux qui se prennent au lacs, autrement ils n'en prendront plus qu'avec des difficultez incomparables: encore y a-il là dedans mille obseruations, car il n'importe que les vertebres ou le croupion de ces animaux soient données aux chiens, pour le reste il faut le jetter au feu; route fois pour le Castor pris à la rets, c'est le meilleur de ietter ses os dans vn fleuve, c'est chose estrange qu'ils recueillent & ramassent ces os, & les conseruent avec tant de soin, que vous diriez que leur chasse seroit perduë s'ils auoient

contrevenu à leurs superstitions: comme ie me mocquois d'eux, & que ie leurs disois que les Castors ne sçauoient pas ce que l'on faisoit de leurs os; ils me respondirent, tu ne sçais pas prendre les Castors, & tu en veux parler: deuant que le Castor soit mort tout à fait, me dirent-ils, son ame vient faire vn tour par la Cabane de celuy qui le tuë, & remarque fort bien ce qu'on fait de ses os; que si on les donnoit aux chiens, les autres Castors en feroient aduertis: c'est pourquoy ils se rendroient difficiles à prendre, mais ils sont bien aises qu'on iette leurs os au feu, ou dans vn fleuve, la rets notamment qui les a pris en est bien contente. Je leur dis que les Hiroquois au rapport de celuy qui estoit avec nous, iettoient les os de Castor aux chiens, & cependant qu'ils en prenoient fort souuent, & que nos François prenoient du gibier plus qu'eux (sans comparaison) & que neantmoins nos chiens en mangeoient les os, tu n'as point d'esprit, me firent-ils, ne vois tu pas que vous & les Hiroquois cultiuez la terre

& en recueillez les fructs, & non pas nous, & partant que ce n'est pas la mesme chose: ie me mis à rire entendant cette responce impertinente; le mal est que ie ne fais que beguayer, que ie prends vn mot pour l'autre, que ie prononce mal, & ainsi tout s'en va le plus souuent en risée; Que c'est vne grande peine de parler à vn peuple sans l'entendre. De plus, en leurs festins à manger tout, il faut bien prendre garde que les chiens n'en goustent tant soit peu, mais de cecy en vn autre chapitre.

Ils croyent que la gresle a del'esprit & de la connoissance, comme mon hoste faisoit festin pendant cet Hiuer, il dit à vn ieune homme, va t'en aduertir les Sauvages de l'autre Cabane qu'ils viennent quand ils voudront que tout est prest, mais ne porte point de flambeau, il estoit nuict & il gresloit fort & ferme: i'entends aussi les Sauvages sortans de leurs Cabanes, s'écrier à leurs gens, ne nous éclairez point, car il gresle. Je demanday par apres la raison de cela, on me respōdit que la grêle auoit de l'esprit, & qu'elle haïssoit

la lumiere, ne venant ordinairement que sur la nuit: que si on portoit des flambeaux dehors, elle cesseroit, dont ils feroient bien marris, car elle sert à prendre l'Originac. Voila des gens bien entendus aux meteoires, ie leur dis que la gresle n'estoit autre chose que l'eau de la pluye, qui se congeloit par la froidure, laquelle s'augmentât sur la nuit par l'eloignement du Soleil, il gresloit plustost qu'en plein midy: ils me repartirent à l'ordinaire, tu es vn ignorant, ne vois tu pas qu'il a fait froid tout le iour, & que la gresle a attendu la nuit pour venir; Je voulus repartir que la nuée n'estoit pas encore disposée, mais on me dit *eca titou eca titou nama Khitirinisin*, tais toi, tais toi, tu n'as pas d'esprit: voila la monnoye dont ils me payent, & dont ils payent bien souuent les autres sans s'alterer. Mon hoste coupoit par superstition le bout de la queue de tous les Castors qu'il prenoit, & les enfiloit ensemble. Je demanday pourquoy, le vieillard me dit, c'est vne resolution ou vne promesse qu'il a fait, afin de prendre beaucoup de Castors, de sçauoir à qui il fait ce vœu

ny luy, ny moy ne le sçaurions dire.

Ils mettent au feu vn certain os plat de Porc epic, puis ils regardent à la couleur s'ils feront bonne chasse de ces animaux.

Quand quelqu'un de leurs gens s'est egaré dans les bois, voyans qu'il ne retourne point en la Cabane, ils pendent vn fusil à vne perche pour le redresser; & cela fait, me disoient ils, qu'il voye du feu, & qu'il reconnoisse son chemin: quand vn esprit s'est vne fois egaré du chemin de la verité, il donne bien auant dans l'erreur.

Mais à propos de leur fusil, ie diray icy qu'il n'est pas fait comme les nôtres; ils ont pour meche la peau d'une cuisse d'un aigle, avec le duvet qui prend feu aisement, ils battent deux pierres de mine ensemble, comme nous faisons vne pierre à fusil, avec vn morceau de fer ou d'acier: au lieu d'allumettes, ils se seruēt d'un petit morceau de tondre, c'est vn bois pourry & bien seché, qui brusle aisement & incessamment iusques à ce qu'il soit consommé: ayant pris feu ils le mettent dans l'escorce de Cedre puluerisée, & soufflant

doucement cette écorce s'enflamme. Voila comme ils font du feu. J'auois porté vn fusil françois avec moy, & cinq ou six allumettes, ils s'estonnoient de la promptitude avec laquelle i'allumois du feu, le mal fut que mes allumettes furent bien tost vſées, ayant manqué d'en porter vn peu dauantage.

Ils ont encore vne autre espece de fusil, ils tournent vn petit baston de Cedre, de ce mouuement fort du feu qui allume du tondre: mais comme ie n'ay point veu l'vsage de ce fusil plus familier aux Hurons qu'aux Montagnais, ie n'en diray pas dauantage.

Quand quelqu'un d'eux a pris vn Ours, il y a bien des ceremonies deuant qu'il soit mangé, vn de nos gens en prit vn. Voicy ce qu'on obserua.

Premierement l'Ours estant tué, celui qui l'a mis à mort ne l'apporte point, mais il s'en reuient à la Cabane en donner la nouuelle, afin que quelqu'un aille voir la prise comme chose precieuse; car les Sauvages preferent la chair d'Ours à toutes leurs autres viandes: il me semble que le ieune Castor ne luy cede en rien, mais l'Oursa

plus de graisse. Voila pourquoy il est plus aimé des Sauvages.

Secondement l'Ours a porté toutes les filles nubiles, & les ieunes femmes mariées qui n'ont point encore eu d'enfans, tant celles de la Cabane où l'Ours doit estre mangé, que des autres voisines, s'en vont dehors, & ne rentrent point tant qu'il y reste aucun morceau de cet animal, dont elles ne goustent point: Il ne geoit & faisoit vn temps fort fascheux, il estoit quasi nuit quand cet Ours fut apporté en nostre Cabane: tout à l'heure les femmes & les filles sortirent, & s'en allerent Cabaner ailleurs le mieux quelles peurent non sans patir beaucoup, car ils n'ont pas tousiours des écorces à leur commandement pour dresser leur maison, qu'ils couvrēt en tel cas de brāches de Sapin.

En troisieme lieu, il faut bien éloigner les chiens, de peur qu'ils ne lèchent le sang, ou ne mangent les os, voire les excremens de cette beste, tant elle est chérie. On enterre ceux-cy sous le foyer, & on iette ceux-là au feu; voila ce que j'observay en cette superstition. On fit deux banquets de cet Ours,

l'ayant fait cuire en deux chaudieres, quoy qu'en mesme temps. On invita les hōmes & les femmes âgées au premier festin, lequel acheué, les femmes sortirent, puis on depēdit l'autre chaudiere, dont on fit festin à manger tout entre les hommes seulement. Cela se fit le soir de la prise ; le lendemain sur la nuict, ou le second iour, ie ne m'en souviens pas bien, l'Ours estant entierement mangé, les ieunes femmes, & les filles retournerent.

Si l'oiseau qu'ils nomment *Ouichcatchan*, qui est quasi de la grosseur d'une pie, & qui luy ressemble, (car il est gris aux endroicts que la pie est noire, & blanc ou elle est blanche) se presente pour entrer dans leur Cabane, ils le chassent fort soigneusement, pource disent ils, qu'ils auroient mal à la teste: ils n'ē dōnent point de raison, ils l'ont, si on les croit, experimenté, ie les ay veu prendre le gesier de cēt animal, le fendans & regardans dedans fort attentivement, mon hoste me dit, si ie trouue dedans vn petit os d'Originac (car cēt oyseau mange de tout) ie tueray vn Orignac, si ie trouue vn os d'Ours, ie

tueray vn Ours, & ainsi des autres animaux.

Dans la famine que nous auons enduré, nos Sauvages ne voulurent point manger leurs chiens, pource que si on tuoit vn chié pour le manger, vn hōme seroit tué à coups de hache, disoiēt-ils.

Mon hoste iettant quelques branches de pin dans le feu, il prestoit l'oreille au bruit qu'elles feroient en se bruslant, prononçant quelques paroles; ie luy demanday pourquoy il faisoit cette ceremonie, pour prendre des Porcs épics, me respond il, de dire quel rapport il ya de ces branches bruslées avec leur chasse, c'est ce qu'ils ne sçauent pas, & ne sçauoient sçauoir.

Ils ne mangent point la moëlle des vertebres, ou de l'espine du dos de quelque animal que ce soit, car ils auroient mal au dos, & s'ils fourroient vn baston dans ces vertebres, ils sentiroiēt vne douleur, comme si on le fichoit dans les leur. Je le faisois expres deuant eux pour les desabuser, mais vn mal d'esprit si grand, comme est vne superstition inueterée depuis tant de siecles, & succée avec le lait de la nour-

rice, ne se guerit pas en vn moment.

Ils ne mangent point les petits embrions d'Orignac, qu'ils tirent du ventre de leurs meres, sinon à la fin de la chasse de cét animal, la raison est que leurs meres les aiment, & qu'elles s'en rendroient fascheuses & difficiles à prendre, si on mangeoit leur fruit si ieune.

Ils ne reconnoissent que dix Lunes en l'année, j'entends la pluspart des Sauvages, car j'ay fait auouër au Sorcier qu'il y en auoit douze.

Ils croyent que la Lune de Feurier est plus lōgue de plusieurs iours que les autres, aussi la nomment ils la grande Lune; Je leur ay demanday d'où venoit l'Eclypse de Lune & de Soleil; ils m'ont respondu que la Lune s'éclypsoit ou paroissoit noire, à cause qu'elle tenoit son fils entre ses bras, qui empeschoit que l'on ne vist sa clarté. Si la Lune a vn fils, elle est mariée, ou l'a été, leur dis-je, ouÿ dea, me dirent ils, le Soleil est son mary qui marche tout le iour, & elle toute la nuict; & s'il s'éclypse, ou s'il s'obscurcit, c'est qu'il prend aussi par fois le fils qu'il a eu de
la

la Lune entre ses bras : ouïy, mais ny la Lune ny le Soleil n'ont point de bras, leur disois-je, tu n'as point d'esprit: ils tiennent tousiours leurs arcs bandés deuant eux, voila pourquoy leurs bras ne paroissent point; & sur qui veulent ils tirer? hé qu'en sçauons nous. Le leur demanday que vouloient dire ces taches qui se font voir en la Lune; tu ne sçay rié du tout, me disoient ils; c'est vn bonet qui luy couure la teste, & non pas des taches. Le m'enquis pourquoy le fils du Soleil & de la Lune n'estoit pas luisant comme ses parents, ains noir & obscur; nous n'en sçauons rien, me firent ils, si nous auions esté au Ciel nous te respondrions. Au reste ils croyent qu'il viét quelquefois en terre, & quand il se pourmene en leur pays, ils meurent en grand nōbre. Le leuray demandé s'ils n'auoiēt point veu de Cometes, ces Estoilles à longue queue, & ce que c'estoit; nous en auons veu, me dirent ils, c'est vn animal qui a vne grande queue, 4. pieds, & vne teste, nous voyons tous cela, disoiēt-ils.

Le les interrogeay sur le tonnerre, ils me dirent qu'ils ne sçauoient pas quel animal c'estoit, qu'il mangeoit les serpents

G



& quelquefois les arbres, que les Hurons croyent que c'est vn oiseau fort grand induit à cette créace, par vn bruit lourd que fait vne espee d'hirondelle qui paroist icy l'Esté: le n'ay point veu de ces oiseaux en France, i'en ay tenu icy, il a le bec, & la teste, & la figure du corps, cōme vne hirondelle, sinō qu'il est vn peu plus gros; il se pourmene le soir en l'air, faisant vn bruit pesāt par reprises. Les Hurons disent qu'il fait ce bruit du derriere, cōme aussi l'oiseau qu'ils pēsent estre le tōnerre, & qu'il n'y a qu'un seul hōme qui voye cēt oiseau, & encore vne fois en sa vie; c'est ce quem'ē dit mō vieillard.

Voila vne partie de leurs superstitiōs; que de poussiere dedans leurs yeux, & qu'il y aura de peine à la faire sortir, pour leur faire voir le beau iour de la verité. Je croy neātmoins, que qui sçauroit parfaitement leur langue, pour les payer promptement de bonnes raisons, qu'ils se mocqueroient eux-mesmes de leurs sottises: car par fois ie les rendois honteux & cōfus, quoy que ie ne parle quasi que par les mains, ie veux dire par signes.

Je veux conclurre ce chapitre par vn estōnement; on se plaint en France d'une

Messe, si elle passe vne demie heure; le Sermon limité d'une heure semble parfois trop long, à peine exerce l'on ces actes de Religion vne fois la semaine, & ces pauvres ignorants crient & hurlent à toute heure.

Le Sorcier les assemble souuent en plein minuit, à deux heures, à trois heures du matin, d'as vn froid qui gele tout; iour & nuit il les tient en haleine, employans, non vne ou deux heures, mais trois & quatre de suite, à faire leurs deuotions ridicules. On fait sortir les pauvres femmes de leurs Cabanes, se leuants en pleine nuit, emportants leurs petits enfans parmy les neiges chez leurs voisins. Les hommes harassés du trauail du iour, ayant peu mangé & couru fort long temps, au moindre cry qu'on leur fait quittent leur sommeil, & s'en viennent promptement au lieu où se fait le Sabbat, & ce qui semblera au delà de toute creance. I'en'ay iamais veu former aucune plainte parmy eux, ny aux femmes ny aux hommes, ny mesme aux enfans, chacun se montrant prompt & allai gre à la voix du Sorcier ou du jongleur, hélas! mon Dieu, les ames qui vous aiment se-

100 *Relation de la Nouvelle France,*
ront elles sans sentiment, voyants plus
de passion pour des folies, que pour la
verité? Beliak est-il plus aimable que Je-
sus? pourquoy d'oc est-il plus ardâment
aimé, obey plus promptement, & plus
deuotement adoré? mais passions outre.

*Des choses bonnes qui se trouuent dans
les Sauvages.*

CHAPITRE V.

SI nous commençons par les biens du
Scorps, ie diray qu'ils les possedēt avec
auantage: ils sont grands, droicts, forts,
bien proportionnez, agiles, rien d'effe-
miné ne paroist en eux. Ces petits Da-
moiseaux qu'on voit ailleurs, ne sont que
des hōmes en peinture, à comparaison
de nos Sauvages. I'ay quasi creu autre-
fois que les Images des Empereurs Ro-
mains representoient plustost l'idée des
peintres, que des hommes qui eussent ia-
mais esté, tant leurs testes sont grosses
& puillātes, mais ie voy icy sur les épau-
les de ce peuple les testes de Jules Cesar,
de Pompée, d'Auguste, d'Othon, & des
autres que i'ay veu en France, tirées sur

le papier, ou releuées en des medailles.

Pour l'esprit des Sauvages, il est de bonne trempe, ie croy que les ames sont toutes de mesme estoc, & qu'elles ne different point substantiellemēt; c'est pourquoy ces barbares ayans vn corps bien fait, & les organes bien rangez & bien disposez, leur esprit doit operer avec facilité: la seule education & instruction leur māque, leur ame est vn sol tres bon de sa nature, mais chargé de toutes les malices qu'une terre delaissee depuis la naissance du mōde peut porter. le compare volōtiers nos Sauvages avec quelques villageois, pource que les vns & les autres sont ordinairement sans instruction; encore nos Paysans sont-ils precipuez en ce point: & neantmoins ien'ay veu personne iusques icy de ceux qui sont venus en ces contrées, qui ne confesse & qui n'aduoue franchement que les Sauvages ont plus d'esprit que nos paysans ordinaires.

De plus, si c'est vn grand bien d'estre deliuré d'un grand mal, nos Sauvages sont heureux, car les deux tyrans qui donnent la gehenne & la torture à vn grand nombre de nos Europeans, ne re-

102 *Relation de la Nouvelle France,*
gnent point dans leurs grands bois, i'en-
tends l'ambition & l'avarice; Comme ils
n'ont ny police, ny charges, ny dignitez,
ny commandement aucun, car ils n'o-
beyssent que par bien-veillance à leur
Capitaine; aussi ne se tuēt ils point pour
entrer dās les honneurs, d'ailleurs com-
me ils se contentent seulement de la vie,
pas vn d'eux ne se donne au Diable pour
acquérir des richesses.

Ils font profession de ne se point fas-
cher, non pour la beauté de la vertu, dōt
ils n'ont pas seulement le nom, mais pour
leur contentement & plaisir, ie veux di-
re, pour s'affranchir des amertumes que
cause la fascherie. Le Sorcier me disoit
vn iour, parlant d'un de nos François, il
n'a point d'esprit, il se fasche, pour moy
rien n'est capable de m'alterer; que la fa-
mine nous presse, que mes plus proches
passent en l'autre vie, que les Hiroquois
nos ennemis massacrent nos gens, ie ne
me fasche iamais, ce qu'il dit n'est pas
article de foy: car comme il est plus su-
perbe qu'aucun Sauvage, aussi l'ay ie veu
plus souuent alteré que pas vn d'eux;
vray est que bien souuent il se retenoit,
& se commādoit avec violence, notam-

ment quand ie mettois au iour ses niaseries. le n'ay iamais veu qu'un Sauvage prononcer cette parole, *Ninicheatihin*, ie suis fasché encore, ne la profera il qu'une fois: mais i'aduertis qu'on prit garde à luy, car quand ces Barbares se faschent, ils sont dangereux & n'ont point de retenue!

Qui fait profession de ne se point fascher, doit faire profession de patience. les Sauvages nous passent tellemēt en ce poinct, que nous en deurions estre confus: ie les voyois dans leurs peines, dans leurs travaux souffrir avec allegresse. Mon hoste admirant la multitude du peuple que ie luy disois estre en France, me demandoit si les hommes estoient bons, s'ils ne se faschoient point, s'ils estoient patients. le n'ay rien veu de si patient qu'un Sauvage malade; qu'on crie, qu'on tempeste, qu'on faute, qu'on dāse, il ne se plaint quasi iamais. Ie me suis trouué avec eux en des dangers de grandement souffrir; ils me disoient nous serōs quelquefois deux iours, quelque fois trois sans manger, faute de viure, prends courage, *Chibiné*, aye l'amē dure, resiste à la peine & au trauail, garde toy de la tristesse, autrement tu seras malade; regarde que nous ne laissons pas de rire,

quoy que nous mangions peu, vne chose presque seule les abbat, c'est quand ils voyent qu'il y a de la mort; car ils la craignent outre mesure; ostez cette apprehension aux Sauvages, ils supporteront toutes sortes de mespris & d'incommodez, & toutes sortes de traux & d'injures fort patiemment: Je produiray plusieurs exemples de tout cecy dans la suite du temps, que ie reserve à la fin de ces chapitres.

Ils s'entraiment les vns les autres, & s'accordent admirablement bien; vous ne voyez point de disputes, de querelles, d'inimitiez, de reproches parmy eux, les hommes laissent la disposition du ménage aux femmes sans les inquieter; elles coupent, elles tranchent, elles donnent comme il leur plaist, sans que le mary s'en fasche. Je n'ay iamais veu mon hoste demander à vne ieune femme estourdie qu'il tenoit avec soy, que deuenoient les viures, quoy qu'ils diminuassent assez viste. Je n'ay iamais oüy les femmes se plaindre de ce que l'on ne les inuitoit aux festins, que les hommes mangeoient les bons morceaux, qu'elles traualloient incessamment, allans querir le bois pour le chauffage; faisans les Cabanes, passans les peaux, & s'occupans en

d'autres œuures assez penibles, chacun fait son petit affaire doucement, & paisiblement sans dispute. Il est vray neantmoins qu'ils n'ont point de douceur ny de courtoisie en leurs paroles, & qu'un François ne scauroit prendre l'accent, le ton & l'alpreté de leur voix, à moins que de se mettre en cholere, eux cependant ne s'y mettent pas.

Ils ne sont point vindicatifs entr'eux, si bien enuers leurs ennemis. Je coucheray icy vn exēple capable de confondre plusieurs Chrestiens. Dans les pressures de nostre famine, vn ieune Sauvage d'un autre quartier nous vint voir, il estoit aussi affamé que nous; le iour qu'il vint fut vn iour de ieusne pour luy & pour nous, car il ny auoit de quoy manger: le lendemain nos chasseurs ayās pris quelques Castors, on fit festin, auquel il fut tres-biē traitté, on luy dit en outre qu'on auoit veu les pistes d'un Orignac, & qu'on l'iroit chasser le lendemain; on l'invita à demeurer, & qu'il en auroit sa part, luy respōdit qu'il ne pouuoit estre dauantage; s'estant doncques enquis du lieu où étoit la beste, il s'en retourna: Nos Chasseurs ayans trouué & tué le lende-

main c'est Elan, l'enfevelirent dās la neige, selon leur coustume, pour l'enuoyer querir au iour suiuant. Or pendāt la nuict mon ieune Sauvage cherche si biē, qu'il trouuela beste morte, & en enleue vne bōne partie sans dire mot, le larcin connu par nos gens, ils n'entrèrent point en des furies, ne donnerent aucune malediction au voleur; toute leur cholere fut de se gauffer de luy, & cependāt c'estoit presque nous oster la vie, que de nous dérober nos viures, car nous n'en pouuions recouurer. A quelque temps de là, ce voleur nous vint voir, ie luy voulus représenter la laideur de son crime, mon hoste m'imposa silence, & ce pauvre hōme rejetant son larcin sur les chiens, nō seulement fut excusé, mais encore receu pour demeurer avec nous dans vne mesme Cabane. Il s'en alla donc querir sa femme, qu'il apporta sur son dos, car elle a les iambes sans mouuement; & vne ieune parente qui demeure avec luy apporta son petit fils, & tous quatre prirent place en nostre petit todis, sans que iamais on leur aye reproché ce larcin, ains au contraire on leur a tesmoigné tres-bō visage, & les a-on traittez com-

me ceux de la maison. Dites à vn Sauvage, qu'un autre Sauvage a dit pis que pendre de luy, il baïssera la teste, & ne dira mot: s'ils se rencōtrent par apres tous, ils ne feront nō plus de semblant de cela, comme si riē n'auoit esté dit, ils se traiteront comme freres, ils n'ont point de fiel enuers leur nation.

Ils sont fort liberaux entr'eux, voire ils font estat de ne riē aimer, de ne point s'attacher aux biēs de la terre, afin de ne se point attrister s'ils les perdēt. Vn chiē déchira n'a pas long temps vne belle robe de Castor à vn Sauvage, il estoit le premier à s'en rire; l'une de leurs grādes injures parmy eux, c'est de dire cēt homme aime tout, il est auare; si vous leur refusez quelque chose, voicy leur reproche, comme ie remarquay l'an passé, *Khisakhitā Sakhita*, tu aime cela, aime le tant que tu voudras: ils n'ouurent point la main à demy quand ils donnent, ie dis entr'eux, car ils sont ingrats au possible enuers les estrangers. Vous leur verrez nourrir leurs parents, les enfans de leurs amis, des femmes vefues, des orphelins, des vieillards, sans iamais leur rien reprocher, leur donnans abondamment

108 *Relation de la Nouvelle France*,
quelquefois des Originaux tous entiers;
c'est veritablement vne marque d'un
bon cœur, & d'une ame genereuse.

Comme il y a plusieurs orphelins par-
my ce peuple; car depuis qu'ils se sont
adonnez aux boiffons de vin & d'eau de
vie, ils meurent en grand nōbre; ces pau-
ures enfans sont dispersez dans les Ca-
banes de leurs oncles, de leurs tantes, ou
autres parents, ne pensez pas qu'on les
rabrotte, qu'on leur reproche qu'ils mā-
gent les viures de la maison, rien de tout
cela, on les traite comme les enfans du
pere de famille, ou du moins peu s'en
faut, on les habille le mieux qu'on peut.

Ils ne sont point delicats en leurs vi-
ures, en leur coucher, & en leurs habits,
mais ils ne sont pas nets; Iamais ils ne se
plaignent de ce qu'on leur donne, qu'il
soit froid, qu'il soit chaud, il n'importe,
quand la chaudiere est cuitte, on la par-
tage sans attēdre personne, non pas mes-
me le maistre de la maison, on luy garde
sa part qu'on luy presente toute froide.
I'en'ay point ouy plaindre mon hoste de
ce que l'on ne l'attendoit pas, n'estant
qu'à deux pas de la Cabane. Ils couchēt
sur la terre bien souuent, à l'enseigne des

estailles. Ils passeront vn iour, deux & trois iours sans manger, ne laissant pas de ramer, chasser, & se peiner tant qu'ils peuvent. L'on verra dans la suite de cette relation, que tout ce que i'ay dit en ce chapitre est tres-veritable, & neantmoins ien'oserois asseurer que i'aye veu exercer aucun acte de vraye vertu morale à vn Sauvage: Ils n'ont que leur seul plaisir & contentement en veüe, adjoustez la crainte de quelque blasme, & la gloire de paroistre bons chasseurs, voila tout ce qui les meut dans leurs operations.

De leurs vices & de leurs imperfections.

CHAPITRE VI.

LEs Sauvages estans remplis d'erreurs, les ont aussi de superbe & d'orgueil. L'humilité naist de la verité, la vanité de l'erreur & du mensonge; ils sont vuides de la connoissance de la verité, & par consequent tres remplis d'eux mesmes. Ils s'imaginent que par droit de naissance ils doivent iouir de la liberté des asnon Sauvages, ne rendant aucune subiection à qui que ce soit, sinon quand il leur plaist: Ils m'ont reproché cent fois, que nous

craignōs nos Capitaines, mais pour eux qu'ils se mocquoient & se gaussoient des leur: toute l'autorité de leur chef est au bout de ses leures, il est aussi puissant qu'il est eloquent; & quand il s'est tué de parler & de haranguer, il ne sera pas obey s'il ne plaist au Sauvages.

Je ne croy pas qu'il y aye de nation sous le ciel plus mocqueuse & plus gausseuse que la nation des Montagnais, leur vie se passe à manger, à rire, & à railler les vns des autres, & de tous les peuples qu'ils cognoissent; ils n'ont rien de serieux, sinon par fois, l'exterieur faifans parmy nous les graues & les retenus: mais entr'eux sont de vrais badins, de vrais enfans, qui ne demandent qu'à rire. Je les cachois quelquefois vn petit, notamment le Sorcier, les appellant des enfans, leurs tesmoignās que ie ne pouois asseoir aucun jugement asseuré sur toutes leurs responses; car si ie leur demandois d'vn, ils me disoient d'autre, pour trouuer suiet de rire & de gausser: & par consequent ie ne pouois connoistre quand ils parloient serieusement, ou quand ils se mocquoient. La conclusion ordinaire de leurs discours & de leurs entretiens, est en verité nous nous som-

mes bien mocquez d'un tel.

J'ay fait voir dans mes lettres precedentes combien les Sauvages sont vindicatifs envers leurs ennemis, avec quelle rage & quelle cruauté ils les traittent, les mageants apres leur auoir fait souffrir tout ce qu'un demon incarné pourroit inuenter, cette fureur est commune aux femmes, aussi bien qu'aux hommes; voire mesme elles les surpassent en ce point. J'ay dit qu'ils mangent les poux qu'ils trouuent sur eux, non pour aucun goust qu'ils y trouuēt, mais pource qu'ils veulent mordre ceux qui les mordent.

Ce peuple est fort peu touché de compassion, quand quelqu'un est malade dans leurs Cabanes, ils ne laissent pas pour l'ordinaire de crier, de tempester, & de faire autant de bruit, cōme si tout le monde estoit en santé; ils ne scauent que c'est de prendre soin d'un pauvre malade, & de luy donner des viandes qui luy sont bonnes: s'il demande à boire, on luy en donne; s'il demande à manger, on luy en presente, sinon on le laisse là: de l'inviter avec amour & charité, c'est un langage qu'ils n'entendent pas; tant qu'un malade pourra manger, ils le por-

teront ou le traifneront avec eux; cesse-il de manger, ils croient que c'est fait de sa vie, ils le mettent à mort, tant pour le deliurer du mal qu'il endure, que pour se soulager de la peine qu'ils ont de le porter quand ils vont en quelque autre endroit. Iay admiré avec cōpassion la patiēce des malades que j'ay veu parmi eux.

Les Sauvages sont mesdisants au delà de ce qu'on en peut penser; ie dis mesme les vns des autres, ils n'espargnent pas leurs plus proches: ils sont avec cela fort dissimulez; car si l'un médit d'un autre, il s'en mocquent à gorge desployée: si l'autre paroist là dessus, il luy tesmoignera autant d'affection, & le traittera avec autant d'amour, comme s'il l'auoit mis iusques au troisieme ciel à force de le louer. La raison de cecy prouient à mon aduis de ce que leurs detractions & mocqueries, ne fortent point d'un cœur enfielé, ny d'une bouche empestée, mais d'une ame qui dit ce qu'elle pense pour se donner carrière: & qui veut tirer du contentement de tout, voire mesme des mesdisances, & des gaufferies: cest pourquoy ils ne se troublent point; quoy qu'on leur die que d'autres se sont mocqués

qués d'eux, ou qu'ils ont blessé leur renommée: tout ce qu'ils repartent ordinairement à ces discours, c'est *mama irinissou*, il n'a point d'esprit, il ne sçait ce qu'il dit: & à la premiere occasion ils payeront leur detracteur en mesme monnoye, luy rendants le reciproque.

La menterie est aussi naturelle aux Sauvages que la parole, non pas entr'eux, mais enuers les estrangers: en fuitte de quoy l'on peut dire, que la crainte & l'esperoir, en vn mot, que l'interest est la mesure de leur fidelité, ie ne me voudrois cōfier en eux, qu'autāt qu'ils craindroient d'estre punis s'ils manquoient à leur deuoir, ou qu'ils espereroient d'estre recompensés s'ils estoient fideles. Ils ne sçauent que c'est d'estre secrets, de tenir leur parole, & d'aimer avec constance; notamment ceux qui ne sont pas de leur nation, car ils sont de bon accord parmy eux, & leurs mesdisances & raileries, n'alterent point leur paix, & leur bonne intelligence.

Ie diray en passant que les Sauvages Montagnais ne sont point larrons, l'entrée leur est libre dans les demeures des François, parce qu'ils ont la main feure:

mais pour les Hurons, si on auoit autant d'yeux qu'ils ont de doigts aux mains, encore ne les empescheroit-on pas de dérober, car ils dérobent avec les pieds: ils font profession de ce mestier, & en fuitte d'estre battus si on les descouure.

Car cōme i'ay desia remarqué, ils porteront les coups que vous leur donnerez patiemment; non pas en reconnoissance de leur peché, mais en punition de leur stupidité, s'estans laissez surprendre en leur larcin. Je laisseray à parler d'eux aux Peres qui les sont allez voir, dont i'enuierois la condition, n'estoit que celui qui nous assigne nos departemēs est toujours aimable, & toujours adorable, quelque part ou portiō qu'il nous dōne.

Il est du manger parmy les Sauuages, comme du boire parmy les yurogues d'Europe: ces ames seiches & toujours alterées, expireroient volōtiers dās vne cuue de maluoisie, & les Sauuages dans vne marmite pleine de viande; ceux-là ne parlent que de boire, & ceux cy que de manger. C'est faire vne espeece d'affront à vn Sauuage, de refuser les morceaux qu'il presente. Vn certain voyant que i'auois remercié mon hoste, qui me

presentoit à manger, me dit, tu ne l'aime pas, puis que tu l'es conduits: le luy dis que nostre coustume n'estoit pas de manger à toutes heures, que neantmoins ie prendrois ce qu'il me donneroit, pourueu qu'il ne m'en donnast guieres souvent. Ils se mirēt tous à rire, & vne vieille me dit, que si ie voulois estre aimé de leur nation, il falloit que ie mangeasse beaucoup. Quand vous les traitez biē, ils témoignent le contentement qu'ils prennent en vostre festin par ces paroles, *tapoué nimiti son*, en verité ie mange: comme si leur souuerain contentement estoit en cette action: & à la fin du banquet, ils diront pour action de graces, *tapoué nik hispoun*, veritablemēt ie suis saoul; c'est à dire, tu m'as bien traité, i'en ay iusques à creuer; i'ay desia me semble remarqué cecy. Ils croyent que c'est bestise & stupidité de refuser: le plus grād contentement qu'ils puissent auoir en leur Paradis, qui est le ventre. Je m'écrierois volōtiers, ô iuste iugement de Dieu, que ce peuple qui met sa dernière fin à manger soit tousiours affamé, & ne soit point repeu que comme les chiens, car leurs festins les plus splendides ne sont pour

ainsi dire, que les os & les reliefs des tables d'Europe; La premiere action qu'ils font le matin à leur resueil, c'est d'estendre le bras à leur escuelle d'escorce garnie de chair, & puis de manger. Au commencement que ie fus avec eux, ie voulus introduire la coustume de prier Dieu deuant que de manger, & de fait ie donnois la benedictiõ quand ils le vouloiẽt faire: mais l'Apostat me dit, si vous voulez prier autant de fois qu'on mangera dans la Cabane, preparés vous à dire vostre *Benedicite* plus de vingt fois auant la nuit. Ils finissent le iour comme ils le commencent, ils ont encore le morceau à la bouche, ou le calumet pour petuner, quand ils mettent la teste sur le cheuet pour reposer.

Les Sauvages ont tousiours esté gourmands, mais depuis la venuë des Europeans, ils sont deuenus tellement yrognes, qu'encore qu'ils voyent bien que ces nouvelles boissions de vin & d'eau de vie, qu'on leur apporte depeuplẽt leurs pays, & qu'eux mesmes s'en plaignent; ils ne sçauroient s'abstenir de boire, faisant gloire de s'enyurer, & d'enyurer les autres. Il est vray qu'ils meurẽt en grand

nombre, mais ie m'estonne encore comme ils peuuent si long temps resister, car donnez à deux Sauvages deux & trois bouteilles d'eau de vie, ils s'asseoiront, & sans manger boiront l'un apres l'autre, iusques à ce qu'ils les ayent vuidées. La compagnie de ces Messieurs est merueilleusement louable, de defendre la traite de ces boissons. Monsieur de Champlain fait tres sagement de tenir la main que ces deffences soient gardées. J'ay appris que Monsieur le General du Plessis les a fait observer à Tadoussac. On m'auoit dit que les Sauvages estoient assez chastes, ie ne parleray pas de tous, ne les ayāt pas tous frequentez, mais ceux que i'ay conuersez sont fort lubriques, & hommes & femmes. Dieu quel aveuglemēt? quel bō-heur du peuple Chrestien? que le chastiment de ces Barbares! au lieu que par admiratiō nous disons assés souvent, Iesvs qu'est cela! mon Dieu qui a fait cela? ces vilains & ces infames prononcent les parties des-honnestes de l'homme & de la femme. Ils ont incessamment la bouche puañte de ces ordures, & mesmes iusques aux petits enfāts, aussi leur disois-je par fois, que si les

pourceaux & les chiens sçauoient parler, ils tiendroient leur langage. Il est vray que si l'impudique Sorcier ne fust pas venu dās la Cabane où i'estois, i'auois gagné cela sur mes gens, qu'aucun n'osoit parler des choses des-honnestes en ma presence, mais cēt impudent autorisoit les autres. Les femmes vn peu âgées se chauffent presque toutes nuës, les filles & les ieunes femmes, sont à l'exterieur tres honnestement couuertes, mais entre elles leur discours sont puants, comme des cloaques. Il faut neātmoins aduouër que si la liberté de se gorger de ces immondices estoit parmy quelques Chrestiens, cōme elle est parmy ces peuples, on verroit bien d'autres monstres d'excez qu'on ne voit pas icy; veu mesme que nonobstant les loix Diuines & humaines, la dissolution y marche plus à descouuert qu'enon pas icy. Car les yeux n'y sont point offensez. Le seul Sorcier a fait en ma presence quelque action brutale, les autres battoient seulement mes oreilles, mais s'apperceuant que ie les entendois, ils en estoient honteux.

Or comme ces peuples connoissent bien cette corruption, ils prennent plu-

stoit les enfans de leurs sœurs pour héritiers, que leurs propres enfans, ou de leurs freres, reuoquans en doute la fidelité de leurs femmes, & ne pouuāts douter que ces nepueux ne soient tirez de leur sang, aussi parmy les Hurons, qui sont plus sales que nos Montagnais; pource qu'ils sont mieux nourris, l'enfant d'un Capitaine ne succede pas à son pere, mais le fils de sa sœur.

Le Sorcier me disant vn iour que les femmes l'aimoient, car au dire des Sauvages, c'est son genie que de se faire aimer de ce sexe. Je luy dis que cela n'estoit pas beau qu'une femme aimast vn autre que son mary; & que ce mal estāt parmy eux, luy mesme n'estoit pas assuré, que son fils qui estoit là present, fut son fils. Il me repartit, tu n'as point d'esprit: vous autres François vous n'aimez que vos propres enfans, mais nous, nous cherifions vniuersellement tous les enfans de nostre nation, ie me mis à rire, voyant qu'il philosophoit en cheual & en mulet.

Après toutes ces belles qualitez, les Sauvages en ont encore vne autre plus onereuse que celles dont nous auons parlé, mais non pas si meschante; c'est

120 *Relation de la Nouvelle France,*
leur importunité enuers les estrangers.
I'ay coustume d'appeller ces cōtrées là,
le pays d'importunité enuers les estran-
gers, pource que les mouches, qui en
font le symbole, & le hieroglyphique, ne
vous laissent reposer ny iour ny nuict:
pendant quelques mois de l'Esté, elles
nous assaillent avec telle furie, & si con-
tinuellement, qu'il n'y a peau qui soit à
l'espreuve de leur aiguillō: tout le mon-
de leur paye de son sang pour tribut.
I'ay veu des personnes si enflées apres
leurs picqueures, qu'on croyoit qu'ils
perdroient les yeux, qui ne paroïssent
quasi plus: or tout cela n'est rien, car
enfin cette importunité se chasse avec
de la fumée, que les mouches ne sçau-
roient supporter, mais ce remede attire
les Sauvages: s'ils sçauent l'heure de vo-
stre disner, ils viennent tout exprez pour
auoir à manger, ils demandēt incessam-
ment, mais avec des presses si reïterées,
que vous diriez qu'ils vous tiennent
toufiours à la gorge: faites leur voir
quoy que ce soit, s'il est tant soit peu à
leur vsage: ils vous diront l'aime tu?
donne le moy.

Vn certain me disoit vn iour, qu'en son

pays on ne sçauoit point conjuguer le verbe *do*, au present, encore moins au preterit: les Sauvages ignorent tellemēt cette coniugaison, qu'ils ne vous donneroient point la valeur d'une obole, s'ils ne croient, pour ainsi dire, retirer vne pistole; ils sont ingrats au dernier point.

Nous auons icy tenu & nourry fort long temps nostre Sauvage malade, qui se vint ietter entre nos bras pour mourir Chrestien, cōme i'ay remarqué cy-dessus: tous ces cōpatriottes estoient estōnez du bon traitement que nous luy faisons, ses enfants en sa consideration, apportèrent vn peu de chair d'Elan; on leur demanda ce qu'ils vouloient en échange, car les presents des Sauvages sont des marchez: ils demanderent du vin & de la poudre à Canon, on leur repart qu'on ne leur en pouuoit donner; que s'ils vouloient autre chose que nous eussions, on leur donneroit tres volontiers, on leur donna fort bien à manger, & pour conclusion ils remporterēt leurs viandes, puisqu'on ne leur donnoit ce qu'ils demandoient, menaçant qu'ils viendroient requerrir leur pere, ce qu'ils firent; mais le bon hōme ne voulut pas

122 *Relation de la Nouvelle France*,
nous quitter; de cét échantillon, iugez
de la piece.

Or ne pensez pas qu'ils se comportent
ainsi entr'eux, au contraire, ils sont tres
reconnoissants, tres liberaux, & nulle-
ment importuns enuers ceux de leur na-
tion. S'ils se cōportent ainsi enuers nōs
François, & enuers les autres estrangers,
c'est à mon aduis que nous ne voulons
pas nous allier avec eux comme freres,
ce qu'ils souhaitteroient grandement;
mais ce seroit nous perdre en trois iours:
car ils voudroient que nous allassions
avec eux manger de leurs viures tant
qu'ils en auroient, & ils viendroiēt aussi
manger les nostres tāt qu'ils dureroiēt:
& quand il n'y en auroit plus, nous nous
metterions tous à en chercher d'autres.
Voila leur vie qu'ils passent en festins
pendāt qu'ils ont de quoy; mais comme
nous n'entendons rien à leur chasse, &
que ce procedé n'est pas loüable, on ne
veut pas leur prester l'oreille. C'est pour-
quoy ne nous tenants point comme de
leur nation, ils nous traittent à la façon
que i'ay dit. Si ynestrāger quel qu'il soit
se iette de leur party, ils le traitteront
comme eux. Vneune Hiroquois, auquel

ils auoient donné la vie, estoit comme enfant de la maison; que si vous faites vostre mesnage à part mesprisants leurs loix, ou leurs coustumes, ils vous succeront s'ils peuuent iusques au sang. Il n'y a mouche, ny guespe, ny taon, si importun qu'un Sauvage.

Je suis tantost las de parler de leurs desordres, disons quelque chose de leur saleté, & puis finissons ce chapitre.

Ils sont sales en leurs habits, en leurs postures, en leurs demeures, & en leur manger, & cependant il n'y a aucune inciuilité parmy eux; car tout ce qui donne du contentement aux sens, passe pour honeste.

L'ay dit qu'ils sont sales en leurs demeures, l'aduenue de leurs Cabanes est vne grange à pourceaux. Iamais ils ne balient leur maison, ils la tapissent au commencement de branches de pin, mais au troisieme iour ces brâches sont pleines de poil, de plumes, de cheueux, de coupeaux, de raclure de bois, & cependant ils n'ont point d'autres sieges, ny d'autres lits pour se coucher, d'ot l'on peut voir de quelle saleté peuuent estre chargez leurs habits: Vray est que ces or-

dures & saletez ne paroissent pas, tant dessus leurs robes, que dessus les nostres.

Le Sorcier quittant nostre Cabane pour vn temps, me demanda mon manteau, pource qu'il faisoit froid, disoit-il; comme si i'eusse esté plus dispensé des loix de l'Hiver que non pas luy: ie luy prestay, s'en estant seruy plus d'un mois, en fin il me le rēdit si vilain, & si sale, que i'en estois honteux, car les flegmes & autres immondices qui le couuroient, luy donnoient vn autre teinture. Le voyant en cēt estat, ie le dépliay exprez deuant luy, afin qu'il le vit; connoissant bien ce que ie voulois dire, il me dit fort à propos, tu dis que tu veux estre Mōtagnais & Sauvage comme nous, si cela est, ne sois pas marry d'en porter l'habit; car voila comme sont faites nos robes.

Quand est de leur posture, elle suit la douceur de leur commodité, & non les regles de la bien seance: les Sauvages ne preferent iamais ce qui est honnesté à ce qui est delectable. I'ay veu souvent le pretendu magicien couché tout nud, hormis vn mechant brayer plus sale qu'un torchon de cuisine, plus noir qu'un écouillō de four, retirer vne de ses

iambes contre la cuisse, & mettre l'autre sur son genoüil releué, haraguant les gens en cette posture, son auditoire n'auoit pas plus de grace.

Pour leur manger, il est tant soit peu plus net que la mangeaille que l'on donne aux animaux, & non pas encore toujours, ie ne dis rien par exaggeration, i'en ay gousté & vescu quasi six mois durant. Nous auions trois escroüelés en nostre Cabane, le fils du Sorcier qui les auoit à l'oreille d'une façon fort sale, & pleine d'horreur; son neveu qui les auoit au col, vne fille qui les auoit sous vn bras; ie ne sçay si ce sont vrayes escroüelles, quoy qu'il en soit, ce mal est plein de pus, couuert d'une croute fort horrible à voir: ils en sont quasi tous frappez en leur ieunesse, tant pour leur saleté, que pource qu'on ne fait point de difficulté de boire & de māger avec des malades. Je les ay veu cent fois patroüiller dans la chaudiere où estoit nostre boisson commune, y lauer leurs mains, y boire à pleine teste comme les bestes, reietter leurs restes là dedans; car c'est la coustume des Sauvages, y fourrer des bastons demy brulés, & pleins de cendre, y plonger de

126 *Relation de la Nouvelle France,*
leur vaisselle d'escorce pleine de graisses,
de poil d'Orignaux, de cheueux, y puiser
de l'eau avec des chaudrons noirs com-
la cheminée: & après tout cela, nous beu-
uions tous de ce broüet, noir comme de
l'ambroisie. Cen'est pas tout, ils reietterēt
là dedās les os qu'ils ont rongé, puis vous
mettent de l'eau ou de la neige dans la
chaudiere, la fōt boüillir, & voila de l'hi-
pocras. Vn certain iour des iouliers ve-
nant d'estre quittés, tomberent dās no-
stre boisson, ils se lauerent à leur aise, on
les retira sans autre ceremonie puis on
beut apres eux comme si rien ne fut arri-
ué. Je ne suis pas bien delicat, si est-ce que
ie n'eus point de soif tant que cette mal-
uoisie dura.

Iamais ils ne lauent leurs mains exprés
pour manger, encore moins leur chau-
diere, & point du tout la viande qu'ils
fōt cuire, quoy que le plus souuent (ie le
dis comme ie l'ay veu cent & cent fois)
elle soit toute couuerte de poil de bestes,
& de cheueux de leurs testes: Je n'ay ia-
mais beu aucun boüillon parmy eux,
qu'il ne m'aye fallu jetter quātité de ces
poils & de ces cheueux, & bien d'autres
ordures; comme des charbons, des petits

morceaux de bois, & mesme du baston dont ils attisent le feu, & remuent bien fouuent ce qui est dans la chaudiere: ie les ay veu par fois prēdre vn tison ardēt, le mette dās la cendre pour l'esteindre: puis quasi sans le secoüer, le tremper dās la chaudiere ou trempoit nostre disner.

Quand ils font secherie de la chair, ils vous ietteront par terre tout vn costé d'Orignac, ils le battent avec des pierres; ils marchent dessus, le foulent avec leurs pieds tout sales, les poils d'hōmes & de bestes, les plumes d'oiseaux s'ils en ont tué, la terre & la cendre; tout cela s'incorpore avec la viande, qu'ils font quasi durcir comme du bois à la fumée; puis quand ils viennent à manger de ce boucan, tous s'en va de compagnie dans lestomach, car ils nont point d'eau de despart: en vn mot ils croient que nous n'auons point d'esprit de lauer nostre viande, car vne partie de la graisse s'en va tousiours avec l'eau.

Quand la chaudiere commence a bouillir, ils recueillent l'écume fort soigneusement, & la mangent avec delices: ils m'en presentoient avec faueur, ie la trouuois bonne durant nostre famine, mais depuis

venant par fois à les remercier de ce présent, ils m'appelloient superbe & orgueilleux: ils chassent au rats & aux souris par plaisir, comme aux lieures, & les trouuent également bons.

Les Sauvages ne mangent pas comme nos François dās vn plat, ou autre vaisselle commune à tous ceux qui sont à table; l'un d'entreux descend la chaudiere de dessus le feu, & fait les parts à vn chacun, presentant par fois la viande au bout d'un baston, mais le plus souuent sās prendre ceste peine, il vous iettera vne piece de chair toute brulante, & pleine de graisse, cōme on ietteroit vn os à vn chiē; disant *Nakhimitchimi*, tiens, voila ta part, voila ta nourriture; si vous estes habile-homme, vous la retenēs avec les mains, sinon garde que la robe ne s'en fente, où que les cendres ne seruent de sel, puisque les Sauvages n'en ont point d'autre.

Je me suis veu bien empesché au commencement, car n'osant couper la chair qu'ils me donnoient dās mon plat d'écorce de peur de le bleffer, ie ne sçauois comment en venir à bout, n'ayant point d'affiette. En fin il se fallut faire tout à rout, deuenir Sauvages avec les Sauvages: Je
ierray

iettay les yeux sur mon compagnon, puis ie taschay d'estre aussi braue homme que luy. Il prend sa chair à pleine main, & vous la coupe morceaux apres morceaux, comme on feroit vne piece de pain, que si la chair est vn peu dure, ou qu'elle cede au cousteau pour estre trop molasse; ils vous la tiennent d'vn bout par les dents, & de l'autre avec la main gauche, puis la main droite iouë là dessus du violon, se seruāt de cousteau pour archer: & cecy est si commun parmy les Sauvages, qu'ils ont vn mot propre pour exprimer cette actiō. que nous ne pouuons expliquer qu'en plusieurs paroles & par circumloquution. Si vous esgarez vostre cousteau, comme il n'y a point de couteliers dans ces grāds bois, vous estes condamnez à prendre vostre portion à deux belles mains, & mordre dans la chair & dans la graisse aussi brauement, mais non pas si honnestement que vous feriez dans vn quartier de pōme; Dieu sçait si les mains, si la bouche, & vne partie de la face reluisent par apres? le mal est que ie ne sçauois à quoy m'essuyer; de porter du linge, il faudroit vn mulet, ou bien faire tous les jours la

130 *Relation de la Nouvelle France,*
lessiue: car en moins de riē tout se chan-
ge en torchon de cuisine dans leurs Ca-
banes. Pour eux ils torchēt leurs mains à
leurs cheueux, qu'ils nourrissent fort
longs, d'autrefois à leurs chiens: ie veis
vne femme qui m'apprit vn secret, elle
nettoya ses mains à ses souliers, ie fis le
mesme; ie me seruois aussi de poil d'O-
rignac, & de branches de pin, & notam-
ment de bois pourry puluerisé, ce sont
les essuyemains des Sauvages; on ne s'en
sert pas si doucement comme d'une
toile d'Hollande, mais peut-estre plus
gayement & plus ioyeusement. C'est as-
sez parlé de ces ordures.

*Des viandes & autres mets dont mangent
les Sauvages, de leur assaisonnement,
& de leurs boissons.*

CHAPITRE VII.

ENtre les animaux terrestres il sont
des Elans, qu'on appelle ordinai-
rement icy des Originaux, des Castors,
que les Anglois nomment des Bieures,
des Caribōs, qualifiez par quelques vns
afnes Sauvages: ils ont encore des Ours,

des Blereaux, des Porcs épics, des Renards, des Lieures, des Siffleurs ou Rosignols, c'est vn animal plus gros qu'un Lieure; ils mangent en outre des Marthes, & des Ecurieux de trois especes.

Pour les oiseaux, ils ont des Outardes, des Oyes blâches & grises, des Canards de plusieurs especes, des Sarcelles, des Bernaches, des Plongeurs de plusieurs fortes; ce sont tous oiseaux de riuere, Ils prennent encore des Perdrix ou de Gelinottes grises, des Beccasses & Beccassines de quantité d'especes, des Tourterelles, &c.

Quand au Poisson, ils prennent en vn temps des Saulmons de diuerfes fortes, des Loups marins, des Brochets, des Carpes, & Esturgeons de diuerfes especes, des Poissons blancs, des Poissons dorez, des Barbuës, des Anguilles, des Lamproyes, de L'esplanc, des Tortues & autres.

Ils mangent en outre quelques petits fruiçts de la terre, des framboises, des bleuës, des fraises, des noix qui n'ont quasi point de chair, des noisettes, des pommes sauuages plus douces que celles de France, mais beaucoup plus peti-

tes; des cerises, dont la chair & le noyau ensemble ne sont pas plus grosses que les noyaux des Bigarreaux de France. Ils ont encore d'autres petits fruits Sauvages de diuerses sortes, des Lambruches en quelques endroicts : bref tout ce qu'ils ont de fruit (ostez les fraises & les framboises qu'ils ont en quantité) ne vaut pas vne seule espece des moindres fruits de l'Europe.

Ils mangent en outre des racines comme des oignons de martagons rouges, vne racine, qui a goust de reglisse, vne autre que nos François appellent des chapelets, pource qu'elle est distinguée par nœuds en forme de grains, & quelques autres en petit nombre.

Quand la grande famine les presse, ils mangent des racleures ou des escorces d'un certain arbre, qu'ils nomment *Michtan*, lesquels ils fendent au Printemps pour en tirer vn suc doux comme du miel, ou cōme du sucre: à ce que m'ont dit quelques vns, mais à peines s'amusent ils à cela tant il en coule peu.

Voila les viandes & autres mets, dont se repaissent les Sauvages des contrées où nous sommes; l'obmets sans doute

plusieurs autres especes d'animaux, mais ils ne mereuiennent pas maintenant en la memoire.

Outre ces viures que ce peuple tire de son pays sans cultiuer la terre, ils ont encore des farines & des bleds d'Inde; qu'ils troquent pour des peaux d'Orignac avec les Hurons, qui descendent iusques à Kebec, ou iusques aux trois riuieres. Ils acheptēt encore du Petun de cette nation, qui quasi tous les ans en a porté en grande quantité.

De plus, ils ont de nos François de la galette, du biscuit, du pain, des pruneaux, des pois, des racines, des figues, & choses semblables. Voila de quoy se nourrit ce pauvre peuple.

Quand à leurs boissions, ils n'en font aucune ny de racines ny de fruiçts, se contentans d'eau pure, il est vray que le boüillon dans lequel ils ont cuit la viande, & vn autre boüillon qu'ils font d'os d'Elan concassez & brisez, seruent aussi de boisson. Vn certain villageois disoit en France, que s'il eust esté Roy il n'eut beu que de la gresse, les Sauvages en boiuent assez souuent, voire mesme ils la mangent & mordent dedans, quand

134 *Relation de la Nouvelle France,*
elle est figée, comme nous morderions
dans vne pomme. Quand ils ont fait
cuire vn Ours bien gras ou deux ou trois
Castors dans vne chaudiere, vous les
verriez ramasser & recueillir la gresse
sur le bouillō, avec vne large cuillier de
bois, & gouter cette liqueur comme
le plus doux Parochimel qu'ils ayent:
quelquesfois ils en remplissent vn grand
plat d'escorce, qui fait la ronde à l'en-
tour des conuiez au festin, & chacun en
boit avec plaisir. D'autres ayant ramas-
sé cette gresse toute pure, ils iettent de-
dans quantité de neige; ce qu'ils font
encore dans le bouillon gras, quand ils
veulent boire vn peu froid, vous verriez
de gros morceaux de gresse figée sur ce
breuuage, & neantmoins ils le boient
& l'auallent comme de l'Hipocras. Voi-
là à mon aduis toutes les sortes de boi-
ssons qui se retreuent parmy nos Sau-
uages, & dont ils m'ont fait gouter en
Hiuer. Il a esté vn temps qu'ils auoient
horreur de nos boissons d'Europe, mais
ils se vendroient maintenant pour en
auoir tant ils les aiment. Je me suis qua-
si oublié de dire qu'ordinairement ils
boient chaud ou tiede; ils me rançoient

par fois, me voyant boire de l'eau froide, me disants que ie serois maigre, & que cela me refroidiroit iusques dans les os.

De plus, ils n'entremellent point le manger & le boire comme nous, mais on distribue premierement la chair ou les autres mets, puis ayant mangé ce qu'ils veulent, on partage le bouillon, où on le met en certain endroict, & chacun y va boire qui veut.

Difons pour conclusion de ce poinct, que les Sauvages avec tant d'animaux, tant d'oiseaux & de poissons, sont quasi tousiours affamez; la raison est, que les oiseaux & les poissons sont passagers, s'en allant & retournât à certain temps, & avec cela ils ne sont pas trop grands gybboyeurs, & encore moins bons ménagers, car ce qu'ils tuent en vn iour ne void pas l'autre, excepté l'Elan & l'Anguille, dont ils font secherie quand ils en ont en grande abondance, si bien que pendant le mois de Septembre & octobre, ils viuent pour la plus part d'anguilles fresches en Nouembre Decembre, & souuent en Ianuier, ils mangent leurs anguilles boucanées, & quelques Porcs

136 *Relation de la Nouvelle France,*
epics qu'ils prennent pendant les petites neiges, cōme aussi quelques Castors s'ils en trouuent. Quand les grandes neiges sont venuës ils mangent l'Orignac frais, ils le font seicher pour se nourrir le reste du temps iusques en Septembre, avec quelques oiseaux, quelques Ours & Castors qu'ils prennent au Printemps & pendant l'Esté: Or si routes ces chasses ne donnent point (ce qui n'arrive que trop souuent pour eux) ils souffrent grandement.

De leurs festins.

CHAPITRE VIII.

ILn'y a que les chasseurs effectiuemēt & ceux qui l'ont esté, qui soient ordinairement conuiez aux festins, les femmes vefues y vont aussi: notamment si ce n'est pas vn festin à manger tout, les filles, les femmes mariées, & les enfans en sont quasi tousiours exclus. Ie dis quasi tousiours, car par fois on les inuite, ie leur ay veu faire des *Acoumagouchanai*, c'est à dire des festins à ne rien laisser, auxquels tout le monde se trouuoit, les

hōmes, fēmes, & petits enfans: quand ils ont grāde abondance de viures, les femmes font quelquefois des festins par entr'elles, où les hōmes ne se trouuēt point.

Leur façon d'inuiter est sans fard & sans ceremonie, quand tout est cuit & prest à manger (car on n'inuite personne auparauant) quelqu'un s'en va par les Cabanes où sont ceux qui doivent estre conuiez, ou bien mesme on leur crierā ce mot du lieu où se faict le festin *khinatōmigaouinaouau*, vous estes inuitez au banquet, les hommes auxquels ce mot s'adresse, respondent *ho ho*, & prenant sur l'heure mesme leur plat d'escorce & leur cueiller de bois, s'en viennent en la Cabane de celuy qui les traite. Quand tous les hommes ne sont pas inuitez, on nomme ceux qu'on veut conuier; le deffaut de ceremonies faict épargner beaucoup de paroles à ces bōnes gens. Il me semble qu'au siecle d'or on faisoit comme cela, sinon que la neteté y estoit en plus grande recommandation que parmy ces peuples.

Dans tous les festins, comme aussi dans leurs repas ordinaires, on donne à vn chacun sa part, d'où vient qu'il n'y en a

que deux ou trois qui ayēt les meilleurs morceaux, car ils ne les diuisent point: ils donneront par exemple la langue d'un Orignac, & toutes ses appartenances à vne seule personne, la queue & la teste d'un Castor à vn autre; voila les meilleures pieces, qu'ils appellent *Mascanon*, la part du Capitaine. Pour les boyaux gras de l'Orignac, qui sont leurs grands delices, ils les font ordinairement rostir & en font gouster à tous, comme aussi d'un autre mets, dont ils font grand estat, c'est le gros boyau de la beste rempli de gresse, & rosty avec vne corde qui pend & tourne deuant le feu.

Au reste ils sont magnifiques en ces festins, car ils ne presentent que les bonnes viandes les separants exprés, & donnant à chacun tres abondamment, quand ils en ont.

Ils ont deux sortes de festins, les vns à manger tout, les autres à manger ce qu'on voudra, remportant le reste pour en faire part à leur famille. Cette derniere façon me semble louable, car il n'y a point d'excez, chacun prend autant qu'il luy plaist de la portion qui luy est donnée;

voire i'oserois dire que c'est vne belle inuention pour conseruer l'amitié entr'eux, & pour se nourrir les vns les autres: car ordinairement les peres de famille ne mangent qu'une partie de leurs mets, portans le reste à leurs femmes & à leurs enfans, le mal est qu'ils font trop souuent des festins dans la famine que nous auons enduré: si mō hoste prenoit deux, trois, & quatre Castors, tout aussi tost fut-il iour, fut-il nuict on en faisoit festin à tous les Sauvages voisins, & si eux auoient pris quelque chose, ils en faisoient de mesme à mesme temps: si que sortant d'un festin vous allez à vn autre, & par fois encore à vn troisieme, & vn quatrieme. Je leur disois qu'ils ne faisoient pas bien, & qu'il valoit mieux reseruer ces festins aux iours suiuians, & que ce faisant nous ne serions pas tant pressés de la faim; ils se mocquoient de moy, demain (disoient-ils) nous ferons encore festin de ce que nous prendrons; ouïy mais le plus souuent ils ne prenoient que du froid & du vent.

Pour leurs festins à ne rien laisser, ils sont tres blamables, & c'est neantmoins l'une de leurs grandes deuotions, car ils

140 *Relation de la Nouvelle France,*
font ces festins pour auoir bonne chasse,
il se faut bien donner de garde que les
chiens n'en goustent tant soit peu, tout
feroit perdu, leur chasse ne vaudroit rien;
Et remarquez que plus ils mangent plus
ce festin est efficace; de là vient qu'ils dō-
neront à vn seul homme, ce que ie ne
voudrois pas entreprendre de manger,
auectrois bons disneurs, ils creueroient
plustost, pour ainsi dire, que de rien laisser.
Vray qu'ils se peuuent ayder les vns les
autres; quand quelqu'un n'en peut plus,
il prie son compagnon de l'assister, où bien
l'on fait passer son reste pardeuant les au-
tres qui en prennent chacun vne partie,
& apres tout cela s'il en reste on le iette au
feu; celuy qui mange le plus est le plus
estimé, vous les entendez raconter leurs
proüesses de gueule, specifians la quan-
tité & les parties de la beste qu'ils ont mā-
gé; Dieu sçait quelle musique apres le
banquet, car ces Barbares donnent toute
liberté à leur estomach & à leur ventre,
de tenir le langage qui leur plaist pour se
soulager; quand aux odeurs qu'on sent
pour lors dans leurs Cabanes, elles sont
plus fortes quel'odeur des roses, mais elles
ne sont pas si douces, vous les voyez ha-


leter & souffler comme des gens remplis iusques au gosier; & de fait comme ils sont nuds, ie les voyois enfler iusques à la gorge, encore ont ils du courage là dedans, leur cœur retient ce qu'on luy donne, ie n'ay veu que l'estomach du Sorcier mécontent de ce qu'on luy auoit donné, quantité d'autres en approchoient de bien près, mais ils tenoient bon. I'en ay veu par fois de malades apres ces excez.

Mais venons à l'ordre qu'ils gardent en ces banquets; Ceux qu'on doit traiter estans conuiez à la façon que i'ay dit, ils s'en viennent avec leur *ouragan*, ou escuelle leur cuillier, ils entrent dans la Cabane sans ceremonie, chacun prenant sa place comme il vient, ils s'asseoient en rond à l'entour de la chaudiere qui est sur le feu, renuersant leur plat deuant eux, leurs sieges, c'est la terre couuerte de branches de pin, il n'y a point de prefeance, toutes les parties d'un cercle sont aussi courbées, & aussi nobles les vnes que les autres, quelques fois l'un d'eux dira à celui qui entre, *Outai appitou*, viens icy, fieds toy là.

Chacun ayant pris sa place & s'estant assis en forme de Guenon, retirant ses

142 *Relation de la Nouvelle France,*
jambes contre les cuisses, si c'est vn fe-
stin à manger tout, on ne dit mot, on
chante seulement, & s'il ya quelque
Sorcier ou *Manitoufion*, il bat son tam-
bour; vray qu'ils ne sont pas tousiours si
religieux qu'ils ne tiennent quelque pe-
tit discours. Si le festin n'est pas à ne rien
laisser, ils s'entretiennent vn peu de
temps de leurs chasses, ou d'autres cho-
ses semblables, le plus souuent de gaus-
series.

Après quelques discours, le distribu-
teur du festin, qui est ordinairement ce-
luy qui le fait, descend la chaudiere de
dessus le feu, ou les chaudières s'il y en a
plusieurs, les mettāt deuant soy, & lors il
fait quelque harāgue ou semet à chāter,
& tous les assistans avec luy; quelquefois
il ne faict ny l'vn ny l'autre, mais seule-
ment il dit les mots de l'entrée du fe-
stin. qui ne s'obmettent iamais, c'est à
dire qu'il declare de quoy il est compo-
sé: par exemple il dira, hommes qui
estes icy assemblez, c'est vn tel qui faict
le festin, ils respondent tous du fond de
l'estomac *hō-ō-ō* le festin est composé de
chair de Castor, ils poussent de rechef
leur aspiration *hō-ō-ō*, il ya aussi de la fa-

rine de bled d'Inde *hō-ō-ō*, respondent ils, à chaque diuersité de mets. 

Pour les festins moins solempnels, ce-
luy qui le faict s'adressant à quelqu'un
de ses amis, ou de ses parents, il luy dira,
mon cousin, ou mon oncle, voila le Ca-
stor que j'ay pris, nous le mangerons
maintenant, & alors tout le monde dit
son *hō-ō-ō*, & voila le festin ouuert, du-
quel on ne sort point, que les mots par
lesquels on le conclud ne soient dictz.
Cela fait, le distributeur ramasse quel-
quefois la gresse de dessus la chaudiere
& la boit luy tout seul, d'autres fois il en
fait part à ses amis, quelquefois il en
remplit vn grand & profond plat qui se
presente à tous les conuiez comme j'ay
dit, & chacun en boit sa part; si le festin
est de pois, de farine, de bled d'Inde, ou
de choses semblables demy liquides, il
prend les *Ouragans*, ou escuelles d'un
chacun, & distribue la chaudiere, le plus
esgalement qu'il luy est possible, leurs
rendant leurs plats bien garnis, sans re-
garder par quel bout il commence; il n'y
a ny honneur ny blasme d'estre party le
premier ou le dernier. Si le festin est de
viande, il la tire avec vn baston pointu,

la met dans des plats d'escorce deuant soy, puis ayant ietté les yeux sur le nombre des conuiez, ill'a distribue comme il luy plaist, donnant à chacun abondamment, non pas egalelement. Car il donnera les friants morceaux à ses confidents, voire mesme quand il a donné à tous vne bonne piece, commençant par ceux qui ne sont pas de sa Cabane, il rechargera iusques à deux & trois fois & non pas pour les autres, personne ne s'offence de ce procedé, car c'est la coustume.

Il presente ordinairement la chair au bout d'un baston, nommant la piece ou la partie de l'animal qu'il donne, en cette façon; si c'est la teste d'un Castor, ou d'Asne sauuage, ou d'autre animal, il dira *Nichta Koustigouanime*; Mon cousin, voila ta teste, si c'est vne espaule, il dira voila ton espaule, si ce sont des boyaux, il en dira de mesme; d'autres fois ils disent simplement, *Khimitchimi*, voila ton mets: mais prenez garde qu'ils n'ont point l'equiuoque en leur langue que nous auons en la nostre. On raconte d'un certain, lequel rencontrant son amy, luy dit par courtoisie, si i'auois quelque chose digne de vous, ie vous inuiterois à des-jeusner en
nostre

nostre maison, mais ie n'ay rien du tout, son valet l'entendant luy repartit à la bõne foy, excusez-moy Monsieur, vous avez vne teste de veau, cela dit en l'agage Monragnais n'a rien de ridicule, pource qu'ils n'õt point d'equiuoque en ces termes, les mots qui signifient ma teste propre & la teste d'animal qui m'est donnée estants differents.

Celuy qui fait le festin & qui le distribue ne fait iamais sa part, il se contente de voir manger les autres sans se rien retenir pour soy; neantmoins quand il y a peu de viures, si tost qu'il a tiré la viande de la chaudiere, son voisin ou son amy choisit les meilleurs morceaux par courtoisie, & les met à part; puis quand tout est distribué, il les presente au distributeur mesme, luy disant vn tel, voila ton mets, il respond comme tous les autres, *hó-ô-ô*.

Ils ont quelques ceremonies, que ie n'entēds pas bien faisant festin d'vn Ours, celuy qui l'auoit tué, fit rostir les entrailles sur des branches de pin, prononçant quelques paroles que ie n'entendis pas, il y a quelque grand mystere là dedans: de plus on luy dōna l'os du cœur de l'animal, qu'il porte dans vne petite bourse matachiée, pendue à son col, faisans festin d'O-

rignac, celuy qui luy auoit donné le coup mortel, & qui faisoit le festin, apres auoir distribué la chair, ietta de la gresse dans le feu, disant: *papeouekou, papeouekou*, i'ay desia expliqué ce que cela veut dire.

Le festin distribué, si c'est à manger tout, chacun mange en silence, quoy que quelqu'un ne laissent pas de dire vn petit mot en passant: aux autres festins, encore qu'il soit permis de parler ordinairement, ils parlent fort peu, s'estonnans des François qui causent autant & plus en table qu'en autre temps: aussi nous appellent-ils des Oyes babillardes. Leurs bouches sont quasi grosses comme des œufs, & c'est le plaisir qu'ils prennent à gouter & à sauourer ce qu'ils mangent, qui leur ferme la bouche, & non l'honnesteté; Vous prendriez trop de plaisir à leur voir assaillir dās leurs grandes escuelles d'escorce, vn Castor bouilly, ou rosty, notamment quand ils viennent de la chasse, ou de leur voir étudier vn os: ie les ay veus tenir vn pied d'Orignac à deux mains, par vn bout la bouche, & les dents faisant leur deuoir de l'autre: en sorte qu'ils me sembloient vouloir iouer de ces longues flutes d'Allemagne, sinon qu'ils alloient vn peu trop fort, pour auoir long temps bonne halei-

ne: quand ce qu'ils mangent leur agrée, vous leur entendez dire de fois à autre, ainsi que i'ay desia remarqué, *tapcué nimiti-son*, en verité ie mange, cōme si on en doutoit. Voila le grand tesmoignage qu'ils rendent du plaisir qu'ils prennent à vostre festin; au reste ayant succé, rongé, brisé les os qui leurs escheent pour en tirer la gresse & la mouëlle, ils les rejettent dans la chaudiere pleine de bouillō qu'ils doivent boire par apres, il est vray qu'aux banquetts à tout manger, ils sont deliurez de cette inciuité, car il n'y a point d'os.

Ayans mangé les mets qu'on a presenté, on distribue le bouillon de la chaudiere, dont chacun boit selon sa soif, si c'est vn banquet de deuotion, c'est à dire, à ne rien laisser, quelquefois il faut aussi boire tout le bouillon; d'autrefois il suffit qu'on mange toute la viande, estant libre de boire ce qu'on voudra du bouillon. Quand le Maître du festin void qu'on cesse de manger, il dit les paroles qui terminent le banquet, qui sont celles-cy, ou autres semblables, *Egou Khé Khioniecou*; or vous vous en irez, supplé, quand il vous plaira: le festin conclud, quelques vns demeurent vn peu de temps pour discourir, d'autres s'en vont aussi tost délogeans sans trompette; c'est à

148 *Relation de la Nouvelle France*,
dire, qu'ils sortent sans dire mot, parfois
ils disent, *Nikhiouan*, ie m'en vay, on leur
respond *Niagouté*, allez à la bonne-heure,
voilà le grand excez de leurs compliments.

De leur chasse & de leur pescherie.

CHAPITRE IX.

Commençons par l'Elan, quand il y a
peu de neiges, ils le tuent à coups de
fleches, le premier que nous mangeâmes
fut ainsi mis à mort, mais c'est vn grand ha-
zard quand ils peuvent approcher de ces
animaux à la portée de leurs arcs, car ils
sentent les Sauvages de fort loing, & cou-
rent aussi viste que les Cerfs. Quand les nei-
ges sont profondes, ils poursuivent l'Elan à
la course, & le tuent à coups d'espées, qu'ils
emmanchent à delongs bastons pour cet
effect: ils dardent ces espées quand ils n'o-
sent ou ne peuvent aborder la beste, ils
poursuivent parfois deux & trois iours vn
de ces animaux, les neiges n'estant, ny as-
sez dures ny assez profondes, d'autrefois vn
enfant les tueroit quasi, car la neige venant
à se glacer apres quelque petit dégel, ou
quelque pluye, elle blesse ces pauvres Ori-
gnaux, qui ne vont pas loing sans estre
massacrez.

On m'auoit dit que l'Elan estoit grand cōme vn mulet d'Auuergne; il est vray qu'il a la teste longue cōme vn mulet, mais ie le trouue aussi gros qu'un bœuf, ie n'en ay veu qu'un seul enuie, il estoit ieune, à peine le bois ou les cornes luy sortoient de la teste, ie n'ay point veu en France, ny genisse, ny bouuillon, qui approchât de sa grosseur, ny de sa hauteur; il est haut monté comme le Cerf, son bois est haut branchu & plat en quelque façon, non rond comme celui des Cerfs, ie parle des bois que i'ay veu, peut-estre y en a-il d'autre façon. Quelqu'un m'a dit que la femelle portoit tousiours deux petits, & tousiours mâle & femelle. mes Sauvages, au contraire, disent qu'elle en porte tantost vn tantost deux, & qu'une seule fois ils en ont trouué trois dans vne femelle, ce qui les estonna comme vn prodige.

I'ay quelque pensée qu'on pourra avec le temps domestiquer ces animaux, qu'on s'en pourra seruir pour le labourage, & pour tirer des tranées sur la neige, ce seroit vn grand soulagement.

Quand les Sauvages ont tué plusieurs Elans, & passé plusieurs iours en festins, ils pensent à leur prouision & à leur seicherie, ils vous étendront sur des perches les deux costez d'un grand Orignac, en ayant osté

les os: si la chair est trop épaisse, ils la leuēt par laichent, & en outre la tailladent; afin que la fumée la desseiche & la penetre par tout, lors qu'elle commence à se seicher ou boucaner, ils la battent avec des pierres, la foulent aux pieds, afin qu'il n'y demeure dedans aucun suc qui la puisse corrompre, enfin estant bien boucané, ils la plient & la mettent en paquets, voila leur prouision, le boucan est vn pauvre manger, la chair fraische de l'Elā est fort aisée à digerer, elle ne dure point dās l'estomac; voila pourquoy les Sauvages ne la font point tant cuire: Pour le goust, il me semble que la chair d'un bœuf ne cede point à la chair d'un bon Elan.

Le Castor ou le Bieure se prend en plusieurs façons. Les Sauvages disent que c'est l'animal bien aymé des François, des Anglois, & des Basques, en vn mot des Europeans; i'entendois vn iour mon hoste qui disoit en se gaussant, *Missi picoutau amiscou*, le Castor fait toutes choses parfaitement bien, il nous faict des chaudières, des haches, des espées, des couteaux, du pain, bref il fait tout; il se mocquoit de nos Europeans qui se passionnent pour la peau de cest animal, & qui se battent à qui donnera le plus à ces Barbares, pour en auoir

iufques là que mon hofte me dit vn iour me monftrant vn fort beau couteau, les Anglois n'ont point d'efprit, ils nous donnent vingts couteaux comme celuy là pour vne peau de Caftor.

Au Printemps, le Caftor fe prend à l'at-
trappe amorcée du bois dont il mange; les
Sauuages font tres-bien entendus en ces
attrapes, lesquelles venant à fe detendre,
vne groffe pierre de bois tombe fur l'ani-
mal & l'affomme, quelquefois les chiens
rencontrant le Caftor hors la Cabane, le
poursuiuent & le prennent aifement; ie
n'ay point veu cette chaffe, mais on m'en
a parlé, & les Sauuages font grand eftat
d'un chié qui sēt & découure cēt animal.

Pendant l'Hiuer ils le prennent à la rets
& fous la glace, voicy comment; on fend
la glace en long, proche de la Cabane du
Caftor, on met par la fente vn rets & du
bois qui fert d'amorce, ce pauvre animal
venant chercher à manger s'enlace dans
ces filets faicts de bonne & forte ficelle
double, & encore ne faut il pas tarder à
les tirer, car ils feroiēt bien toft en pieces,
eftāt fortty de l'eau par l'ouuerture faite en
la glace, ils l'affōment avec vn gros baftō.

L'autre façon de le prendre fous la glace
eft plus noble, tous les Sauuages n'en ont

152 *Relation de la Nouvelle France*,
pas l'usage, mais seulement les plus habiles;
ils brisent à coups de haches la Cabane ou
maison du Castor, qui est en effect admirable,
il n'y a mousquet qui la transperce à
mon aduis, pendant l'Hiver elle est bastie
sur le bord de quelque petit fleuve, ou d'un
estang, faicte à double estage, sa figure est
ronde, les materiaux dont elle est compo-
sée sont du bois & de la terre, si bien liez &
vnis par ensemble, que j'ay veu nos Sauua-
ges en plein Hiver s'en aller pour y faire ouuer-
ture à coups de haches, l'estage d'embas est
d'as ou sur le bord de l'eau, celui d'en haut
est au dessus du fleuve, quand le froid a gla-
cé les fleuves & les estangs, le Castor se tient
retiré en l'estage d'en haut, où il a fait sa pro-
uision de bois pour manger pendant l'Hi-
uer; il ne laisse pas neantmoins de descen-
dre de cest estage en celui d'embas, & de
celuy d'embas il se glisse sous les glaces, par
des trous qui sont en ce bas estage, & qui
respondent sous les glaces: il sort pour boi-
re & pour chercher du bois qu'il mange, le-
quel croist sur la rive des estangs, & dans les
estangs mesme; ce bois par embas est pris
dans les glaces, le Castor le va couper par
dessus, & le porte en sa maison. Or les Sau-
uages ayans brisé cette maison, ces pauvres
animaux, qui sont par fois en grand nom-

bre sous vn mesme toict, s'en vont sous les glaces, qui d'vn costé, qui d'vn autre, cherchans des lieux vuides & creux entre l'eau & la glace, pour pouuoir respirer: ce que sçachans leurs ennemis, ils se vont pourmenans sur l'estang ou sur le fleuve glacé, portans vn long baston en main, armé d'vn costé d'vne tranche de fer, faite comme vn ciseau de Menuisier, & de l'autre d'vn os de Baleine, comme ie croy; ils sondent la glace avec cest os, frappans dessus & prenans garde si elle sonne creux, & si elle donne quelque indice de sa concavité, alors ils couppent la glace avec la tranche de fer, regardâs si l'eau n'est point agitée par le mouvement ou par la respiration du Castor: si l'eau remuë, ils ont vn baston recourbé qu'ils fourrent dans le trou qu'ils viennent de faire, s'ils sentent le Castor, ils le tuët avec leur grand baston, qu'ils appellent *ca ouikachit*, & le tirans de l'eau, en vont faire curée tout aussi tost, si ce n'est qu'ils ayent grande esperance d'en prendre d'autres: Je leur demandois pourquoy le Castor attendoit là qu'on le tuaist, où ira il, me disoiēt ils, sa maison est rompuë, les autres endroits où il peut respirer entre l'eau & la glace sont cassez, il demeure là dans l'eau, cherchant de l'air, cependant on l'affomme, il sort quel-

quefois par la Cabane, ou par quelque trou, mais les chiens qui sont là, & qui le sentent, & l'attendent, l'ont bien tost attrapé.

Lors qu'il y a quelque fleuve voisin, ou quelque bras d'eau conjoint à l'estang où ils sont, ils se coulēt là dedans; mais les Sauvages barrent ces fleuves quand ils les découvrent, ils cassent la glace & fichent quantité de pieux les vns pres des autres, en sorte que le Castor ne peut eua-der par là. l'ay veu de grands lacs qui fau-uoient la vie aux Castors, car nos gens ne pouuans casser tous les endroits où ils pouuoient respirer, aussi ne pouuoient ils attraper leur proye; Il y a quelquefois deux menages de Castors dans vne mesme Cabane, c'est à dire deux masles & deux femelles avec leurs petits.

La femelle en porte iusques à sept, quatre, cinq, six pour l'ordinaire, ils ont quatre dents, deux embas & deux en haut merueilleusement atermées, les autres deux sont petites, mais celles-cy sont grandes & tranchantes, ils s'en seruent pour couper les bois de leur prouision, & les bois dont ils batissent leur demeure, ils aiguissent ces dents quand elles sont emouées, les frottans & pressans les vnes contre

les autres, faifans vn petit bruit que i'ay ouïy moy-mefme.

Le Castor a le poil fort doux, les chapeaux qu'on en fait en font tefmoins, il a des pieds fort courts & fort propres pour nager, car ils ont vne peau continue entre les ongles, à la façon des oyfeaux de riuie-re, ou des loups marins, la queuë est toute platte, assez languette faicte en ouale; i'en mefuray vne d'un gros Castor, elle auoit vne paulme & huit doigts ou enuiron de longueur, & quasi vne paulme de la main en largeur, elle estoit assez épaisse, elle est couuerte, non de poil, mais d'une peau noire figurée en écailles: ce ne sont pas pourtant de vrays écailles: on prend icy le Castor pour vn animal amphiue, voila pourquoy on en mange en tout temps: ma pensée est que sa gresse fonduë approche plus de l'huile que de la gresse, la chair en est fort bonne, elle m'a semblé vn peu fade au Printemps, & non pas en Hiver; Au reste si la peau surpasse la peau du mouton, la chair de mouton surpasse à mon aduis celle de Castor; tant pource qu'elle est de meilleur goust, comme aussi que le Mouton est plus gros qu'un Castor,

Le Porc épic se prend à l'attrape & à la course, le chien l'ayant découuert, il est

mort s'il n'est bien près de son giste, qu'il faict sous de grandes roches, sous lesquelles s'estant retiré, il est en lieu d'assurance; car ny les hōmes, ny les chiens, ne se sçauroient glisser là dessous, il ne peut courre sur la neige, voila pourquoy il est bien tost assommé, & n'est guere plus gros qu'un gros cochon de lait, ses pointes ou piquérons sont blācs, longuets & assez minces, entrelassez & entremeslez d'un poil noir ou grisate: l'ay veu en France des armes où il y auoit des pointes de Porcs épics trois fois plus longues & dix fois plus grosses & biē plus fermes que celles des Porcs épics de ce païs cy: les Sauvages m'ont dit que vers le fleuve de Saguenay, tirāt vers le Nord, ces animaux y estoient bien plus gros. Ils les brulent comme nous faisons les pourceaux en France, puis les ayant raclez, les font boüillir ou rostir, le manger en est bon, assez dur neantmoins, notamment des vieux, car les ieunes sont tendres & delicats; mais ils n'approchent point, ny de nos Porcs Sangliers, ny de nos Porcs domestiques.

Cest animal a les pieds tortus, & les iette en dehors, ses piquérons ont cette qualité, s'ils piquēt un chien ou quelque persōne, ils entrent incessamment, s'insinuans ou glissans petit à petit, & s'en allans ressortir par

la partie opposée à leur entrée; par exemple s'attachans au dos de la main, ils la transperceront & sortiront par le dedans. l'ay souvent veu les chiens tous herissez de ses pointes entrées desia à demy quand leurs Maistres les retiroient. Voulant considerer le premier qu'on apporta en la Cabane où ie demeurois avec les Sauvages, ie l'empoignay par la queue, & le tiray vers moy, tous ceux qui me regardoient se mirent à rire, voyans cōme ie procedois; & de faict quoy que i'eussé tasché de le prendre dextremēt, si est-ce que quantité de ces petites lances s'attacherent a mes mains, car il n'y a aiguille si pointuë, ie les retiray aussi tost, & les iettay dans le feu.

L'Ours au Printemps se prend à l'attrape, l'Hiver ils le trouuēt dans des arbres creux où il se retire, passans plusieurs mois sans manger, & cependant il ne laisse pas d'estre fort gras, ils couppent l'arbre pour faire sortir la proye qu'ils assomment sur la neige, où bien à la sortie de son giste.

Ils prennent les Lieures au lacet, ou les tuent avec leurs arcs ou matras; i'ay desia remarqué autrefois que ces animaux sont blancs pendant les neiges, & gris en autre temps, ie les trouue vn peu plus hauts & plus pattus que ceux de France. Ils tuent les

Marthes & les Escurieux en mesme façon; voila les chasses d'animaux terrestres que j'ay veu.

Pour les oïseaux, ils en tuent quelques vns avec leurs arcs, se seruans de fleches & de Matras, mais c'est fort raremēt: depuis qu'ils ont traitté des armes à feu avec les Anglois, ils sont deuenus demy Gib-boyeurs, quelques vns d'entr'eux tirent assez bien; mon hoste est l'un de leurs meilleurs harquebusiers, ie luy ay veu tuer quelques Outardeaux, quelques Canards & Becassines, mais leur poudre est bien tost vsée.

Quand à leur pesche, ils se seruent de rets, cōme nous qu'ils traittent des François, & des Hurons: ils ont vne façon particuliere de pescher le Saulmon, mais ne m'y estant pas trouué, ie n'en diray rien.

Pour l'Anguille, ils la peschent en deux façons avec vne nasse, où avec vn harpon, Ils font des nasses avec assez d'industrie, longues & grosses, capable de tenir cinq & six cens anguilles: la mer estant basse, ils les placent sur le sable, en quelque lieu propre & reculé, les assurant en sorte que les marées ne les emportent point: aux deux costez ils ramassent des pierres qu'ils étendent comme vne chaisne ou

petite muraille de part & d'autre, afin que ce poisson qui va toujours au fond rencontrât cest obstacle, se glisse doucement vers l'emboucheure de la nasse où le conduisent ces pierres ; la mer venant à se grossir, couvre la nasse, puis se rabaisant, on la va visiter: par fois on y trouue cēt ou deux cēt Anguilles d'une marée, d'autre fois trois cēt, quelquefois point du tout, quelquefois six, huit, dix, selon les vents & les temps : Quand la mer est agitée, on en prend beaucoup, quand elle est calme, peu ou point, mais alors ils ont recours à leur harpon.

Ce harpon est vn instrument, composé d'un long baston, gros de trois doigts, au bout duquel ils attachent vn fer pointu, lequel ils armēt de part & d'autre de deux petits bastons recourbés, qui se viennent quasi ioindre au bout de la pointe du fer: quand ils viennent à frapper vne anguille de ce harpon, ils l'embrochent dans ce fer les deux bastons adjoincts, cedans par la force du coup, & laisās entrer l'anguille; puis se referrans d'eux mesme, car ils ne s'ouurent que par la secousse du coup, ils empeschent que l'anguille embrochée ne ressorte.

Cette pesche au harpon, ne se fait ordi-

160 *Relation de la Nouvelle France*,
nairement que la nuit, ils se mettēt deux
Sauuages dans vn canot, l'vn derriere qui
le gouuerne & qui rame, & l'autre est de-
uant, lequel à la faueur d'vn flambeau d'é-
corce, attaché à la prouë de son vaisseau,
s'en va cherchant la proye de ses yeux,
rodans doucement sur le bord de ce grād
fleuve, apperceuāt vne Anguille, il lance
son harpon sans le quitter, la perce com-
me i'ay dit, puis la iette dans son canot; il
y en a tel qui en prendra trois cens en vne
nuit, & bien dauantage, quelquefois fort
peu. C'est chose estrange de la quantité
de ce poisson qui se retrouue en cette grā-
de riuere, és mois de Septembre & d'O-
ctobre, & cela deuant l'habitation de nos
François, dont quelques vns de ceux qui
ont demeuré plusieurs années sur le pays,
se sont rendus aussi experts en cēt art que
les Sauuages.

On croit que cette grande abondance,
prouient de quelques lacs des pays plus
hauts, qui venans à se dégorger nous font
present de cette manne, qui nous nourrit,
non seulement tout le Carefme & autres
iours de poissons, mais aussi en autre tēps.

Les Sauuages font secherie de ces lōgs
poissons à la fumée; estans apportez dans
leurs Cabanes, ils les laissent vn peu de
temps

temps égouster, puis leur couppent la teste & la queue, ils les ouurent par le dos, puis les ayans vuidées ils les tail-
lagent afin que la fumée entre par tout:
les perches de leurs Cabanes en font
toutes chargées, estans bien boucanées,
ils les accouplent & en font de gros pa-
quets, en mettans environ vne centaine
ensemble; voila leurs viures iusques à
la neige qui leur donne de l'Orignac.

Ils tuent le Loup marin à coups de ba-
ston, le surprenant lors que sortant de
l'eauë, il se va éguayer sur quelques ro-
ches au Soleil, car ne pouuant courir, s'il
est tant soit peu esloigné de son element
il est perdu.

C'est assez pour ce chapitre, ie ne fais
pas profession de tout dire, mais seule-
ment de remarquer vne partie des cho-
ses qui m'ont semblé deuoir estre escri-
tes, qui vouldra auoir vne pleine co-
gnoissance de ces contrées, qu'il lise ce
qu'en a escrit Monsieur de Champlain,
si faut il auant que ie passe outre, que ie
dise deux mots de quatre animaux, que
ien'ay point veu en France, ie ne sçay
où les loger, siñ au bout de ce chapitre.

L'vn se nomme des Sauvages *Ouinass*.

cor, nos François l'appellent le siffleur ou le Rossignol, ils luy ont donné ce nom, pource qu'encore qu'il soit de la chasse des animaux terrestres, il chante neantmoins cōme vn oiseau, ie dirois volontiers qu'il siffle comme vne Linotte bien instruite, sinon qu'il m'est aduis qu'il ne sçait qu'une chanson, c'est à dire qu'il n'a pas vne grande varieté de tons, mais il dit tres-bien la leçon que la nature luy a apprise. Il est enuiron de la grosseur d'un Lieure, d'un poil roux; quelques vns m'ont asseuré qu'il se roule en peloton, & que comme vn Liron il dort tout l'Hiver, sans qu'on le puisse réveiller, ie n'en ay point veu quel Esté, cest animal est vn excellent manger, ny le Lieure n'en approche pas.

L'autre est vn animal basset, de la grandeur des petits chiens, ou d'un chat, ie luy donne place icy, non pour son excellence, mais pour en faire vn symbole du peché, i'en ay veu trois ou quatre, il est d'un poil noir assez beau & luisant, il porte sur son dos deux rayes toutes blanches, qui se joignās vers le col & proche de la queue, font vne ovale qui luy dōne tres belle grace; la queue est touffue &

bien fournie de poil, comme la queue d'un Regnard, il la porte retroussée, comme un Escurieux, elle est plus blanche que noire, vous diriez à l'œil notamment quant il marche, qu'il meritoit estre nommé le petit chien de Jupiter; mais il est si puant, & iette vne odeur si empestée, qu'il est indigne d'estre appelle le chien de Pluton, il n'y a voirie si infecte; ie ne l'aurois pas creu si ie ne l'aurois senty moy mesme, le cœur vous manque quasi quand vous en approchez, on en a tué deux dans nostre court; plusieurs iours apres il s'étoit si mal par tout nostre maison, qu'on n'en pouuoit supporter l'odeur. Je croy que le peché que sentit sainte Catherine de Sienne, deuoit estre de mesme puanteur.

Le troisieme est un Escurieux volant, il y en a icy de trois especes. Les uns sont communs, & sont non si beaux que ceux de France, les autres que nos François nomment Suisses, pour estre bigarrez sur le dos, sont tres-beaux & fort petits; les Escurieux volans sont assez beaux, leur excellence consiste en ce qu'ils volent; ce n'est pas qu'ils ayent des ailles, mais ils ont vne certaine peau aux

164 *Relation de la Nouvelle France*,
deux costez, qu'ils replient fort propre-
ment contre leur ventre quand ils mar-
chent, puis l'estendent quand ils volent.
Leur vol n'est pas à mon aduis de longue
haleine, i'en ay veu voler vn, il se souste-
noit fort bien en l'air, mon hoste me l'a-
uoit donné; ie le voulois enuoyer à V. R.
mais la mort, la deliuré d'un si lōg voiage

Le quatrième se nomme de nos Fran-
çois l'oiseau mouche, pource qu'a peine
est-il plus gros qu'une abeille, d'autres
l'appellent l'oiseau fleur, pource qu'il se
nourrit sur les fleurs, c'est à mon iuge-
ment l'une des grâdes raretez de ce païs
cy, & un petit prodige de la nature, Dieu
me semble plus admirable en ce petit
oiseau qu'en un grand animal, il bruit en
volant comme une abeille; ie l'ay veu
quelquefois se soutenir en l'air, becque-
tant une fleur, son bec est longuet, son
plumage me sembloit d'un verd paré;
ceux qui l'appellent l'oiseau fleur di-
roient mieux en mon iugement, le nom-
mant la fleur des oiseaux.

De leurs habits & de leurs ornements.

CHAPITRE X.

C'Estoit la pensée d'Aristote, que le
mode auoit fait cōme trois pas, pour

arriuer à la perfection qu'il possédoit de son temps. Au premier les hommes se contentoient de la vie, ne recherchant purement & simplement que les choses nécessaires & vtilles pour la conseruation. Au second ils ont conjoint le délectable avec le nécessaire, & la bien-seance avec la nécessité. On a trouué premierement les viures, puis les affaiffonnements, on s'est couuert au commencement contre la rigueur du temps, & par apres on a donné de la grace & de la gentillesse aux habits, on a fait des maisons aux premiers siècles simplement pour s'en seruir, & par apres on les a fait encore pour estre veuës. Au troisieme pas les hommes d'esprit voyans que le monde iouyssoit des choses nécessaires & douces pour la vie, ils se sont adonnez à la contemplation des choses naturelles, & à la recherche des sciences, si bien que la grande Republique des hommes s'est petit à petit perfectionnée, la nécessité marchant deuant, la bien-seance & la douceur venant apres, & les sciences tenant le dernier rang.

Or ie veux dire que nos Sauvages Montagnais & errans, ne sont encore

166 *Relation de la Nouvelle France,*
qu'au premier degré des trois que ie v.ës
de toucher, ils ne penlent qu'à viure, ils
māgent pour ne point mourir, ils se cou-
urent pour banir le froid, non pour pa-
roistre, la grace, la bien teance, la con-
noissance des arts, les sciences naturel-
les, & beaucoup moins les veritez furna-
turelles, n'ont point encore de logis en
cēt hemisphere, du moins en ces con-
trées. Ce peuple ne croit pas qu'il y ait
autre science au monde, que de viure &
de māger, voila toute leur Philosophie.
Ils s'estōnent de ce que nous faisons cas
de nos liures, puisque leur connoissance
ne nous donne point de quoy bannir la
faim, ils ne peuvent comprendre ce que
nous demandons à Dieu en nos prieres.
Demande luy, me disoient-ils, des Ori-
ginaux, des Ours & des Castors, dis luy
que tu en veux manger; & quand ie leur
disois que cela estoit peu de chose, qu'il
y auoit biē d'autres richesses à demāder,
ils se rioyent, que pourrois tu, me repon-
doient ils souhaitter de meilleur, que
de manger tō saoul de ces bonnes vian-
des? Bref ils n'ont que la vie, encore ne
l'ont-ils pas toute entiere, puisque la
famine les tuē assez souuent.

Jugez maintenant qu'elle peut-estre la gentillesse de leurs habits, la noblesse & la richesse de leurs ornements, vous prēdriez plaisir de les voir en cōpagnie: pendant l'Hiver toutes sortes d'habits leurs sont propres, & tout est commun tant aux femmes comme aux hommes; il n'y a point de difformité en leurs vestemens, tout est bon pourueu qu'il soit biē chaud. Ils sont couuerts propremēt, quand ils le sont commodement; dōnez leur vn chaperon, vne homme le portera aussi bien qu'une femme, il n'y a habit de fol dont ils ne se seruent sagement, s'ils s'en peuuent seruir chaudement: ils ne sont point comme ces Seigneurs qui s'attachent à vne couleur. Depuis qu'ils prattiquent nos Europeans, ils sont plus bigarrez que des Suisses. L'ay veu vne petite fille de six ans vestuē de la casaque de son pere, qui estoit vn grand homme, il ne falut point de Tailleur pour luy mettre cēt habit dans sa iustesse, on le ramasse à l'entour du corps, & on le lie comme vn fagot. L'un a vn bonnet rouge, l'autre vn bōnet verd, l'autre vn gris, tous faits, nō à la mode de la Cour, mais à la mode de la commodité. L'autre au-

168 *Relation de la Nouvelle France,*
ra vn chapeau que si les bords l'empes-
chent, il les couppent.

Les femmes ont pour robbe vne ca-
misolle ou vn capot, ou vne casaque, ou
vne castelogne, ou quelque peau dont
ils s'enueloppent, se lians en autāt d'en-
droits qu'il est necessaire, pour fermer
les aduennës au vent? L'vn porte vn bas
de cuir, l'autre de drap, pour le present
ils couppent leurs vieilles couuertures
ou castellongnes, pour faire des maches
& des bas de chausses. Je vous laisse à
penser si cela est bien vuidé & bien tiré;
en vn mot ie reïtere ce que i'ay desia dit,
leur proprieté est leur commodité, &
comme ils ne se couurent que contre
l'injure du tēps, si tost quel'air est chaud,
ou qu'ils entrent dans leurs Cabanes,
ils iettent leurs atours à bas, les hōmes
restās tous nuds, à la reserue d'vn brayer
qui leur cache ce qui ne peut estre veu
sans vergongne. Pour les femmes elles
quittent leur bonnet, leurs manches &
bas de chausses, le reste du corps demeu-
rant couuert. Voila l'equipage des Sau-
uages, pour le present qu'ils communi-
quent avec nos François.

Ce peuple va tousiurs teste nuë, hor-

mis dans les plus grands froids, encore y en a-il plusieurs qui ne se couurent jamais, ce qui me fait conjecturer que fort peu, se seruoient de bōnets, auant qu'ils communiquassent avec nos Europeāns, aussi n'en sçauroient ils faire, ains ils les traittent tous faits, ou du moins les font tailler à nos François. Voila pour leur coiffure, qui n'est autre que leurs cheveux, tant aux hommes qu'aux femmes, & mesme aux enfans; car ils sont testés nuës dans leur maillot.

Leurs robbes sont faictes de peaux d'Elans, d'Ours, & d'autres animaux. Les plus riches en leur estime sont faites des peaux d'une espee de petit animal noir, qui se trouue aux Hurons, il est de la grandeur d'un Lapin, le poil est doux & luisant, il entre bien une soixantaine de ces peaux dans une robbe, ils attachēt les queuës de ces animaux aux bas, pour seruir de franges, & les testés au haut pour seruir d'une espee de rebord. La figure de leur robbe est quasi quarrée, les femmes les peignent, tirant des raies du haut en bas, ces raies son également distantes & larges, enuiron de deux pouces vous diriez du passément.

Les hommes portent leurs robbes en deux façons : quand il fait vn peu chaud ils ne s'en enuoloppent point, mais ils la portent sur vn bras, & sous l'autre, ou bien estendue sur leur dos, retenue par deux petites cordes de peaux, qu'ils lient dessus leur poitrine ; ce qui n'empesche pas qu'ils ne paroissent quasi tous nuds. Quand il fait froid, ils la passent tous, hommes & femmes, sous vn bras & dessus l'épaule de l'autre, puis la croisent & s'en enuoloppent assez commodément contre le froid, mais maussadement ; car s'estans liez sous la poitrine, ils la retroussent, puis ils se lient & se garrottent vers la ceinture, ou vers le milieu du corps, ce retroussement leur faisant vn gros ventre ou vne grosse pance, dans laquelle ils mettent leurs petites besognes. J'ay veu représenter vn Careme prenant sur vn theatre en France, on luy bastit vn ventre iustement comme en portent nos Sauvages & Sauvageesses pendant l'Hiuer.

Or comme ces robbes ne couurent point leurs bras, ils se font des manches de mesme peaux, & tirent dessus ces rayes dont j'ay parlé, quelquefois de l'og,

quelquefois en rond: ces manches sont fort larges par haut, couvrant les épaules, & se venans quasi joindre derriere le dos, deux petites cordes les tiennent liées deuant & derriere, mais avec si peu de grace, qu'il n'y a fagot d'espine qui ne soit mieux trouffé qu'une femme emmitouffée dedans ces peaux. Remarquez qu'il n'y a point de distinction, de l'habit d'un homme à celui d'une femme, sinon que la femme est toujours couverte de sa robe, & les hommes la quittent ou la portent à la legere, quand il fait chaud comme j'ay dit.

Leurs bas de chausses sont de poil d'Orignac passée sans poil, c'est la nature & non l'art, qui en a trouué la façon, ils sont tout d'une venue, suffit que le pied & la jambe y passent, pour estre bien faits, ils n'ont point l'invention d'y mettre des coins, ils sont faits comme des bas à botter, retenus sous le pied avec une petite cordelette. La cousture qui n'est quasi qu'un faux fil, ne se treuve pas derriere les jambes, mais entre-deux; les cousans, ils laissent passer un rebord de la peau mesme, qu'ils découpent en frange, apres laquelle ils attachent par

fois quelques matachias; ces bas sont assez longs, notamment pardeuant: car ils laissent vne piece qui passe bien haut, & qui couure vne grande partie de la cuisse, au plus haut de cette piece sont attachées de petites cordes, qu'ils lient à vne ceinture de peau, qu'ils portēt tous dessus leurs chairs.

Leurs souliers ne sont pas durs comme les nostres, aussi n'ont-ils pas l'industrie de tancer le cuir; nos gands de cerf, sont d'une peau plus ferme ou du moins aussi ferme que leurs peaux d'Orignac, dont ils font leurs souliers, encore faut ils qu'ils attendent que ces peaux ayent seruy de robbes, & qu'elles soient toutes grasses, autrement leurs souliers se retireroient à la moindre approche du feu, ce qu'ils ne laissent pas de faire tous gras qu'ils soient quād on les chauffe vn peu de trop près. Au reste, ils boient l'eau comme vne éponge, si biē que les Sauvages ne s'en seruēt pas contre cēt Element, mais bien cōtre la neige & contre le froid. Ce sont les femmes qui sont cousturieres & cordonnieres, il ne leur coute rien pour apprendre, ce mestier, encore moins pour auoir des

lettres de maistrise; vn enfant qui scauroit vn peu coudre en feroit à la premiere veuë, tant il y a d'inuention.

Ils les font fort amples & fort capables, notamment l'Hiuër, pour les garnir contre le froid, ils se seruent ordinairement d'une peau de Lieure, ou d'une piece de quelque couuerture, pliée en deux & trois doubles. Ils mettent avec cela du poil d'Orignac, & puis ayans enveloppé leurs pieds de ces haillons, ils chaussent leurs souliers, & par fois deux paires l'une dessus l'autre, ils les lient & les arrestent sur le coudepié, avec vne petite corde, qui regne tout à l'entour des coins du Soulier. Pendant les neiges nous nous seruons tous, François & Sauvages de cette sorte de chaussure, afin de pouuoir marcher sur des Raquettes; l'Hiuër passé nous reprenons nos souliers François, & eux vont pieds nuds.

Voila non pas tout ce qui se peut dire de leurs habits & de leurs ornements, mais ce que i'en ay veu, & qui me vient pour l'heure en la pensée; i'oubliois à dire, que ceux qui peuuent auoir ou troquer des chemises de nos François, s'en seruent à la nouvelle façon; car au lieu

174 *Relation de la Nouvelle France*,
de les mettre comme nous par dessous,
ils les mettent par dessus tous leurs ha-
bits, & comme jamais ils ne les essuyent,
elles sont en moins de rien grasses com-
me des torchons de cuisine, c'est ce
qu'ils demandent, car l'eau, disent ils,
coule là dessus, & ne penetre pas iusqu'à
leurs robbes.

De la langue des Sauvages Montagnais.

CHAPITRE XI.

I'Escriuy l'an passé; que leur langue
estoit tres-riche & tres-pauvre; toute
pleine d'abondance & de disette; la
pauvreté paroist en mille articles. Tous
les mots de pieté, de deuotion, de vertu;
tous les termes dont on se sert pour ex-
pliquer les biens de l'autre; le langage
des Theologiens, des Philosophes, des
Mathematiciens, des Medecins, en vn
mot de tous les hommes doctes; toutes
les paroles qui concernent la police &
le gouuernement d'une ville, d'une Pro-
vince, d'un Empire; tout ce qui touche
la iustice, la recompense & le chastimēt,
les noms d'une infinité d'arts, qui sont
en nostre Europe, d'une infinité de fleurs

d'arbres & de fruits, d'une infinité d'animaux de mille & mille inventions, de mille beautez & de mille richesses; tout cela ne se trouve point ny dans la pensée, ny dans la bouche des Sauvages, n'ayans ny vraye religion ny connoissance des vertus, ny police, ny gouvernement, ny Royaume, ny République, ny sciences, ny rien de tout ce que ie viens de dire, & par consequent, toutes les paroles, tous les termes, tous les mots & tous les noms qui touche ce monde de biens & de grandeurs, doivent estre defalquez de leur dictionnaire; voila une grande disette. Tournons maintenant la medaille, & faisons voir que cette langue regorge de richesses.

Premierement ie trouve une infinité de noms propres parmy eux, que ie ne puis expliquer en nostre françois, que par circumlocutions.

Secondement, ils ont de Verbes que ie nomme absolus, dont ny les Grecs, ny les Latins, ny nous, ny les langues d'Europe, dont ie ne me suis enquis, n'ont rien de semblable, par exemple ce Verbe *Nimitison*, signifie absolument ie mange, sans dire quoy, car si vous determinez, la

176 *Relation de la Nouvelle France* ;
chose que vous mangez , il se faut servir
d'un autre Verbe.

Tiercement , ils ont des Verbes diffé-
rents , pour signifier l'action enuers vne
chose animée , & enuers vne chose ina-
nimée , encore bien qu'ils conjoignent
avec les choses animées , quelques nom-
bres des choses sans ame , cōme le petun,
les pommes , &c. donnons des exemples.
Je vois vn homme , *Niouapaman iriniou* ,
je vois vne pierre , *niousabatē* , ainsi en Grec ,
en Latin , & en François , c'est vn mesme
Verbe , pour dire je vois vn homme , vne
pierre , & toute autre chose . Je frappe vn
chiē *ni noutinau attimou* , je frappe vn bois ,
ninoutinen misticou . Ce n'est pas tout : car si
l'actiō se termine à plusieurs choses ani-
mées , il faut vn autre Verbe , je vois des
hōmes *niousapamaoueth irinioueth* , *ninoutinao-
ueth attimoueth* , & ainsi de tous les autres .

En quatrième lieu , ils ont des Verbes
propres pour signifier l'action qui se ter-
mine à la personne reciproque , & d'au-
tres encore qui se terminent aux cho-
ses qui luy appartiennent , & l'on ne pūt
se servir des Verbes enuers les autres
personnes non reciproques sans parler
impropremēt . Je me fais entendre le Ver-
be *Nitaouin*

esitaouin, signifie, ie me fers de quelque chose, nitaouin agouniscouefon, ie me fers d'un bonnet: que si ie viens à dire, ie me fers de son bonnet, sçauoir est du bonnet de l'homme, dont on parle, il faut changer de verbe, & dire Nitao-
uouan outagoumiscoudhon: que si c'est vne chose animée il faut encor changer le verbe, par exemple, ie me fers de son chien, nitaouiduan ôtaimai, & remarquez que tous ces verbes ont leurs meufs, leurs temps, & leurs personnes, & que leurs conjugaisons sont dissemblables s'ils different de terminaisons. Ceste abondance n'est point dās les langues d'Europe, ie le sçay de quelques vnes, ie le coniecture des autres.

6. En cinquiesme lieu, ils se seruent d'autres mots sur la terre, d'autres mots sur l'eau pour signifier la mesme chose. Voicy comment, ie veux dire, i'arriuay hier, si c'est par terre, il faut dire nitagochinin outagouchi, si c'est par eau, il faut dire nimichagan outagouchi: ie veux dire, i'ay esté mouillé de la pluye, si ç'a esté cheminant sur terre, il faut dire nikimiouanoutan, si c'est faisant chemin, par eau nikimiouahen, ie vay querir

178 *Relation de la Nouvelle France*,
quelque chose, si c'est par terre, il faut
dire *ninaten*, si c'est par eau *ninaben*:
si c'est vne chose animée & par terre,
il faut dire *ninatau*: si c'est vne chose
animée & par eau, il faut dire *ninahouau*:
si c'est vne chose animée qui appartin-
ne à quelqu'un, il faut dire *ninahimouau*:
si elle n'est pas animée *niuahimouan*,
quelle variété? nous n'avons en François
pour tout cela qu'un seul mot, ie vay
querir, auquel on adiouste pour distin-
ction par eau, ou par terre.

En sixiesme lieu, vn seul de nos ad-
iectifs en François se conioint avec tous
nos substantifs, par exemple, nous di-
sons le pain est froid, le petun est froid,
ce fer est froid; mais en nostre Sauvage
ces adiectifs changent selon les diuerfes
especes des substantifs, *tabiscan assini*,
la pierre est froide, *tacabissiou nous-*
pouagan, mon petunoir est froid,
takhissiou khichtemau, ce petun est froid,
tacascouan misticou, le bois est froid, si
c'est quelque grande piece *tacascou-*
chan misticou, le bois est froid, *sicar-*
chion attimou, ce chien a froid; voila
vne estrange abondance.

Remarquez en passant, que tous ces

adjectifs, voire mesme que tous les noms substantifs se conjuguent comme les verbes Latins impersonnels, par exemple, *tabiscan assini*, la pierre est froide, *tabiscaban*, elle estoit froide, *cata tabiscan*, elle sera froide, & ainsi du reste *Noutaoui*, c'est vn nom substantif, qui signifie mon pere, *noutaouiban*, c'estoit mon pere, ou bien deffunct mon pere, *Cata noutaoui*, il sera mon pere, si on pouuoit se seruir de ces termes.

En septiesme lieu, ils ont vne richesse si importune qu'elle me iette quasi dans la creance que ie seray pauvre toute ma vie en leur langue. Quand vous cognoissez toutes les parties d'Oraison des langues qui florissent en nostre Europe, & que vous sçauiez comme il les faut lier ensemble, vous sçauiez la langue, il n'en est pas de mesme en la langue de nos Sauvages, peuplez vostre memoire de tous les mots qui signifient chaque chose en particulier, apprenez le nœud ou la Syntaxe qui les allie, vous n'estes encor qu'un ignorant, vous pourrez bien avec cela vous faire entendre des Sauvages, quoy que non pas tousiours, mais vous ne les en-

180 *Relation de la Nouvelle France,*
tendez pas : la raison est, qu'outre les
noms de chaque chose en particulier
ils ont vne infinité de mots qui signi-
fient plusieurs choses ensemble : si ie
veux dire en François le vent pousse la
neige, suffit que i'aye cognoissance de
ces trois mots, du vent, du verbe, ie
pousse, & de la neige, & que ie les sça-
che conioindre, il n'en est pas de mesme
icy. Je sçay comme on dit le vent rou-
tin, comme on dit il pousse vne chose
noble comme est la neige en l'estime des
Sauuages, c'est yakhineou, ie sçay com-
me on dit la neige, c'est couné, que si ie
veux conioindre ces trois mots Routin
rakhineou couné, les Sauuages ne m'en-
tendront pas, que s'ils m'entendent ils
se mettront à rire, pource qu'ils ne par-
lent pas comme cela, se seruans de ce
seul mot piouan, pour dire le vent pous-
se ou fait voler la neige : de mesme le
verbe niscatchin signifie i'ay froid, ce
nom nissitai signifie mes pieds, si ie dis
niscatchin nissitai pour dire i'ay froid
aux pieds, ils pourront bien m'entendre,
mais ie ne les entēdray pas quād ils dirōt
Nitatagouasifin, qui est le propre mot
pour dire i'ay froid aux pieds : & ce qui

tuë vne memoire, ce mot n'est parent, ny allié, ny n'a point d'affinité en sa consonance avec les deux autres, d'où prouiet que ie les fais souuēt rire en parlant, en voulant suiure l'œconomie de la langue Latine, ou Françoisse, ne sçachant point ces mots qui signifient plusieurs choses ensemble ? D'icy prouient encore, que bien souuent ie ne les entends pas, quoy qu'ils m'entendent : car ne se seruans pas des mots qui signifient vne chose simple en particulier, mais de ceux qui en signifient beaucoup à la fois, moy ne sçachant que ces premiers, & non encor à demy, ie ne les sçauois entendre s'ils n'ont de l'esprit pour varier & choisir les mots plus communs, car alors ie tâche de m'en demesler.

10. C'est assez pour monstrier l'abondance de leur langue, si ie la sçauois parfaitement i'en parlerois avec plus d'assurance ; ie croy qu'ils ont d'autres richesses que ie n'ay peu encor decouurir iusques icy.

11. I'oubliois à dire que nos Montagnars n'ont pas tant de lettres en leur Alphabeth, que nous en auons au nostre, ils confondent le B. & le P. ils con-

182 *Relation de la Nouvelle France,*
fondent aussi le C. le G. & le K. c'est à
dire que deux Sauvages prononçans vn
mesme mot, vous croiriez que l'vn pro-
uonce vn B. & que l'autre prononce vn
P. que l'vn dit vn C. ou vn K. & l'autre
vn G. ils n'ont point les lettres F, L, V,
consonante X. Z. ils prononcent vn R.
au lieu d'vn L. ils diront Monsieur du
Pressi pour Monsieur du Plessi, ils pro-
noncent vn P. au lieu d'vn V. conso-
nante, Monsieur Olipier pour Monsieur
Oliuier; mais comme ils ont la langue
assez bien penduë, ils prendroient bien-
tost nostre prononciation si on les in-
struisoit, notamment les enfans.

Le P. Brebeuf m'a dit que les Hu-
rons n'ont point de M. dequoy ie m'e-
stonne: car ceste lettre me semble quasi
naturelle, tant l'vsage en est grand.

Que si pour conclusion de ce Cha-
pitre V. R. me demande si i'ay beau-
coup auancé dans la cognoissance de
ceste langue pendant mon hyuerne-
ment avec ces Barbares, ie luy diray in-
genuëment que non: en voicy les rai-
sons.

Premierement, le deffaut de ma me-
moire qui ne fut iamais bien excellen-

te, & qui se va deſeichant tous les iours.
O l'excellent homme pour ces pays icy
que le Pere Brebeuf, ſa memoire tres-
heureuſe, ſa douceur tres-aymable, fe-
ront de grands fruiſts dedans les Hu-
rons.

Secondement, la malice du ſor-
cier qui defendoit par fois qu'on m'en-
ſeignast.

Tiercement, la perfidie de l'Apo-
ſtat, qui contre ſa promeſſe, & nonob-
ſtant les offres que ie luy faiſois, ne m'a
iamais voulu enſeigner, voire ſa dé-
loyauté eſt venue iuſques à ce point de
me donner exprez vn mot d'une ſigni-
fication pour vn autre.

En quatrieſme lieu, la famine a
eſté long temps noſtre hoſteſſe, ie n'o-
ſois quaſi en ſa preſence interroger nos
Sauuages, leur eſtomach n'eſt pas de la
nature des tonneaux qui reſonnēt d'au-
tant mieux qu'ils ſont vuides, il reſſem-
ble au tambour, plus il eſt bandé mieux
il parle.

En cinqueſme lieu, mes maladies
m'ont fait quitter le ſoing des langues
de la terre pour penſer au langage de
l'autre vie où ie penſois aller.

19. En sixiesme lieu, enfin la difficulté de ceste langue qui n'est pas petite, comme on peut coniecturer de ce que j'ay dit, n'a pas esté vn petit obstacle pour empescher vne pauvre memoire comme la mienne d'aller bien loing. Je iargonne neantmoins, & à force de crier ie me fais entendre.

Vn point me toucheroit viuement, n'estoit que li'estime qu'il ne faut pas marcher deuant Dieu, mais qu'il faut le suiure, & se contenter de sa propre bassesse; c'est que ie ne croy quasi pas pouoir iamais parler les langues des Sauvages avec autant de liberté qu'il seroit necessaire pour leur prescher, & répondre sur le champ sans broncher, à leurs demandes & à leurs obiections, estant notamment occupé comme j'ay esté iusques à present. Vray que Dieu peut faire d'une roche vn enfant d'Abraham. Qu'il soit beny à iamais par toutes les langues des nations de la terre.

CHAPITRE XII.

*De ce qu'il faut souffrir hyuernant avec
les Sauvages.*

1. **E** Pietete dit que celuy qui veut aller aux bains publics, se doit au prealable figurer toutes les insolences qui s'y commettent, afin que se trouuant engagé dans la risée d'un tas de canailles, qui luy laueront mieux la teste que les pieds, il ne perde rien de la gratuité & de la modestie d'un homme sage. Je dirois volontiers le mesme à qui Dieu donne les pensées, & les desirs de passer les mers, pour venir chercher & instruire les Sauvages: c'est en leur faueur que ie coucheray ce Chapitre, afin qu'ayant cogneu l'ennemy qu'ils auront en teste, ils ne s'oublient pas de se munir des armes necessaires pour le combat, notamment d'un patience de fer ou de bronze, ou plustost d'une patience toute d'or, pour supporter fortement & amoureusement les grands traux qu'il faut souffrir parmy ces peuples. Com-

186 *Relation de la Nouvelle France,*
mençons par la maison qu'ils doiuent
habiter s'il les veulent suiure.

Pour conceuoir la beauté de cest
edifice, il en faut décrire la structure;
i'en parleray avec science: car i'ay sou-
uent aydé à la dresser. Estans donc arri-
uez au lieu où nous deuions camper,
les femmes armées de haches s'en al-
loient çà & là dans ces grandes forests
coupper du bois pour la charpente de
l'hostellerie où nous voulions loger, ce
pendant les hommes en ayans designé
le plan, vuidoient la neige avec leurs ra-
quilles, ou avec des pelles qu'ils font &
portent exprez pour ce sujet: figurez
vous donc vn grand rond, ou vn quarré
dans la neige, haute de deux, de trois,
ou de quatre pieds, selon les temps, ou
les lieux où on cabane; ceste profon-
deur nous faisoit vne muraille blanche,
qui nous enuironnoit de tous costez,
excepté par l'endroit où on la fendoit
pour faire la porte: la charpente appor-
tée, qui consiste en quelque vingt ou
trente perches, plus ou moins, selon la
grandeur de la cabane, on la plante, non
sur la terre, mais sur le haut de la neige,
puis on iette sur ces perches qui s'ap-

prochent vn petit par en haut, deux ou trois rouleaux d'écorces cousuës ensemble, commençant par le bas, & voila la maison faite, on couure la terre, comme aussi ceste muraille de neige qui regne tout à l'entour de la cabane, de petites branches de pin, & pour dernière perfection, on attache vne méchante peau à deux perches pour seruir de porte, dont les iambages sont la neige mesme. Voyons maintenant en détail toutes les commoditez de ce beau Loure.

Vous ne sçauriez demeurer de bout dans ceste maison, tant pour sa bassesse, que pour la fumée qui suffoqueroit, & par consequent il faut estre tousiours couché ou assis sur la platte terre, c'est la posture ordinaire des Sauvages: de sortir de hors, le froid, la neige, le danger de s'égarer dans ces grâds bois, vous font rentrer plus vite que le vent, & vous tiennent en prison dans vn cachot, qui n'a ny clef ny serrure.

Ce cachot, outre la posture facheuse qu'il y faut tenir sur vn liët de terre, a quatre grandes incommoditez, le froid, le chaud, la fumée & les chiens:

Pour le froid vous avez la teste à la neige, il n'y a qu'une branche de pin entre deux, bien souvent rien que vostre bonnet, les vents ont liberté d'entrer par mille endroicts : car ne vous figurez pas que ces écorces soient jointes comme vn papier colé sur vn chassis, elles ressemblent bien souvent l'herbe à mille pertuis, sinon que leurs trous & leurs ouvertures sont vn peu plus grandes, & quand il n'y auroit que l'ouverture d'en haut, qui sert de fenestre & de cheminée tout ensemble, le plus gros hyuer de France y pourroit tous les iours passer tout entier sans empressement. La nuit estant couché ie contemplois par ceste ouverture & les Estoilles & la Lune, autant à découuert que si i'eusse esté en pleine campagne.

5. Or cependant le froid ne m'a pas tant tourmenté que la chaleur du feu, vn petit lieu, comme sont leurs cabanes, s'échauffe aisément par vn bon feu, qui me rotissoit par fois & me grilloit de tous costez, à raison que la cabane estant trop estroite, ie ne sçauois comment me deffendre de son ardeur, d'aller à droite ou à gauche, vous ne sçau-

riez : car les Sauvages qui vous sont voisins occupent vos costez, de reculer en arriere, vous rencontrez ceste muraille de neige, ou les écorces de la cabane qui vous bornent, ie ne sçauois en quelle posture me mettre, de m'estendre, la place estoit si estroite que mes iambes eussent esté à moitié dans le feu ; de me tenir en ploton, & tousiours racourcy cōme ils font, ie ne pouuois pas si long temps qu'eux : mes habits ont esté tout rostis & tout bruslez. Vous me demanderez peut estre si la neige que nous auions au dos ne se fondoit point quand on faisoit bon feu : ie dis que non, que si par fois la chaleur l'amolissoit tant soit peu, le froid la durcissoit en glace. Or ie diray neantmoins que le froid ny le chaud n'ont rien de tolerable, & qu'on trouue quelque remede à ces deux maux.

6. Mais pour la fumée, ie vous confesse que c'est vn martyre, elle me tuoit, & me faisoit pleurer incessamment sans que i'eusse ny douleur ny tristesse dans le cœur, elle nous terrassoit par fois toustant que nous estions dans la cabane, c'est à dire qu'il falloit mettre la

190 *Relation de la Nouvelle France,*
bouche contre terre pour pouuoir res-
pirer: car encor que les Sauvages soient
accoustumez à ce tourment, si est-ce
que par fois il redoubloit avec telle vio-
lence, qu'ils estoient contraincts aussi
bien que moy de se coucher sur le ven-
tre, & de manger quasi la terre pour ne
point boire la fumée: i'ay quelque fois
demeuré plusieurs heures en ceste situa-
tion, notamment dans les plus grands
froids, & lors qu'il neigeoit: car c'estoit
en ces temps là que la fumée nous af-
failloit avec plus de fureur, nous faifif-
fant à la gorge, aux naseaux, & aux yeux:
que ce breuuage est amer! que ceste
odeur est forte! que ceste vapeur est
nuisible à la veüe! i'ay creu plusieurs fois
que ie m'en allois estre aveugle, les
yeux me cuisoient comme feu, ils me
pleuroient ou distilloient comme vn
alambique, ie ne voyois plus rien que
confusément, à la façon de ce bon hom-
me, qui disoit, *video homines velut arbores
ambulantes*. Je disois les Pseaumes de
mon Breuiare comme ie pouuois, les
sçachans à demy par cœur, i'attendois
que la douleur me donnast vn peu de
relasche pour reciter les leçons, & quād

ie venois à les lire elles me sembloient écrites en lettres de feu, ou d'écarlatte, i'ay souuent fermé mon liure n'y voyant rien que confusion qui me bleffoit la veüe.

Quelqu'un me dira que ie deuois sortir de ce trou enfumé, & prendre l'air, & ie luy réponderay, que l'air estoit ordinairement en ce temps-là si froid, que les arbres qui ont la peau plus dure que celle de l'homme, & le corps plus solide, ne luy pouuoient resister, se fendans iusques au cœur, faifans vn bruit comme d'un mousquet en s'éclatans: ie sortois neantmoins quelque fois de ceste taniere, fuyant la rage de la fumée pour me mettre à la mercy du froid, contre lequel ie taschois de m'armer, m'enueloppant de ma couuerture comme vn Irlandois, & en cet equipage assis sur la neige, ou sur quelque arbre abbatu, ie recitois mes Heures: le mal estoit que la neige n'auoit pas plus de pitié de mes yeux que la fumée.

Pour les chiens que i'ay dit estre l'une des incommoditez des maisons des Sauvages, ie ne sçay si ie les dois blâmer: car ils m'ont rendu par fois de bons

192 *Relation de la nouvelle France,*
seruices, vray qu'ils tiroient de moy la
mesme courtoisie qu'ils me prestoient,
si bien que nous nous entr'aydions les
vns les autres, faisans l'emblemme de *mu-
tuum auxilium*, ces pauvres bestes ne
pouuans subsister à l'air, hors la cabane
se venoient coucher tantost sur mes
épaules, tantost sur mes pieds, & com-
me ie n'auois qu'une simple castalogne
pour me seruir de mattelas & de cou-
verture tout ensemble, ie n'estois pas
marry de cet abry, leurs rendans volon-
tiers vne partie de la chaleur que ie ti-
rois d'eux : il est vray que comme ils
estoyent grands & en grand nombre, ils
me pressoient par fois & m'importu-
noient si fort, qu'en me donnant vn peu
de chaleur, ils me déroboient tout mon
sommeil, cela estoit cause que bien sou-
uant ie les chassois, en quoy il m'arriua
certaine nuit vn traict de confusion &
de risée : car vn Sauvage s'estant ietté
sur moy en dormant, moy croyant que
ce fust vn chien, rencontrant en main
vn baston, ie le frappe m'écriant, Aché,
Aché, qui sont les mots dont ils se ser-
uent pour chasser les chiens, mon hom-
me s'éueille bien estonné pensant que
tout

tout fut perdu; mais s'estant pris garde d'où venoient les coups: tu n'as point d'esprit, me dit-il, ce n'est pas vn chien, c'est moy: à ces paroles ie ne scay qui resta le plus estonné de nous deux, ie quittay doucement mon baston, bien marry de l'auoir trouué si pres de moy.

Retournons à nos chiens, ces animaux estans affamez, d'autant qu'ils n'auoient pas de quoy māger non plus que nous, ne faisoient qu'aller & venir, roder par tout dans la cabane: or comme on est souuēt couché aussi bien qu'assis dans ces maisons d'écorce, ils nous passoient souuent & sur la face & sur le ventre, & si souuent, & avec telle importunité, qu'estant las de crier & de les chasser, ie me couurois quelque fois la face, puis ie leur donnois liberté de passer par où ils voudroient: s'il arriuoit qu'on leur iettast vn os, aussi tost s'estoit de courre apres à qui l'auroit, culbutans tous ceux qu'ils rencontroient assis, s'ils ne se tenoient bien fermes; ils m'ont par fois renuersé & mon écuelle d'écorce, & tout ce qui estoit dedans sur ma sotane. Je soufriois quand il y suruenoit quelque querelle parmy-eux lors que

nous disions : car il n'y auoit celuy qui ne tint son plat à deux belles mains contre la terre, qui seruoit de table, de siege & de liét, & aux hommes & aux chiens : c'est de là que prouenoit la grande incommodité que nous receuions de ces animaux, qui portoient le nez dans nos écuelles plustost que nous n'y portions la main. C'est assez dit des incommoditez des maisons des Sauuages, parlons de leurs viures.

Au commencement que ie fus avec eux, comme ils ne faient ny leurs bouillons ny leurs viandes, & que la saleté mesme fait leur cuisine, ie ne pouuois manger de leur salmigondies, ie me contentois d'un peu de galette & d'un peu d'anguille bouccanée, iusques là que mon hoste me tançoit de ce que ie mangeois si peu, ie m'affamay deuant que la famine nous acceüillist, cependant nos Sauuages faisoient tous les iours des festins, en sorte que nous nous vismes en peu de temps sans pain, sans farine, & sans anguilles, & sans aucun moyen d'estre secourus : car outre que nous estions fort auant dans les bois, & que nous fussions morts mille fois de-

uant que d'arriuer aux demeures des François, nous hyuernions de là le grād fleuve qu'on ne peut trauerser en ce temps là pour le grand nombre de glaces qu'il charie incessamment, & qui mettroient en pieces non seulement vne chalouppe, mais vn grand vaisseau, pour la chasse; comme les neiges n'estoient pas profondes à proportion des autres années, ils ne pouuoient pas prendre l'Elan, si bien qu'ils n'apportoient que quelques Castors, & quelques Porcs epics, mais en si petit nombre, & si peu souuent, que cela seruoit plu-
stost pour ne point mourir que pour viure. Mon hoste me disoit dans ces grandes disettes, *Chibiné* aye l'ame dure resiste à la faim, tu feras par fois deux iours, quelque fois trois ou quatre sans manger, ne te laisse point abbattre, préd courage, quand la neige sera venuë nous mangerons: nostre Seigneur n'a pas voulu qu'ils fussent si long temps sans rien prendre; mais pour l'ordinaire nous mangions vne fois en deux iours, voire assez souuent ayans mangé vn Castor le matin, le lendemain au soir nous mangions vn Porc-epic gros comme

196 *Relation de la Nouvelle France,*
vn Cochon de lait : c'estoit peu à dix-
neuf personnes que nous estions , il est
vray; mais ce peu suffisoit pour ne point
mourir. Quand ie pouuois auoir vne
peau d'Anguille pour ma journée sur la
fin de nos viures, ie me tenois pour bien
d'icuné, bien disné, & bien soupé.

Au commencement ie m'estois ser-
uy d'une de ces peaux pour refaire vne
sotane de toille que i'auois sur moy, ayāt
oublié de porter des pieces, mais voyāt
que la faim me pressoit si fort, ie man-
geay mes pieces, & si ma sotane eust esté
de mesme estoffe, ie vous répond que ie
l'eusse rapportée bien courte en la mai-
son : ie mangeois bien les vieilles peaux
d'Orignac, qui sont bien plus dures que
les peaux d'Anguilles, i'allois dans les
bois brouter le bout des arbres & ron-
ger les écorces plus tendres, comme ie
remarqueray dans le iournal. Les Sau-
uages qui nous estoient voisins, souf-
froient encore plus que nous, quelques-
uns nous venans voir, nous disoient que
leurs camarades estoient morts de faim,
i'en vy qui n'auoient mangé qu'une fois
en cinq iours, & qui se tenoient bien
heureux quand ils trouuoient de quoy

disner au bout de deux, ils estoient faits comme des squelets, n'ayans plus que la peau sur les os, nous faisions par fois de bons repas; mais pour vn bon disner, nous nous passions trois fois de souper. Vn ieune Sauvage de nostre cabane, mourant de faim, comme ie diray au Chapitre suiuant, ils me demandoient souuent si ie ne craignois point, si ie n'auois point peur de la mort, & voyans que ie me monstrois assez asseuré ils s'en estonnoient, notamment en certain temps que ie les vis quasi tomber dans le desespoir. Quand ils viennent iusques-là, ils ioüent pour ainsi dire à sauue qui peut, ils iettent leurs écorces, & leur bagage, ils s'abandonnent les vns les autres, & perdans le soin du public, c'est à qui trouuera de quoy viure pour soy; alors les enfans, les femmes, en vn mot ceux qui ne scauroient chasser meurent de froid & de faim, s'ils en fussent venus à ceste extremité ie serois mort des premiers.

Voila ce qu'il faut preuoir auant que de se mettre à leur suite: car encor qu'ils ne soient pas tous les ans pressez de ceste famine, ils en eurent tous les

198 *Relation de la Nouvelle France,*
ans les dangers puis qu'ils n'ont point à
manger, ou fort peu, s'il n'y a beaucoup
de neige & beaucoup d'Orignaux, ce
qui n'arriue pas tousiours.

Que si vous me demandez mainte-
nant quels estoient mes sentimens dans
les afres de la mort, & d'une mort si
langoureuse comme est celle qui pro-
vient de la famine, ie vous diray que i'ay
de la peine à répondre; neantmoins afin
que ceux qui liront ce Chapitre, n'ap-
prehendent point de nous venir secou-
rir, ie puis asseurer avec verité que ce
temps de famine m'a esté vn temps d'a-
bondance. Ayant recogneu que nous
commencions à floter entre l'esperance
de la vie & la crainte de la mort, ie fis
mon conte que Dieu m'auoit condam-
né à mourir de faim pour mes pechez, &
baissant mille fois la main qui auoit mi-
nuté ma sentence, i'en attendois l'ex-
cution avec vne paix & vne ioye qu'on
peut bien sentir, mais qu'on ne peut
décrire: ie confesse qu'on souffre, &
qu'il se faut resoudre à la Croix: mais
Dieu fait gloire d'ayder vne ame quand
elle n'est plus secouruë des creatures.
Poursuiuons nostre chemin.

Après ceste famine nous eufmes quelques bons iours, la neige qui n'estoit que trop haute pour auoir froid, mais trop basse pour prendre l'Orignac, s'estant grandement accreuë sur la fin de Ianuier, nos Chasseurs prirent quelques Orignaux, dont ils firent seiche-rie: or soit que mon intemperance, ou que ce boucan dur comme du bois, & sale comme les ruës fut contraire à mon estomach, ie tombay malade au beau commencement de Feurier, me voila donc contraint de demeurer tousiours couché sur la terre froide, ce n'estoit pas pour me guerir des tranchées fort sensibles qui me tourmentoient, & qui me contraignoient de sortir à toute heure iour & nuict, m'engageant à chaque sortie dedans les neiges iusques aux genoux, & parfois quasi iusques à la ceinture, notamment au commencement que nous nous estions cabanez en quelque endroit, ces douleurs sensibles me durèrent enuiron huict ou dix iours, comme aussi vn grand mal d'estomach, & vne foiblesse de cœur qui se répan- doit par tout le corps, ie guaray de ceste maladie, non pas tout à fait: car ie ne fis

200 *Relation de la Nouvelle France,*
que traifner iufques à la my-Carefme
que le mal me reprit. Je dis cecy pour
faire voir le peu de fecours qu'on doit
attendre des Sauvages quand on eft ma-
lade : eftant vn iour prefle de la foif ie
demanday vn peu d'eau, on me répon-
dit qu'il n'y en auoit point & qu'on me
donneroit de la neige fonduë fi i'en
voulois: comme ce breuuage eftoit con-
traire à mon mal, ie fis entendre à mon
hôte que i'auois veu vn lac nō pas loing
de là, & que i'en euſſe bien voulu auoir
vn peu d'eau, il fit la fourde oreille à
cauſe que le chemin eftoit vn peu faſ-
cheux, ſi bien que non ſeulement ceſte
fois; mais encore en tous les endroits
que quelque fleuve ou quelque ruiſ-
ſeau eftoit vn peu trop eſloigné de no-
ſtre cabane, il falloir boire de ceſte nei-
ge fonduë dans vne chaudiere, dont le
cuiure eftoit moins épais que la ſaleté:
qui voudra ſcauoir l'amertume de ce
breuuage qu'il le tire d'vn vaiſſeau ſor-
tant de la fumée & qu'il en gouſte.

Quant à la nourriture, ils partagent
le malade comme les autres; ſ'ils pren-
nent de la chair freſche, ils luy en don-
nent ſa part ſ'il en veut, ſ'il ne la mange,

pour lors on ne se met pas en peine de luy en garder vn petit morceau quand il voudra manger, on luy donnera de ce qu'il y aura pour lors en la cabane, c'est à dire du boucan & non pas du meilleur: car ils le reseruent pour les festins, si bien qu'un pauvre malade est contraint bien souuent de manger parmy eux, ce qui luy feroit horreur dans la santé mesme s'il estoit avec nos François. Vne ame bien alterée de la soif du Fils de Dieu, ie veux dire des souffrances, trouueroit icy dequoy se rassasier.

Il me reste encore à parler de leur conuersation, pour faire entierement cognoistre ce qu'on peut souffrir avec ce peuple. Ie m'estois mis en la compagnie de mon hoste & du Renegat, à condition que nous n'hyuernerions point avec le Sorcier, que ie cognoissois pour tres-meschant homme, ils m'auoient accordé ces conditions, mais ils furent infidelles, ne gardans ny l'une ny l'autre: ils m'engagerent donc avec ce pretendu Magicien, comme ie diray cy apres; or ce miserable homme, & la fumée m'ont esté les deux plus grands tour-

mens que i'aye enduré parmy ces Barbares : ny le froid, ny le chaud, ny l'incommodité des chiens, ny coucher à l'air, ny dormir sur vn liét de terre, ny la posture qu'il faut tousiours tenir dans leurs cabanes, se ramassans en peloton, ou se couchans, ou s'asseans sans siege & sans matelas, ny la faim, ny la soif, ny la pauvreté & saleté de leur boucan, ny la maladie, tout cela ne m'a semblé que ieu à comparaison de la fumée & de la malice du Sorcier, avec lequel i'ay tousiours esté en tres mauuaise intelligence pour les raisons suiuanes.

Premierement, pource que m'ayant inuité d'hyuerner avec luy, ie l'auois éconduy, dequoy il se reſentoit fort, voyant que ie faisois plus d'estat de mon hôte, son cadet, que de luy.

Secondement, pource que ie ne pouois assouuir sa cōuoitise, ie n'auois rien qu'il ne me demandast, il m'a fait fort souuent quitter mon manteau de dessus mes espaulles pour s'en couvrir : or ne pouuant pas satisfaire à toutes ses demandes, il me voyoit de mauuais œil, voire mesme quand ie luy eusse donné tout le peu que i'auois, ie n'eusse peu ga-

gner son amitié : car nous auions bien d'autres sujets de diuorce.

En troiefme lieu, voyant qu'il faisoit du Prophete, amufant ce peuple par mille sottises qu'il inuente à mon aduis tous les iours, ie ne laiffois perdre aucune occasion de le conuaincre de niaiserie & de puerilité, mettant au iour l'impertinence de fes superstitions: or c'estoit luy arracher l'ame du corps par violence: car comme il ne fçauoit plus chasser, il fait plus que iamais du Prophete & du Magicien pour conseruer fon credit, & pour auoir les bons morceaux, si bien qu'esbranlant son autorité qui se va perdant tous les iours, ie le touchois à la prunelle de l'œil, & luy rauiffois les delices de son Paradis, qui sont les plaisirs de la gueule.

En quatriefme lieu, se voulant recrer à mes dépens, il me faisoit par fois escrire en sa langue des choses sales, m'assurant qu'il n'y auoit rien de mauuais, puis il me faisoit prononcer ces impudences, que ie n'entendois pas deuant les Sauvages: quelques femmes m'ayans aduerty de ceste malice, ie luy dis que ie ne salirois plus mon papier ny ma

204 *Relation de la Nouvelle France,*
bouche, de ces vilaines paroles, il ne
laissa pas de me commander de lire en
la presence de toute la cabane, & de
quelques Sauvages qui estoient surue-
nus, quelque chose qu'il m'auoit dicté,
ie luy répondis que l'Apostat m'en don-
nat l'interpretation, & puis que ie lirois,
ce Renegat refusant de le faire, ie refu-
say aussi de lire, le Sorcier me le com-
mande avec empire, c'est à dire avec
de grosses paroles, ie le prie au com-
mencement avec grande douceur de
m'en dispenser: mais comme il ne vou-
loit pas estre éconduit deuant les Sau-
uages, il me presse fort & me fait presser
par mon hôte qui fit du fasché: enfin
reconnoissant que mes excuses n'auoiēt
plus de lieu, ie luy parle d'un accent fort
haut, & apres luy auoir reproché ses
lubricitez, ie luy adresse ces paroles,
Me voicy en ton pouuoir, tu me peux
massacrer, mais tu ne scaurois me con-
traindre de proferer des paroles impu-
diques: elles ne sont pas telles, me dit-
il, Pourquoi donc, luy dis-je, ne m'en
veut-on pas donner l'interpretation? il
sortit de ceste meslée fort vlcéré.

En cinquieme lieu, voyant que mon

hôte m'aymoit, il eut peur que cet amour ne le priuast de quelque friand morceau, ie taschay de luy oster ceste apprehension, témoignant publiquement que ie ne viuois pas pour manger, mais que ie mangeois pour viure, & qu'il importoit peu quoy qu'on me donnast, pourueu que i'en eusse assez pour ne point mourir: il me repartit nettement, qu'il n'estoit pas de mon aduis, mais qu'il faisoit profession d'estre friand, d'aymer les bons morceaux, & qu'on l'obligeoit fort quand on luy en presentoit: or iacoit que mon hôte ne luy donnast aucun sujet de craindre en cet endroit, si est ce qu'il m'attaquoit quasi en tous les repas, comme s'il eut eu peur de perdre la preſeance, ceste apprehension augmentoit sa haine.

En sixiesme lieu, comme il voyoit que les Sauvages des autres cabanes me portoient quelque respect, cognoissant d'ailleurs que i'estois grand ennemy de ses impostures, & que si i'entrois dans l'esprit de ses oüailles, que ie le perdroy de fond en comble, il faisoit son possible pour me détruire, & pour me rendre ridicule en la creance de son peuple.

En septiesme lieu, adioustez à tout cecy l'auersion que luy & tous les Sauvages de Tadoussac ont eu iusques icy des François depuis le commerce des Anglois, & coniecturez quel traitement ie peux auoir receu de ces Barbares, qui adorent ce miserable Sorcier, contre lequel le plus souuent i'auois guerre declarée. I'ay creu cent fois que ie ne fortirois iamais de ceste meslée que par les portes de la mort. Il ma traité fort indignement, il est vray, mais ie m'estonne qu'il n'a pis fait, veu qu'il est idolatre de ces superstitiōs, que ie combattois de toutes mes forces. De raconter par le menu toutes les attaques, les risées, les gaufferies, les mépris, ie ferois vn Liure pour vn Chapitre, suffit de dire qu'il s'attaquoit mesme par fois à Dieu pour me déplaire, & qu'il s'efforçoit de me rendre la risée des petits & des grands, me décriant dans les autres cabanes aussi bien que dans la nostre, il n'eut neantmoins iamais le credit d'animer contre moy les Sauvages nos voisins, ils baissoient la teste quand ils entendoient les benedictiōs qu'il me donnoit. Pour les domestiques incitez par

son exemple, & appuyez de son autorité, ils me chargoient incessamment de mille brocards, & de mille injures, ie me suis veu en tel estat, que pour ne les aigrir, ou ne leur donner occasion de se fâcher, ie passois les iours entiers sans ouvrir la bouche. Croyez moy si ie n'ay rapporté autre fruit des Sauvages, i'ay pour le moins appris beaucoup d'injures en leur langue, ils me disoient à tout bout de champ *eca titou, eca titou nama khitirinisi*, tais toy, tais toy, tu n'as point d'esprit. *Achineou*, il est orgueilleux, *Moucachtechion*, il fait du compagnon, *saségau* il est superbe, *cou attimou* il ressemble à vn Chien, *cou mascoua* il ressemble à vn Ours, *cou ouabouchou ouichtoui* il est barbu comme vn Lieure, *attimonai oukhimau* il est Capitaine des Chiens, *cou oucoufimas ouchtigonan* il a la teste faite comme vn citrouille, *matchirinion* il est difforme, il est laid, *khichcoubeon* il est yure; voila les couleurs dont ils me peignoient, & de quantité d'autres que i'obmets: le bon est qu'ils ne pensoient pas quelquesfois que ie les entendisse, & me voyans sous-rire ils demeuroient confus, du moins ceux qui ne chantoient

208 *Relation de la Nouvelle France,*
ces airs que pour complaire au Sorcier:
les enfans m'estoient fort importuns
me faifans mille niches, m'imposans si-
lence quand ie voulois parler. Quand
mon hôte estoit au logis i'auois quel-
que relache, & quand le Sorcier s'ab-
sentoit i'estois dans la bonace maniant
les grands & les petits quasi comme ie
voulois. Voila vne bonne partie des
choses qu'on doit souffrir parmy ces
peuples: cecy ne doit épouuenter per-
sonne, les bons soldats s'animent à la
veuë de leur sang & de leurs playes,
Dieu est plus grand que nostre cœur, on
ne tombe pas tousiours dans la famine,
on ne rencontre pas tousiours des Sor-
ciers, ou des iongleurs de l'humeur de
celuy-cy: en vn mot si nous pouuions
sçauoir la langue & la reduire en pre-
ceptes il ne seroit plus de besoin de sui-
ure ces Barbares. Pour les nations sta-
bles, d'où nous attendons le plus grand
fruct, nous pouuons auoir nostre ca-
bane à part, & par consequent nous de-
liurer d'vne partie de ces grandes in-
commoditez: mais finissons ce Chapi-
tre, autrement ie me voy en danger d'e-
stre aussi importun que cet imposteur
que

que ie recommande aux prieres de tous ceux qui liront cecy, ie coucheray au Chapitre suiuant quelques entretiens que i'ay eu avec luy, lors que nous estions dans quelque tréue.

CHAPITRE XIII.

Contenant vn Journal des choses qui n'ont peu estre couchées sous les Chapitres precedens.

SI ce Chapitre estoit le premier dans Scestre relation, il donneroit quelque lumiere à tous les suiuan: mais ie luy ay donné le dernier rang, pource qu'il se grossira tous les iours iusques au depart des vaisseaux, par le rencontre des choses plus remarquables qui pourront arriuer, n'estant qu'un memoire en forme de Journal, de tout ce qui n'a peu estre logé dans les Chapitres precedens.

Après le depart de nos François qui sortirent de la rade de Kebec, le 16. d'Aoust de l'an passé 1633. pour tirer à Tadoussac, & de là en France, cher-

210 *Relation de la Nouvelle France,*
chant l'occasion de conuerſer avec les
ſauuages, pour apprendre leur langue;
ie me transportay delà le grand fleuve
de ſainct Laurens dans vne cabane de
ſueillages, & allois tous les iours à
l'eſcole dans celles des ſauuages, qui
nous enuironnoient, alleché par l'eſpe-
rance que i'auois, ſinon de reduire le
Renegat à ſon deuoir, du moins de tirer
de luy quelque cognoiſſance de ſa lan-
gue: ce miſerable eſtoit nouuellement
arriué de Tadouſſac, où il ſ'eſtoit mōſtré
fort contraire aux François, la faim qui
preſſoit l'Apoſtat & ſes freres, les fit
monter à Kebec pour trouuer de quoy
viure: eſtās donc occupez à leur peſche,
i'eſtois fort ſouuent en leur cabane, in-
uitant par fois le Renegat de venir vne
autre fois hyuerner avec nous dans
noſtre maiſonnette, il ſ'y fuſt ayſément
accordé n'eſtoit qu'il auoit pris femme
d'une autre nation que la ſienne, & qu'il
ne la pouuoit pas renuoyer pour lors:
voyant donc qu'il ne me pouuoit pas
ſuiure, ie luy iettay quelque propos de
paſſer l'hyuer avec luy, mais ſur ces
entrefaictes vne furieuſe tempeſte nous
ayant battu en ruine certaine nuit, le

Pere de Noüe, deux de nos hommes, & moy, dans nostre cabane, ie fus faisy d'une grosse fièvre, qui me fit chercher nostre petite maisonnette pour y trouver la santé.

L'Apostat ayant veu mon inclination traicta de mon dessein avec ses freres, il en auoit trois, l'un nommé Carigonan, & surnommé des François l'Espousée, pource qu'il fait le grand comme vne espousée, c'est le plus fameux forcier, ou *manitousiou*, (c'est ainsi qu'ils appellent ces iongleurs) de tout le pays, c'est celuy dont i'ay fort parlé cy-dessus: l'autre se nomme Mestigoit, ieune homme âgé de quelque trentecinq ou quarante ans, braue Chasseur, & d'un bon naturel: le troisieme se nommoit Sasoufinat, c'est le plus heureux de tous: car il est maintenant au Ciel, estant mort bon Chrestien, comme ie l'ay fait voir au Chapitre second. Le forcier ayant appris du Renegat que ie voulois hyuerner avec les Sauvages, me vint voir sur la fin de ma maladie, & m'invita de prendre sa cabane, me donnant pour raison qu'il aymoît les bons, pource qu'il estoit bon, qu'il auoit

212 *Relation de la Nouvelle France,*
toufiours esté bon dès sa tendre ieunesse : il me demanda si Iesus ne m'auoit parlé de la maladie qui le trauailloit : viens, me disoit-il, avec moy, & tu me feras viure maintenant : ie suis en danger de mourir : or commé ie le cognoissois comme vn homme tres-impudent, ie l'éconduy le plus doucement qu'il me fut possible, & tirant à part l'Apostat, qui taschoit de m'auoir de son costé, ayant tesmoigné au Pere de Noüe quelque desir de retourner à Dieu, ie luy dy que i'hyuurnerois volontiers avec luy, & avec son frere Mestigoit, à condition que nous n'irions point dela le grand fleuve, que le forcier ne seroit point en nostre compagnie, & que luy qui entend bien la langue Françoisse m'enseigneroit : ils m'accorderent tous deux ces trois conditions, mais ils n'en tindrent pas vne.

Le iour du départ estant pris, ie leur donnay pour mon viure vne barrique de galette, que nous empruntasmes au magasin de ces Messieurs, vn sac de farine, & des espics de bled d'Inde, quelques pruneaux, & quelques na-

ueaux, ils me presserent fort de porter vn peu de vin, mais ie n'y voulois point entendre, craignant qu'ils ne s'en-yurassent: toutesfois m'ayans promis qu'ils n'y toucheroient point sans ma permission, & les ayant asseuré qu'au cas qu'ils le fissent, que ie le ietterois dans la mer, ie suiuy l'inclination de ceux qui me conseillèrent d'en porter vn petit barillet; ie promis en outre à Mestigoit que ie le prenois pour mon hoste: car l'Apostat n'est pas Chasseur, & n'a aucune conduite, que ie luy ferois quelque present au retour, comme i'ay fait: c'est l'attente de ces viures qui leur fait desirer d'auoir vn François avec eux.

Ie m'embarquay donc en leur chalouppe, iustement le 18. d'Octobre, faisant profession de petit écolier, à mesme iour que i'auois autrefois fait profession de maistre de nos écoles, estât allé prendre congé de Monsieur nostre Gouverneur, il me recommanda tres-particulieremēt aux Sauvages, mon hoste luy repartit, si le Pere meurt ie mourray avec luy, & iamais plus on ne me reuera en ce pays icy, nos François me tesmoignoient

214 *Relation de la Nouvelle France,*
tout plein de regret de mon depart, veu
les dangers esquels on s'engage en la
suinte de ces Barbares. Les Adieu faits
de part & d'autre, nous fismes voile en-
viron les dix heures du matin, i'estois
seul de François avec vingt Sauvages,
comptant les hommes, les femmes, & les
enfans, le vent & la marée nous favori-
fians, nous allasmes descendre au delà de
l'Isle d'Orleans dans vne autre Isle nom-
mée des Sauvages *Caouahascoumagakhe*,
ie ne scay si la beauté du iour se respan-
doit dessus ceste Isle, mais ie la trouuay
fort agreable.

Si tost que nous eufmes mis pied à
terre, mon hoste prend vne harquebuse
qu'il a achetée des Anglois, & s'en va
chercher nostre souper: cependant les
femmes se mettent à bastir la maison où
nous deuions loger. Or l'Apostat s'estât
pris garde que tout le monde estoit oc-
cupé, s'en retourna à la chalouppe qui
estoit à l'anchre, prit le petit barillet de
vin, & en beut avec tel excez, que s'estât
enyuré comme vne souppe, il tomba de-
dans l'eau, & se pensa noyer: enfin il en
sortit apres auoir bien barbotté, il s'en
vint vers le lieu où on dressoit la caba-

ne, criant & hurlant comme vn demon-
niaque, il arrache les perches, frappe sur
les écorces de la cabane, pour tout bri-
ser: les femmes le voyant dans ces fou-
gues s'enfuyent dans le bois, qui deçà
qui delà, mon Sauvage que ie nomme
ordinairement mon hôte, faisoit bouillir
dans vn chauderon quelques oyseaux
qu'il auoit tuez: cet yurongne suruenāt
rompt la cramailiere, & renuerse tout
dans les cendres: à tout cela pas vn ne
fait mine d'estre fasché, aussi est ce fo-
lie de se battre contre vn fol, mon hôte
ramasse ses petits oyseaux, les va luy-
mesme lauer à la riuiera, puis de l'eau,
& remet la chaudiere sur le feu, les
femmes voyant que cēt homme enragé
couroit çà & là sur le bord de l'Isle, écu-
mant comme vn possédé, viennent viste
prendre leurs écorces, & les emportent
en vn lieu écarté, de peur qu'il ne les
mette en pieces comme il auoit com-
mencé: à peine eurent-elles le loysir de
les rouler qu'il parut aupres d'elles tout
forcené, & ne scachant sur qui deschat-
ger sa fureur: car elles disparurent in-
continent à la faueur de la nuit qui
commençoit à nous cacher, il s'en vint

216 *Relation de la Nouvelle France,*
par le feu qui se descouuroit par sa clarté, & voulant mettre la main sur la chaudiere pour la renuerfer vne autre fois, mon hôte son frere, plus habile que luy, la prit & luy ietta au nez toute bouillante comme elle estoit, ie vous laisse à penser quelle contenance tenoit ce pauvre homme, se voyant pris à la chaude, iamaïs il ne fut si bien laué, il changea de peau en la face, & en tout l'estomach, pleust à Dieu que son ame eust changé aussi bien que son corps: il redouble ses hurlemens, arrache le reste des perches, qui estoient encor debout: mon hôte m'a dit depuis qu'il demandoit vne hache pour me tuer, ie ne sçay s'il la demanda en effect, car ie n'entendois pas son langage, mais ie sçay bien que me presentant à luy pour l'arrester il me dit, parlant François, Retirez-vous, ce n'est pas à vous à qui i'en veux, laissez-moy faire, puis me tirant par la sotane, Allons, disoit-ile, embarquons-nous dans vn canot, retournons en vostre maison, vous ne cognoissez pas ces gens cy, ce qu'ils en font, c'est pour le ventre, ils ne se soucient pas de vous, mais de vos viures,

à cela ie répondois tout bas à part moy,
in vino veritas.

La nuit s'auançant bien fort ie me retiray dedans le bois pour fuir l'importunité de cet yurongne, & pour prendre quelque repos : comme ie faisois mes prieres aupres d'un arbre, la femme qui faisoit le ménage de mon hôte me vint trouuer, & ramassant quelques feüilles d'arbres tombées, me dit; couche toy là, & ne fais point de bruit, puis m'ayant ietté vne écorce pour me couvrir, elle se retira : voila donc mon premier giste à l'enseigne de la Lune qui me découuroit de tous costez, me voila passé Cheualier dès le premier iour de mon entrée en ceste Academie, la pluye suruenant vn peu auant minuit, me donna quelque apprehension d'estre mouillé, mais elle ne dura pas long temps : le lendemain matin ie trouuay que mon liét, quoy qu'on ne l'eut point remué depuis la creation du monde, n'estoit point si dure qu'il m'empeschat de dormir.

Le iour suiuant ie voulu ietter le babillet & le reste du vin dans la riuere, comme ie leurs auois dit que ie ferois,

au cas qu'on en abusast, mon hôte me saisissant par le milieu du corps, s'écria *eca toute, eca toute*, ne fais pas cela, ne fais pas cela, ne vois tu pas que *Petrichich* (c'est ainsi qu'ils nomment le Renegat par derision) n'a point d'esprit, que c'est vn chien, ie te promets qu'on ne touchera plus au barillet que tu ne sois present: ie m'arrestay avec resolution d'en faire largesse, afin de me deliurer de la crainte qu'un peu de vin ne nous fit boire beaucoup d'eau: car s'ils se fussent enyurez pendant que nous faisons voile, c'estoit pour nous perdre.

Nous voulions sortir le matin de ceste Isle; mais la marée se retirant plus tost que nous ne pensions, nostre Chalouppe s'échoüa: si bien qu'il fallut attendre la marée du soir, en laquelle nous nous embarquasmes, & voguans à la faueur de la Lune aussi bien que du vent, nous abordasmes vne autre Isle nommée *Ca ouapascounagate*. Comme nous arriuasmes sur la minuiet, nos gens ne prirent pas la peine de nous bastir vne maison, si bien que nous couchasmes au mesme liêt, & logeasmes à la mesme enseigne que la nuit prece-

dente, abriez des arbres & du ciel.

Le lendemain nous quittasmes ceste Isle pour entrer dans vne autre appelée *Cachibariouachcate*, nous la pourrions nommer l'Isle aux Oyes blanches, car i'y en vis plus de mille en vne bande.

Le iour d'apres nous la voulions quitter, mais nous fusmes contraints pour le mauuais temps de relascher au bout de ceste mesme Isle, elle est deserte comme tout le pays, c'est à dire qu'elle n'a des habitans qu'en passant, ce peuple n'ayant point de demeure assurée: elle est bordée de rochers si gros, si hauts, & si entrecoupez & peuplée neantmoins de Cedres & de Pins si proprement, qu'un Peintre tiendrait à faueur d'en auoir la veüe pour tirer l'idée d'un desert affreux pour ses precipices, & tres agreable pour la varieté de quantité d'arbres qu'on diroit auoir esté plantez par la main de l'art plustost que de la Nature. Comme elle est entrecoupee de bayes pleines de vases, il s'y retire si grande quantité de gibier & de plusieurs especes que ie n'ay point veu en France, qu'il le faut quasi voir pour le croire.

210 *Relation de la Nouvelle France,*

Sortans de ceste Isle au gibier nous nauigeasmes tout le iour & vinsmes descendre sur la nuit dans vne petite Islette nommée *Atisaoucanich etagoukbi*, c'est à dire lieu où se trouue la teinture, ie me doute que nos gens luy donnerent ce nom, pource qu'ils y trouuerent de petites racines rouges, dont ils se seruent pour teindre leurs *Matachias*. J'appellerois volontiers ce lieu l'Islette mal-heureuse : car nous y souffrismes beaucoup huit iours durant que les tempestes nous y retindrent prisonniers. Il estoit nuit quand nous l'abordasmes, la pluye & les vents nous attaquoient, & ce pendant à peine peut on trouuer cinq ou six perches pour seruir de poutres à nostre bastiment, qui fut si petit, si estroit, & si decouuert, & par vn temps si fascheux, voulant euitier vne incommodité on tomboit dans deux autres, il se falloir racourcir, ou se rouler en herisson, sur peine de se brusler la moitié du corps pour nostre souper, & pour nostre disner tout ensemble : car nous n'auions point mangé depuis le matin, mon hôte fit ietter à chacun vn morceau de la galette que ie luy auois

donnée, m'advertisant que nous mangerions sans boire, car l'eau de ce grand fleuve commence en ce lieu d'estre salée, le lendemain nous recueillîmes de l'eau de pluye, tombée dans des roches fort sales, & la beusmes avec autant de plaisir qu'on boit le vin d'Aï en France.

Ils auoient laissé nostre Chaloupe à l'anchre dans vn grand courant de marée, ie les aduerty qu'elle n'estoit pas bien, & qu'il la falloît mettre à l'abry derriere l'Islette; mais comme nous n'attendions qu'un bon vent pour partir, ils n'en tindrent conte. La nuit la tempeste redoublant, on eust dit que les vents deuoient deraciner nostre Islette, mon hôte se doutant de ce qui arriua éueille l'Apostat, & le presse de le venir ayder à sauuer nostre Chaloupe, qui s'alloit perdre: or soit que ce misérable fust paresseux, ou qu'il eust peur des ondes, iamais il ne se voulut leuer, donnant pour toute réponse, qu'il estoit las; dans ce retardement les vents rompent l'amare, ou la corde de l'anchre, & en vn instant font disparoistre nostre Chaloupe, mon hôte voyant ce beau

222 *Relation de la Nouvelle France,*
ménage, me vint dire *Nicanis*, mon bien-
aymé, la Chaloupe est perduë, les vents
qui l'ont enleuëe la briseront contre les
roches qui nous environnent de tous
costez. Qui n'eust entré en verue con-
tre ce Renegat, dont la negligence
nous iettoit dans des peines inexplica-
bles, veu qu'il y auoit quantité de pa-
quers dans nostre bagage, & beaucoup
d'enfans à porter. Mon hôte cepen-
dant, tout barbare & tout sauuage qu'il
est, ne se troubla point à cet accident,
ains craignant que cela ne m'attristast,
il me dit, *Nicanis*, mon bien-aymé, n'es-
tu point fasché de ceste perte, qui nous
causera de grands trauaux? ie n'en suis
pas bien ayse, luy repartis ie, ne t'en
attriste point, me fit-il: car la fascherie
ameine la tristesse, & la tristesse amene
la maladie, *Petrichtich* n'a point d'esprit,
s'il m'eust voulu secourir ce malheur ne
fust point suruenue, voyla tous les repro-
ches qu'on luy fit. Veritablement cela
me confond, que l'interest de la santé
arreste la cholere, & la fascherie d'un
Barbare, & que la loy de Dieu, que son
bon plaisir, que l'espoir de ses grandes
recompenses, que la crainte de ses

chastimens, que nostre propre paix & consolation ne puisse servir de bride à l'impatience & à la cholere d'un Chretien.

Au malheur susdit en survint un autre, nous avions outre la Chaloupe un petit Canot d'écorce, la marée se grossissant plus qu'à l'ordinaire par le soufflé des vents nous le déroba, nous voila prisonniers plus que jamais, ie ne vis ny larmes ny plaintes, non pas mesme parmy les femmes, sur le dos desquelles ce desastre tomboit plus particulièrement, à raison qu'elles sont comme les bestes de voiture, portant ordinairement le bagage des Sauvages, au contraire tout le monde se mit à rire.

Le iour venu, car ce fut la nuit que la tempeste commit ce larcin, nous courusmes tous sur les rives du fleuve, pour apprendre par nos yeux des nouvelles de nostre pauvre Chaloupe, & de nostre Canot, nous vismes l'un & l'autre échoüez fort loing de nous, la Chaloupe parmy des roches, & le Canot au bord du bois de la terre continente, chacun pensoit que tout estoit en pieces: si tost que la mer se fut retirée les

224 *Relation de la Nouvelle France,*

vns courent vers la Chaloupe, les autres vers le Canot, chose estrange; rien ne se trouua endommagé, i'en demeuray tout estonné: car de cent vaisseaux fussent ils d'un bois aussi dur que le bronze, à peine s'en sauueroit-il pas vn dans ces grands coups de vent & sur des roches.

Pendant que les vents nous tenoient prisonniers dans ceste malheureuse Islete, vne partie de nos gens s'en allerent visiter quelques Sauvages qui estoient à cinq ou six lieues de nous, si bien qu'il ne resta que les femmes & les enfans, & *Lhiroquois* dans nostre cabane. La nuit vne femme estant sortie s'en reuint toute effarée criant quelle auoit ouï le *Manitou*, ou le diable, voila l'alarme dans nostre camp, tout le monde remply de peur garde vn profond silence, Je demanday d'où procedoit ceste épouuente: car ie n'auois pas entendu ce qu'auoit dit ceste femme, *eca titou, eca titou*, me dit on, *Manitou*, tais-toy, tais-toy, c'est le diable: ie me mis à rire, & me leuant en pied ie sors de la cabane, & pour les asseurer i'appelle en leur langage le *Manitou*, criant tout haut que ie ne le

ne le craignois pas, & qu'il n'oseroit venir où i'estois : puis ayant fait quelques tours dans nostre Islete, ie rentray, & leur dis, ne craignez point, le diable ne vous fera aucun mal tant que ie seray avec vous, il craint ceux qui croient en Dieu, si vous y voulez croire il s'enfuira de vous. Eux bien estonnez, me demandent si ie ne le craignois point, ie repars pour les deliurer de leur peur, que ie n'en craignois pas vne centaine, ils se mirent tous à rire, se rassEURans petit à petit : or voyant qu'ils auoient ietté de l'anguille dans le feu i'en demanday la raison, tais-toy, me firent-ils, nous donnons à manger au diable afin qu'il ne nous fasse point de mal.

Mon hoste à son retour ayant sceu ceste histoire, me remercia fort de ce que i'auois rassEURé tous les gens, me demandant si en effet ie n'auois point de peur du *Manitou*, ou du diable, & si ie le cognoissois bien, que pour eux qu'ils le craignoient plus que la foudre ; le luy répondis, que s'il vouloit croire, & obeir à celuy qui a tout fait, que le *Manitou* n'auroit nul pouuoir sur luy : pour nous qu'estans assistez de celuy que

226 *Relation de la Nouvelle France,*
nous adorions, le diable auoit plus de
peur de nous, que nous n'auions de luy;
il s'estonna, & me dit qu'il eust bien
voulu que i'eusse eu cognoissance de sa
langue: car figurez vous que nous nous
faisions entendre l'un l'autre plus par
les yeux, & par les mains, que par la
bouche.

Je dressay quelques prieres en leur
langue, avec l'ayde de l'Apostat: or
comme le Sorcier n'estoit pas encore
venu, ie les recitois le matin, & auant
nos repas, eux-mesmes m'en faisans sou-
uenir, & prenans plaisir à les ouïr pro-
noncer; si ce miserable Magicien ne
fust point venu avec nous ces Barbares
auroient pris grand plaisir de m'écou-
ter: mon hoste me faisoit mille que-
stions, me demandant pourquoy nous
mourions, où alloient nos ames, si la nuit
estoit vniuerselle par tout le monde, &
choses semblables, se monstrant fort at-
tentif à mes réponses. Changeons de
discours.

Je remarquay en ce lieu cy, que les
ieunes femmes ne mangent point dans
le plat de leurs marys; i'en demanday la
raison, le Renegat me dit que les ieu-

nes filles à marier, & les femmes qui n'auoient point encore d'enfans, n'auoient rien en maniement, & qu'on leur faisoit leur part comme aux enfans, de là vient que sa femme mesme me dit vn iour, Dis à mon mary qu'il me donne bien à manger: mais ne luy dis pas que ie t'ay prié de luy dire.

Pendant certaine nuit, tout le monde estant dans vn profond sommeil, ie me mis à entretenir ce pauvre miserable Renegat, ie luy fis voir qu'estant en nostre maison, rien de tout ce que nous auions ne luy manquoit, qu'il y pouuoit passer sa vie doucement, & qu'en quittant Dieu il s'estoit ietté dans vne vie de beste, qui enfin abboutiroit à l'enfer, s'il n'ouuroit les yeux, que l'eternité estoit bien longue, & que d'estre à iamais compagnon des diables, c'estoit vn long terme. Je voy bien, me fit-il, que ie ne fais pas bien; mais mon malheur est que ie n'ay pas l'esprit assez fort pour demeurer ferme dans vne resolution, ie croy tout ce qu'on me dit; quand j'ay esté avec les Anglois, ie me suis laissé aller à leurs discours; quand ie suis avec les Sauvages ie fais comme eux;

228 *Relation de la Nouvelle France,*
quand ie suis avec vous ie tiens vostre
creance pour veritable, pleut à Dieu que
ie fusse mort quand i'estois malade en
France, ie ferois maintenant sauué, tant
que i'auray des parens ie ne feray iamais
rien qui vaille : car quand ie veux de-
meurer avec vous, mes freres me disent
que ie pouriray demeurant tousiours en
vn endroit, cela est cause que ie quitte
tout pour les suiure. Le luy apportay tou-
tes les raisons, & luy fis toutes les offres
que ie peus pour l'affermir: mais son fre-
re le Sorcier qui fera bien tost avec nous
renuierfera tous mes desseins, car il ma-
nie comme il veut ce pauvre Apostat.

Le trentiesme iour d'Octobre nous
fortismes de ceste malheureuse Islete,
& vinsmes aborder sur la nuit dans vne
autre Isle qui porte vn nom quasi aussi
grand comme elle est, car elle n'a pas
demy lieuë de tour, & voicy comme nos
Sauuages me dirēt qu'elle se nommoit,
Ca pacoucachtechikhi chachagou achiganikhi,
Ca pakhitouananionikhi, ie croy qu'ils
forgerent ces noms sur le champ, ceste
Isle n'est quasi qu'un grand rocher af-
freux, comme elle n'a point de fontaine
d'eau douce nous fumes contrains de

boire des eaux de pluyes fort sales que nous ramassions dans des fondrières, & sur des roches; on ietta le voile de nostre chalouppe sur des perches quand nous y arriuasmes, & nous nous mîmes à l'abry là dessous, nostre liét estoit blanc & verd, c'est à dire qu'il y auoit si peu de branches de pin dessous nous, que nous touchîons la neige en plusieurs endroits, laquelle auoit commencé depuis trois iours à couvrir la terre d'un habit blanc.

Nous trouuasmes en ce lieu la cabane d'un Sauvage, que nostre hoste cherchoit, nommé *Ekhennabamate*, il apprit de luy que son frere le Sorcier estoit passé depuis peu, & qu'ayant eu le vent contraire, il n'estoit pas loing, il n'attendit pas qu'il fut iour tout à fait pour le suiure, son Canot poussé par trois rameurs alloit comme le vent: bref le beau premier iour de Nouembre dedié à la memoire de tous les Saints, il nous ramena ce Demon, j'entends ce Sorcier. Je fus bien estonné quand ie le vis: car ie ne l'attendois pas. me figurant que mon hoste estoit allé à la chasse, fut-il ainsi, & que ceste miserable proye

230 *Relation de la Nouvelle France,*
luy eust eschappé des mains.

Si tost qu'il fut arriué ce n'estoient plus que festins dans nos cabanes, nous n'auions plus que fort peu de viures de reste, ces Barbares les mangeoient avec autant de paix & d'assurance, comme si les animaux qu'ils deuoient chasser eussent esté renfermez dans vne estable.

Mon hoste faisant vn iour festin à son tour, les conuiez me firent signe que ie haranguasse en leur langue, ils auoient enuie de rire: car ie prononce le Sauvage comme vn Alemant prononce le François, leur voulant donner ce contentement, ie me mis à discourir, & eux à s'éclatter de rire: eux bien aises de gauffer, & moy bien ioyeux d'apprendre à parler: Je leur dis pour conclusion, que i'estois vn enfant, & que les enfans faisoient rire leurs peres par leur begayement: mais qu'au reste ie deviendrois grand dans quelques années, & qu'alors scachant leur langue ie leur ferois voir qu'eux-mesmes sont enfans en plusieurs choses, ignorans de belles veritez, dont ie leur parlerois, & sur l'heure mesme ie leur demaday si la Lune estoit

aussi haudemēt logée que les Estoilles, si elle estoit en mesme Ciel, où alloit le Soleil quand il nous quittoit, quelle figure auoit la terre, (si ie sçauois leur langue en perfection ie leur proposerois tousiours quelque verité naturelle deuant que de parler des points de nostre créance: car i'ay remarqué que ces curiositez les rendent attentifs) pour ne m'éloigner de mon discours, l'un d'eux prenant la parole apres m'auoir ingenuement confessé qu'ils ne pouuoient répondre à ces questions, me dit; mais comment pourrois-tu toy mesme cognoistre ces choses, puis que nous les ignorons? ie tiray aussi tost vn petit cadran que i'auois dans ma poche, ie l'ouure, & luy mettant en main, ie luy dis; nous voyla dans la nuit profonde, le Soleil ne nous paroist plus, dis-moy maintenāt enuifageant ce que ie te presente, en quelle part du monde il est; designe moy le lieu où il se doit demain leuer, où il se doit coucher, où il sera en son midy, marque moy les endroits du Ciel, où il ne va iamais: mon homme répondit des yeux me regardant sans dire mot: ie prens le cadran & luy fais

232 *Relation de la Nouvelle France,*
voir en peu de mots tout ce que ie ve-
nois de proposer, adioustant en suite;
hé bien comment se peut il faire que ie
cognoisse ces choses, & que vous les
ignoriez? i'ay bien d'autres veritez plus
grandes à vous dire quand ie sçauray
parler. Tu as de l'esprit, me dirent-ils,
tu sçauras bien tost nostre langue, ils se
sont trompez.

Ce que i'escriis dans ce iournal n'a
point d'autre suite, que la suite du
temps, voila pourquoy ie passeray sou-
uent du coq à l'asne, comme on dit,
c'est à dire que quittant vne remarque
ie passeray à vne autre qui ne luy a point
de rapport, le temps seul seruant de liai-
son à mon discours.

Comme l'arc & la fleche semble des
armes inuentées par la Nature, puis que
toutes les Nations de la terre en ont
trouué l'usage, de mesme vous diriez
qu'il y a de certains petits ieux que les
enfants trouuent sans qu'on leur ensei-
gne; les petits Sauvages ioüent à se ca-
cher aussi bien que les petits François,
ils font quantité d'autres traits d'enfan-
ce, que i'ay remarqué en nostre Europe,
entre autres i'ay veu les petits Parisiens

ietter vne balle d'arquebuse en l'air, & la recevoir avec vn baston vn petit creu-
sé, les petits Sauvages montagnards
font le mesme, se seruans d'un petit
faisseau de branches de Pin, qu'ils re-
çoient ou picquent en l'air avec vn ba-
ston pointu: les petits Hiroquois ont le
mesme passe-temps iettans vn osselet
percé qu'ils enlaissent en l'air dans vn au-
tre petit os: vn ieune homme de ceste
nation me le dit, voyant iouer les en-
fans montagnards.

Mō Sauvage & le Sorcier son frere, ayāt
appris qu'il y auoit quātité de Mōtagnais
és enuirs du lieu où ils vouloiēt hyuer-
ner, prirent resolution de passer du co-
sté du Nord, craignans que nous ne
nous affamassions les vns les autres: les
voyla donc resolus d'aller où m'auoit
promis mon hoste & le Renegat; mais
à peine auīs nous fait trois lieues sur le
grand fleuve pour le trauerser, que nous
rencontrasmes quatre canots qui nous
ramenerent au Sud, disans que la chaf-
se n'estoit pas bonne du costé du Nord,
si bien que ie fus contraint de demeu-
rer avec le sorcier, & d'hyuerner au delà
de la grande riuere, quoy que ie peusse

234 *Relation de la Nouvelle France,*
alleguer au contraire. Je voyois bien les
dangers dans lesquels ils me iettoient,
mais ie ne voyois point d'autre remede
que de se confier en Dieu, & le laisser
faire.

Si tost que les nouveaux Sauvages
venus dans ces quatre canots eurent
mis pied à terre, mon hoste leur fit vn
bâquet d'anguilles boucanées, car nous
n'auions déjà plus de pain. A peine ces
conuiés furent-ils de retour en leur ca-
bane, qu'ils dresserent vn festin de pois
qu'ils auoient acheté passans à Kebec,
mais afin que vous voyez les excez de
ce peuple, au sortir de ce banquet, on
vint à vn troisieme, que le forcier auoit
preparé, composé d'anguilles, & de la
farine que i'auois donnée à mon hoste:
cet homme me pressa fort d'estre de la
partie, il auoit fait faire vn retranche-
mēt dans nostre cabane avec des peaux,
& des couuertes, tous les conuiez en-
trerent là dedans, on me donna ma part
dans vne petite écuelle, mais comme ie
n'estois pas encor tout à fait accoustu-
mé à manger de leur bouillies si sales &
si fades, apres en auoir gousté i'en voulu
donner le reste à la parête de mon hoste,

aussi tost on me dit *khita*, *khita*, mange tout, mange tout, *acoumagouchan*, c'est vn festin à tout manger, ie me mis à rire, & leur dis qu'ils ioüioient à se faire creuer, veu qu'ayans desia esté à deux festins, ils en faisoient vn troisieme à ne rien laisser, mon hoste m'entendant me dit, que dis tu *Nicanis*? le dis que ie ne scaurois tout manger, donne moy, ce fit-il, ton écuelle ie t'ayderay, luy ayant présenté il auala tout ce qui estoit dedans en deux tours de gueule, tirant vne langue longue de la main pour la lecher au fond & par tout, afin qu'il n'y restast rien.

Quand ils furent saouls quasi iusqu'à creuer, le Sorcier prit son tambour & inuita tout le monde à chanter, celuy là chantoit le mieux qui heurloit le plus fort, à la fin de leur tintamarre les voyans d'une humeur assez gaye, ie leur demanday permission de parler, cela m'estant accordé, ie commençay à leur declarer l'affection que ie leur portoïs, vous voyez, disois ie, de quel amour ie suis porté en vostre endroit, i'ay non seulement quitté mon pays, qui est beau, & bien agreable pour venir dans vos

236 *Relation de la Nouvelle France,*
neiges & dans vos grands bois ; mais en-
core ie m'esloigne de la petite maison
que nous auons en vos terres pour vous
suiure & pour apprendre vostre langue.
Ie vous chery plus que mes freres puis
que ie les ay quittez pour vostre amour,
c'est celuy qui a tout fait qui me donne
ceste affection enuers vous, c'est luy qui
créé le premier homme d'où nous som-
mes tous issus, voyla pourquoy n'ayans
qu'un mesme pere nous sommes tous
freres, & nous deuons tous recognoistre
vn mesme Seigneur & vn mesme Capi-
taine, nous deuons tous croire en luy, &
obeir à ses volonte, Le Sorcier m'arre-
stant dit tout haut, quand ie le verray, ie
croiray en luy, autrement non, le moyen
de croire en celuy qu'on ne void pas? Ie
luy répondis, quand tu me dis que ton
pere, ou l'un de tes amis a tenu quelque
discours, ie croy ce qu'il a dit, me figu-
rant qu'il n'est point menteur, & ce pen-
dant ie n'ay iamais veu ton pere : de plus
tu crois qu'il y a vn *Manitou* & tu ne l'as
pas veu. Tu crois qu'il y a des *Khichi-*
couakhi, ou des Genies du iour, & tu ne
les a pas veus : d'autres les ont veus, me
dit-il, Tu ne me scaurois dire, luy re-

party-ie, ny quand, ny comment, ny en quelle façon, ou en quel endroit on les a veus, & moy ie te puis dire commēt se nommoient ceux qui ont veu le Fils de Dieu en terre, quand il l'ont veu, & en quel lieu, ce qu'ils ont fait, & en quels pays ils ont esté. Ton Dieu, me fit-il, n'est point venu en nostre pays, voila pourquoy nous ne croyons point en luy, fais que ie le voye, & ie croiray en luy. Escoute moy & tu le verras, luy repliquay-ie, Nous auons deux sortes de veüe, la veüe des yeux du corps, & la veüe des yeux de l'ame, ce que tu vois des yeux de l'ame peut estre aussi certain que ce que tu vois des yeux du corps: Non, dit-il, ie ne vois rien sinon des yeux du corps, si ce n'est en dormāt, mais tu n'approuue pas nos songes. Escoute moy iusqu'au bout, luy fis-ie, Quand tu passe deuant vne cabane delaissee, que tu vois encor toutes les perches en rond, que tu vois l'aire de la cabane tapissée de branches de Pin, quand tu vois le fouyer qui fume encore, n'est-il pas vray que tu cognois asseurement, & que tu vois bien qu'il y a eu là des Sauvages? & que ces perches & tout le

238 *Relation de la Nouvelle France,*
reste que vous laissez quand vous deca-
baniez, ne se sont point rassemblées par
cas fortuit? ouy, me dit-il, or ie dis le
mesme quand tu vois la beauté & la
grandeur de ce monde, que le Soleil
tourne incessamment sans s'arrester, que
les saisons retournent en leur temps, &
que tous les Astres gardent si bien leur
ordre, tu vois bien que les hommes
n'ont point fait ces merueilles, & qu'ils
ne les gouvernent pas, il faut donc qu'il
y ait quelqu'un plus noble que les hom-
mes qui ait basti & qui gouverne ceste
grande maison: or c'est celuy là que
nous appellons Dieu, qui void tout, &
que nous ne voyons pas maintenant;
mais nous le verrons apres la mort, &
nous serons bien-heureux à iamais avec
luy si nous l'aymons & si nous luy obeis-
sons. Tu ne sçais ce que tu dis, me re-
part-il, apprends à parler & nous t'en-
tendrons.

Là dessus ie priay l'Apostat de dédui-
re mes raisons & de les expliquer en
Sauuage: car i'en voyois de fort atten-
tifs: mais ce miserable Renegat, crai-
gnant de deplaire à son frere, ne vou-
lut iamais ouurir la bouche. Je le prie,

ie le coniure avec toute douceur, en fin ie redouble ma voix, & le menace de la part de Dieu, luy protestant qu'il seroit responsable de l'ame de la femme de son frere le Sorcier, laquelle ie voyois fort malade, & pour laquelle i'estois entré en discours, esperant que si les Sauvages goustoient mes raisons, qu'ils me permettroient aisément de l'instruire; ce cœur de bronze ne flechit iamais, ny à mes prieres, ny à mes menaces, Je prie Dieu qu'il luy fasse misericorde, mon hôte me voyant parler d'un accent assez haut, me dit, *Nicanis* ne te fâche point, avec le temps tu parleras comme nous, & tu nous enseigneras ce que tu sçais, nous te presterons l'oreille plus volontiers qu'à cet opiniastre qui n'a point d'esprit, auquel nous n'auons nulle creance, voila les eloges qu'il donnoit à ce Renegat. Je luy repliquay, si ceste femme se portoit bien ie serois consolé, mais elle est pour mourir dans peu de iours, & son ame faute de cognoistre Dieu sera perduë, que si ton frere me vouloit prester sa parole ie l'instruirois en peu de temps, sa réponse fut que ie le laissasse, & que ie sçauois bien que c'e-

240 *Relation de la Nouvelle France,*
estoit vn lourdaut, pour conclusion on
dit les mots qui terminent le festin, &
chacun se retira, moy bien dolent de
voir ceste ame se perdre en ma presence
sans la pouuoir secourir: car le Sorcier
ayant commencé à leuer le masque &
l'Apostat à m'éconduire en sa cōsidera-
tion, toutes les esperances que ie pou-
uois auoir d'ayder ceste femme malade
d'instruire les autres commencerent à
s'éuanoüir, i'ay souuent souhaitté qu'un
Saint fust en ma place pour operer en
Saint, les petites ames crient beaucoup
& font peu, il se faut contenter de la
basse: poursuiuons nostre voyage.

Le douzieme de Nouembre nous
commençâmes en fin d'entrer dedans
les terres, laissant nos Chaloupes &
nos Canots, & quelque autre bagage
dans l'Isle au grand nom, de laquelle
nous sortîmes de mer basse, trauersant
vne prairie qui la separe du continent:
iusques icy nous auons fait chemin dans
le pays des poissons, tousiours sur les
eauës, ou dans les Isles, dorefnauant
nous allons entrer dans le Royaume des
bestes sauages, ie veux dire de beau-
coup plus d'estêduë que toute la Frāce.

Les

Les Sauvages passent l'hyuer dedans ces bois, courans çà & là, pour y chercher leur vie; au commencement des neiges ils cherchent le Castor dans des petits fleuves, & le Porc-espig dans les terres, quand la neige est profonde ils chassent à l'Orignac & au Caribou, comme j'ay dit.

Nous auons fait dans ces grands bois, depuis le 12. Nouembre de l'an 1633. que nous y entraimes, iusques au 22. d'Auril de ceste année 1634. que nous retournasmes aux riues du grand fleuve de saint Laurens, vingt-trois stations, tantost dans des valées fort profondes, puis sur des montagnes fort releuées; quelque fois en plat pays, & tousiours dans la neige: ces forests où j'ay esté sont peuplées de diuerses especes d'arbres, notamment de Pins, de Cedres, & de Sapins. Nous auons trauersé quantité de torrens d'eau, quelques fleuves, plusieurs beaux lacs & estangs marchans sur la glace; mais descendons en particulier & disons deux mots de chaque station, la crainte que j'ay d'estre long me fera retrancher quantité de choses que j'ay iugé assez legeres,

Q

242 *Relation de la Nouvelle France,*
quoy qu'elles puissent donner quelque
iour à ces memoires.

A nostre entrée dans les terres nous
estions trois cabanes de compagnie, il y
auoit dixneuf personnes en la nostre, il
y en auoit seize en la cabane du Sauua-
ge nommé Ekhenabamate, & dix dans
la cabanne des nouueaux venus. Je ne
conte point les Sauvages qui estoient à
quelques lieuës de nous, nous faisons
en tout quarante cinq personnes, qui
deuions estre nourris de ce qu'il plairoit
à la sainte Prouidence du bon Dieu de
nous enuoyer; car nos prouisions ti-
roient par tout à la fin.

Voicy l'ordre que nous gardions
leuans le camp, battans la campa-
gne, & dressans nos tentes & nos pa-
uillons. Quand nos gens remarquoient
qu'il n'y auoit plus de chasse à quelques
trois ou quatre lieuës à l'entour de nous,
vn Sauvage qui cognoissoit mieux le
chemin du lieu où nous allions, crioit à
pleine teste, en vn beau matin hors de la
cabane, Escoutez hommes ie m'en vais
marquer le chemin pour decabaner de-
main au point du iour, il prenoit vne
hache & marquoit quelques arbres qui

nous guidoient; on ne marque le chemin qu'au commencement de l'hyuer: car quand tous les fleuves & les torrens sont glacez & que la neige est haute on ne prend pas ceste peine.

Quand il y a beaucoup de pacquets, ce qui arriue lors qu'ils ont tué grand nombre d'Esflans, les femmes en vont porter vne partie iusqu'au lieu où l'on doit camper le iour suiuant; quand la neige est haute, ils font des traîsnées de bois qui se fend, & qui se leue comme par fueilles assez minces & fort longues, ces traîsnées sont fort estroites à raisõ qu'elles se doiuent tirer entre vne infinité d'arbres fort pressez en quelques endroits, mais en recompense elles sont fort longues. Voyant vn iour celle de mon hôte dressée contre vn arbre, à peine peus ie atteindre au milieu estendant le bras autant qu'il me fut possible. Ils lient leur bagage là dessus, & avec vne corde qui leur vient passer sur l'estomach, ils traînent sur la neige ces chariots sans rouës.

Pour ne m'éloigner dauantage de mon chemin, si tost qu'il est iour chacun se prepare pour déloger, on commence

244 *Relation de la Nouvelle France,*

par le desieuner s'il y a dequoy ; car par fois on part sans desieuner, on poursuit sans disner & on se couche sans souper, chacun fait son paquet le mieux qu'il peut, les femmes battent la cabane pour faire tomber la glace & la neige de dessus les écorces qu'elles roulent en faisceaux, le bagage estant plié ils iettent sur leur dos ou sur leurs reins de longs fardeaux qu'ils supportent avec vne corde, qui passe sur leur front, sous laquelle ils mettent vn morceau d'écorce de peur de se blesser ; tout le monde chargé on monte à cheual sur des raquettes qu'on se lie aux pieds afin de ne point enfoncer dans la neige, cela fait on marche en campagne & en montagnes, faisant passer deuant les petits enfans qui partent bien tost & n'arriuent par fois que bien tard, ces pauvres petits ont leur paquet, ou leur traïsne pour s'accoustumer de bonne heure à la fatigue, & tasche-on de leur donner de l'emulation à qui portera ou traînera davantage, de vous depeindre la difficulté des chemins, ie n'ay ny plume ny pinceau qui le puisse faire, il faut auoir veu cét obiet pour le cognoistre, &

auoir gousté de ceste viande pour en
sçauoir le goust, nous ne faisons que
monter & descendre, il nous falloit sou-
uent baisser à demy corps pour passer
sous des arbres quasi tombez, & mon-
ter sur d'autres couchez par terre, dont
les branches nous faisoient quelques
fois tomber assez doucement, mais
toufiours froidement, car c'estoit sur la
neige. S'il arriuoit quelque dégel, ô
Dieu quelle peine! il me sembloit que
ie marchois sur vn chemin de verre qui
se cassoit à tous coups sous mes pieds:
la neige congelée venant à s'amollir
tomboit & s'enfonçoit par esquarres ou
grandes pieces, & nous en auions bien
souuent iusques aux genoux, quelque-
fois iusqu'à la ceinture, que s'il y auoit
de la peine à tomber, il y en auoit encor
plus à se retirer: car nos raquettes se
chargeoient de neiges & se rendoient si
pesantes, que quand vous veniez à les
retirer il vous sembloit qu'on vous tiroit
les iambes pour vous démembrer. I'en
ay veu qui glissoient tellement sous
des souches enseuelies sous la neige,
qui ne pouuoient tirer ny iambes ny ra-
quettes sans secours: or figurez vous

246 *Relation de la Nouvelle France,*
maintenant vne personne chargée com-
me vn mulet, & iugez si la vie des Sau-
uages est douce.

En France dans la difficulté des voya-
ges encor trouue on quelques villages
pour se rafraischir, & pour se fortifier;
mais les hostelleries que nous rencon-
trions, & où nous beuions, n'estoient
que des ruisseaux, encor falloit il rom-
pre la glace pour en tirer de l'eau; il est
vray que nous ne faisons pas de lon-
gues traites, aussi nous eust il esté tout à
fait impossible.

Estans arriuez au lieu où nous de-
uions camper, les femmes alloient cou-
per les perches pour dresser la cabane,
les hommes vuidoient la neige, comme
ie l'ay plus amplement déduit au Cha-
pitre precedent: or il falloit traual-
ler à ce bastiment, ou bien trembler de
froid trois grosses heures sur la neige en
attendant qu'il fut fait, ie mettois par
fois la main à l'œuvre pour m'échauffer,
mais i'estois pour l'ordinaire tellement
glacé que le feu seul me pouuoit dége-
ler; les Sauvages en estoient estonnez:
car ils suioient sous le traual, leur té-
moignant quelquefois que i'auois grād

froid, ils me disoient, donne tes mains que nous voyons si tu dis vray, & les trouuans toutes glacées, touchez de compassion ils me donnoient leurs mains échauffées, & prenoient les miennes toutes froides: iusque là que mon hôte apres auoir expérimenté cecy plusieurs fois, me dit *Nicanus* n'hyuerne plus avec les Sauuages, car ils te tuëront; il vouloit dire, comme ie pense, que ie tomberois malade & que ne pouuant estre traîné avec le bagage, qu'on me feroit mourir, ie me mis à rire, & luy reparty qu'il me vouloit épouuenter.

La cabane estant faite, ou sur la nuit, ou vn peu deuant, on parloit de disner & de souper tout ensemble: car sortant le matin apres auoir mangé vn petit morceau, il falloit auoir patience qu'on fut arriué & que l'hostellerie fust faite pour y loger, & pour y manger, mais le pis estoit que ce iour là nos gens n'allans point ordinairement à la chasse, c'estoit pour nous vn iour de ieusne aussi bien qu'vn iour de trauail. C'est trop retarder venons à nostre station.

Nous quittasmes les riués du grand fleuve le 12. de Nouembre, comme i'ay

248 *Relation de la Nouvelle France,*
desia dit, & vinsmes cabaner pres d'un
torrent, faifans chemin à la façon que ie
viens de dire, chacun portant son far-
deau. Tous les Sauvages se mocquoient
de moy de ce que ie n'estois pas bon
cheval de male, me contentant de por-
ter mon manteau qui estoit assez pe-
sant, vn petit sac où ie mettois mes me-
nuës necessitez & leurs gaufferies, qui
ne me pesoient pas tant que mon corps,
voila ma charge: mon hoste & l'Apo-
stat portoient sur des bastons croisez en
forme de brancard la femme du Sor-
cier qui estoit fort malade, ils la met-
toient sur la neige en attendant que la
cabane fut faite, où elle passoit plus de
trois heures sans feu, & sans iamais se
plaindre, & sans monstrier aucun signe
d'impatience, ie me mettois plus en pei-
ne d'elle qu'elle mesme: car ie criois
souuent qu'on fit faire pour le moins vn
peu de feu aupres d'elle, mais la réponse
estoit qu'elle se chaufferoit la cabane
estant faite: ces barbares sont faits à ces
souffrances, ils s'attédent bien que s'ils
tombent malades qu'on les traittera à
mesme monnoye. Nous seiournasmes
trois iours en ceste station, pendant les-

quels voicy vne partie des choses que
i'ay marqué dans mon memoire.

C'est icy que les Sauvages consulte-
rent les genies du iour, en la façon que
i'ay couché au Chapitre quatriesme:
or comme ie m'estois ris de ceste super-
stition, & qu'à toutes les occasions qui se
rencontroient, ie faisois voir que les
mysteres du Sorcier n'estoient que ieux
d'enfans, m'efforçant de luy raurir ses
ouïailles pour les rendre avec le temps à
celuy qui les a rachetées au prix de son
sang, cét homme forcené fit le iour
d'apres ceste consulte, que ie vay dé-
crire.

Mō hoste ayāt inuité au festin tous les
Sauvages nos voisins, comme ils estoient
desia venus, & assis à l'entour du feu &
de la chaudiere, attendans l'ouuerture
du banquet, voila que le Sorcier qui
estoit couché vis à vis de moy se leue
tout à coup, n'ayant point encor parlé
depuis la venuë des conuiez, il paroist
tout furieux, se iettant sur vne des per-
ches de la cabane pour l'arracher, il la
rompt en deux pieces, il roule les yeux
en la teste, regardant çà & là comme vn
homme hors de soy, puis enuifageant les

250 *Relation de la Nouvelle France,*
assistans, il leur dit *Irinticon nama Niti-*
rinisin, ô hommes j'ay perdu l'esprit, ie
ne sçay où ie suis, esloignez de moy les
haches & les espées, car ie suis hors du
sens. A ces paroles tous les Sauvages
baissent les yeux en terre, & ie les leue
au ciel, d'où j'attendois secours, me fi-
gurant que cét homme faisoit l'enragé
pour se vanger de moy, en m'ostant la
vie, ou du moins pour m'épouenter,
afin de me reprocher par apres que mon
Dieu me manquoit au besoin, & de pu-
blier parmy les siens, qu'ayant si souuent
témoigné que ie ne craignois pas leur
Manitou, qui les fait trembler, ie pal-
lissais deuant vn homme. Tant s'en faut
que la peur qui dans les dangers d'une
mort naturelle me faisoit quelquefois
rentrer dans moy-mesme, me saisit
pour lors, qu'au contraire j'envisageois
ce forcené avec autant d'assurance
que si j'eusse eu vne armée à mes costez,
me representant que le Dieu que j'ado-
rois pouuoit lier les bras aux fols & aux
enragez aussi bien qu'aux demons:
qu'au reste si sa Majesté me vouloit ou-
vrir les portes de la mort, par les mains
d'un homme qui faisoit l'endiablé, que

sa Prouidence estoit tousiours aymable. Ce Thrason redoublant ces fougues fit mille actions de fol, d'enforcelé, de demoniaque, tantost il crioit à pleine teste, puis il demeuroid tout court comme épouuanté : il faisoit mine de pleurer, puis il s'éclattoit de rire comme vn diable follet ; il chantoit sans regles ny sans mesures, il siffoit comme vn serpent, il hurloit comme vn loup, ou comme vn chien, il faisoit du hibou & du chathuan, tournant les yeux tout effarez dedans sa teste, prenant mille postures, faisant tousiours semblant de chercher quelque chose pour la lancer, j'attendois à tous coups qu'il arrachast quelque perche pour m'en assommer, ou qu'il se iettast sur moy, ie ne laissay pas neantmoins pour luy monstrier que ie ne m'estonnois pas de ses diableries, de faire toutes mes actions à l'ordinaire de lire, d'écrire, de faire mes petites prieres, & l'heure de mon sommeil estant venuë ie me couchay & reposay aussi paisiblement dans son sabbat comme j'eusse fait dans vn profond silence, j'estois déjà aussi accoustumé de m'endormir à ses cris, & à ses bruits de

252 *Relation de la Nouvelle France,*
tambour, qu'un enfant aux chansons de
sa nourrisse.

Le lendemain au soir à mesme heure il sembla vouloir entrer dans les mesmes fougues, & donner vne autrefois l'alarme au camp, disant qu'il perdoit l'esprit, le voyant desia demy fol, il me vint vne pensée qu'il pourroit estre travaillé de quelque fièvre chaude, ie l'aborde & luy prens le bras pour luy toucher l'artere, il me regarde affreusement, faisant de l'estonné, comme si ie luy eusse apporté des nouvelles de l'autre monde, il roule les yeux çà & là comme vn insensé: luy ayant touché le poulx & le front ie le trouuay frais comme vn poisson, & aussi éloigné de la fièvre comme i'estois de France, cela me confirma dans mon opinion qu'il faisoit de l'enragé pour m'estonner, & pour tirer à compassion tous les gens qui dans nostre disette luy donnoient ce qu'ils pouuoient auoir de meilleur.

Le 20. du mesme mois de Novembre ne se trouuans plus de Castors, ny de Porcs-espics en nostre quartier, nous tirasmes pays, & ce fut nostre deuxiesme station, on porta la femme du Sorcier

sur vn brancart, & la mit-on, comme
i'ay desia dit, dessus la neige en atten-
dant que nostre palais fût dressé, ce pen-
dant ie m'approchay d'elle luy témoi-
gnant beaucoup de compassion : il y
auoit desia quelques iours que ie tas-
chois de gagner son affection, afin qu'elle
me prestast plus volontiers l'oreille,
cognoissant bien qu'elle ne pouuoit pas
viure long-temps, car elle estoit comme
vne squelette, n'ayant quasi plus la for-
ce de parler, quand elle appelloit quel-
qu'un la nuit, ie me leuois moy mesme,
& l'éueillois, ie luy faisois du feu, ie luy
demandois ce dont elle auoit besoin,
elle me cōmandoit de petites choses, comme
de fermer les portes ou boucher
quelque trou de la cabane qui l'incōmo-
doit, apres ces menus discours & offices
de charité, ie l'aborday, & luy demãday
si elle ne vouloit pas bien croire en celuy
qui a tout faict, & que son ame apres sa
mort seroit bien-heureuse. Au commen-
cement elle me répondit qu'elle n'auoit
point veu Dieu, & que ie luy fisse voir,
autrement qu'elle ne pouuoit croire en
luy, elle auoit tiré ceste réponse de la
bouche de s^o mary, le luy repartis qu'elle

254 *Relation de la Nouvelle France,*
le croyoit plusieurs choses qu'elle ne voyoit pas, & qu'au reste son ame seroit bruslée pour vne eternité si elle n'obeïssoit à celuy qui a tout fait; elle s'adoucit petit à petit, & me témoigna qu'elle luy vouloit obeïr, ie n'osois l'entretenir long temps, mais seulement par reprises, ceux qui me voyoient me crians que ie la laissasse.

Sur le soir estās tous dās nostre nouvelle cabane, ie m'approchay d'elle, l'appellant par son nom, iamaïs elle ne me voulut parler en la presence des autres, ie priay le Sorcier de luy dire qu'elle me répondist, & de m'ayder à l'instruire, luy representant qu'il ne pouuoit arriuer que du bien de ceste action, il me répond non plus que la malade, ie m'adresse à l'Apostat le pressant avec de tres humbles prieres de me prester sa parole, point de répōse; ie retourne à la malade, ie l'appelle, ie luy parle, ie luy demande si elle ne vouloit pas aller au Ciel, à tout cela pas vn mot: Je sollicite de rechef le Sorcier son mary, ie luy promets vne chemise & du petun, pourueu qu'il dise à sa femme qu'elle m'écoute, comment veux-tu, me dit-il, que nous

croyōs en ton Dieu ne l'ayās iamaïs veu? ie t'ay desia respondu à cela, luy fis-je, il n'est pas temps de disputer, cette ame se va perdre pour vn iamaïs si tu n'en as pitié: Tu vois bien que celuy qui a faict le Ciel pour toy, te veut donner de plus grands biens, que d'aller manger des escorces en vn village qui ne fut iamaïs, mais aussi te punira il seuerement si tu ne crois en luy, & si tu ne luy obeis. Ne pouvant tirer aucune raison de ce miserable homme, ie pressay encor vne fois la malade, mon hoste me l'entendant nommer par son nom me tança, tais toy me dit-il, ne la nomme point, elle est desia morte, son ame n'est plus dans son corps. C'est vne grande verité que personne ne va à I E S V S- C H R I S T que son pere ne luy tende la main, c'est vn grād present que la foy, quād ces pauvres Barbares voyēt qu'un pauvre malade ne parle plus, ou qu'il tombe en syncope, ou en quelque phrenesie, ils disent que son esprit n'est plus dans son corps, si le malade retourne en son bon sens, c'est l'esprit qui est de retour: en fin quand il est mort il n'en faut plus parler, ny le nommer en aucune façon: pour conclurre ce point, il

256 *Relation de la Nouvelle France,*
me fallust retirer sans rien faire.

On tint conseil en ce lieu de ce qu'on deuoit faire pour trouuer à manger, nous estions desia reduits à telle extremité que ie faisois vn bon repas d'une peau d'anguille boucannée, que ie iettois aux chiens quelques iours auparauant. Deux choses me touchèrent ici le cœur: jetant vne fois vn os, ou vne arreste d'anguille aux chiens, vn petit garçon fut plus habile que le chien, il se jetta sur l'os & le rongea & mangea: vne autre fois vn enfant ayant demandé à manger, comme on luy eust respõdu qu'il n'y en auoit point, ce pauvre petit s'en prit à ses yeux, les larmes rouloient sur sa face grosses comme des pois, & ses souspirs & ses sanglots me touchoient de compassion, encor taschoit il de se cacher: c'est vne leçon qu'on fait aux enfans de se monstrier courageux dans la famine.

Le 28. du mesme mois, nous decampasmes pour la troisieme fois, il neigeoit fort, mais la necessité nous pressant le mauuais temps ne peut nous arrester. Je fus bien estonné en cette troisieme demeure que ie ne vis point apporter la malade, ie n'osois demander ce qu'elle estoit

estoit deuenüe, car ils ne veulent pas qu'on parle des morts: sur le soir i'acostay le Renegat, ie luy demanday parlant François où estoit ceste pauvre femme, s'il ne l'auoit point tuée, voyant qu'elle s'en alloit mourir, cōme il auoit autrefois assommé à coups de bastons vne pauvre fille qui tiroit à la mort, ainsi que luy mesme l'auoit raconté à nos François. Non, dit-il, ie ne l'ay pas tuée: qui donc, luy fis ie, est-ce le ieune Hi-roquois? Nenny, me répond-il, car il est party de grand matin: c'est donc mon hôte, ou le Sorcier son mary; car elle parloit encor quand ie suis sorty ce matin de la cabane, il baissa la teste, m'aduouât tacitement que l'un des deux l'auoit mise à mort: vn vieillard m'a ceneât-moins dit depuis, qu'elle mourut de sa mort naturelle vn peu apres que ie fus parry, ie m'en rapporte à ce qui en est, quoy que s'en soit ayant refusé de recognoistre le Fils de Dieu pour son Pasteur pendant sa vie, il n'est que trop probable qu'il ne l'a pas recogneuë pour vne de ses ouailles apres sa mort.

I'ay remarqué iusques icy de trois sortes de medecines naturelles parmy les

258 *Relation de la Nouvelle France,*
Sauuages, l'une c'est leur suërie, dont j'ay
parlé cy-dessus, l'autre consiste à se tail-
lader legerement la partie du corps qui
leur fait mal, la mettant toute en sang
qu'ils font sortir de ces decoupeures en
assez grande abondance, ils se seruirent
vne fois de mon canif pour taillader la
teste d'un enfant de dix iours. La troisi-
me de ces medecines est composée de
racleure d'écorces interieures de bou-
leau, du moins cet arbre me sembloit
tel, ils font bouillir ces racleures dans
de l'eau, qu'ils boient par apres pour se
faire vomir, ils m'ont souuent voulu
donner ceste porion pendant que j'e-
tois malade, mais ie ne la iugeois pas à
mon usage.

Le iour de saint François Xauier,
nostre pretendu Magicien ayant sur le
soir battu son tambour, & bien hurlé à
l'ordinaire, car il ne manquoit point de
nous donner ceste aubade toutes les
nuits à nostre premier sommeil, voyant
que tout le monde estoit endormy, &
cognoissant que ce pauvre homme fai-
soit ce tintamare pour sa guarison. J'en-
tray en discours avec luy, ie commen-
çay par vn témoignage de grand amour

en son endroit, & par des louanges que ie luy iettay comme vne amorce pour le prendre dans les filets de la verité. Je luy fis entendre que si vn esprit capable des choses grandes comme le sien cognoissoit Dieu, que tous les Sauvages induis par son exemple le voudroient aussi cognoistre, aussi tost il prit l'effor, & se mit à declarer la puissance, l'autorité & le credit qu'il a sur l'esprit de ses compatriotes, il dit que dès sa ieunesse les Sauvages luy donnerent le nom de *Khimouchouminau*, c'est à dire nostre ayeul & nostre maistre, que tout passe par ses aduis, & que chacun suit ses conseils, ie l'aydois à se louer le mieux que ie pouuois : car il est vray qu'il a de belles parties pour vn Sauvage : enfin ie luy dis que ie m'estonnois qu'un homme de iugement ne peut recognoistre le peu de rapport qu'il y a entre ce tintamare & la santé. Quand tu as bien crié & bien battu ton tambour, que fait ce bruit sinon de t'estourdir la teste, pas vn Sauvage n'est malade, qu'on ne luy batte les oreilles de ce tambour, afin qu'il ne meure point, en as-tu veu de dispensiez de la mort ; ie te veux faire

260 *Relation de la Nouvelle France,*
vne proposition: Escoute moy patiem-
ment, luy dis- ie, bas ton tambour dix
iours durant, chante & fais chanter les
autres tant que tu voudras, fais tout ce
qui sera en ton possible pour recouurer
ta santé, si tu n'en guaray dans ce temps-
là, confesse que ton tintamare, que tes
hurlemens, & que tes chansons ne te
sçauroient remettre en santé, abstiens
toy dix autres iours de toutes ces super-
stitions, quitte ton tambour, & tous ces
bruits dereglez, demande au Dieu que
i'adore, qu'il te donne sa cognoissance,
pense & crois que ton ame doit passer
à vne autre vie que celle-cy, efforce toy
d'aymer son bien cōme tu ayme le bien
de ton corps, & quand tu auras passé
ces dix autres derniers iours en ceste fa-
çon, ie me retirèray trois iours durant
en oraison dans vne petite cabane qu'on
fera plus auant dans le bois, là ie prieray
mon Dieu qu'il te donne la santé du
corps & de l'ame, toy seul me viendras
voir au temps que ie diray, & tu feras de
tout ton cœur les prieres que ie t'ensei-
gneray; promettant à Dieu que s'il luy
plaist de te rendre la santé, tu appelle-
ras tous les Sauvages de ce lieu, & en

leur presence tu brusleras ton tambour, & toutes les autres badineries dont tu te fers pour les amasser, que tu leur diras que le Dieu des Chrestiens est le vray Dieu, qu'ils croyent en luy, & qu'ils luy obeissent, si tu promets cecy veritablement & de cœur, j'espere que tu seras deliuré de ta maladie, car mon Dieu est tout puissant.

Or comme cet homme est tres desireux de recouurer sa santé, il ouurit les oreilles, & me dit, ton discours est fort bon, j'accepte les conditions que tu me donne; mais commence le premier, retire toy en oraison, & dis à ton Dieu qu'il me guarisse, car c'est par là qu'il faut commencer, & puis ie feray tout ce que tu m'as prescrit: ie ne commenceray point, luy reparty-ie, car si tu estois guarý, pendant que ie prierois tu attribuerois ta santé à ton tambour, que tu n'aurois pas quitté; & non pas au Dieu que j'adore, lequel seul te peut guarir; non, me dit-il, ie ne croiray pas que cela vienne de mon tambour, j'ay chanté & fait tout ce que ie scauois, & n'ay peu sauuer la vie à pas vn; moy-mesme estant malade ie fais iouier pour me guarir tous

262 *Relation de la Nouvelle France,*
les ressorts de mon art, & me voila plus
mal que iamais; i'ay employé toutes
mes inuentions pour sauuer la vie à mes
enfants, notamment au dernier qui est
mort depuis peu, & pour conseruer ma
femme qui vient de trespasser, tout ce-
la ne m'a point reüssi, & partant si tu me
guaris, ie n'attribueray point ma santé
à mon tambour, ny à mes chansons. Le
luy répondis que ie ne pouuois pas le
guarir; mais que mon Dieu pouuoit
tout, qu'au reste il ne falloit point faire
de marché avec luy, ny luy prescrire
des conditions comme il faisoit, disant
qu'il me guarisse premierement, & puis
ie croiray en luy: dispose toy, luy fis ie,
de ton costé, & sa bonté ne te manque-
ra pas, que s'il ne te donne la santé du
corps, il te donnera la santé de l'ame qui
est incomparablement plus à priser. Ne
me parle point de l'ame, me repart-il,
c'est de quoy ie ne me soucie pas: voila
(me monstrant sa chair) ce que i'ayme,
c'est le corps que ie cheris, pour l'ame
ie ne la voy point, en arriue ce qui pour-
ra. As tu de l'esprit, luy fis ie? tu parle
comme les bestes, les chiens n'ayment
que les corps; celuy qui a fait le Soleil

pour t'éclairer, n'a il rien préparé de plus grand à ton ame, qu'à l'ame d'un chien? Si tu n'ayme que ton corps tu perdras le corps & l'ame, si vne beste pouuoit parler elle ne parleroit que de son corps & de sa chair, n'as-tu rien par dessus les bestes qui sont faites pour te seruir? n'ayme-tu que la chair & le sang? ton ame est-elle l'ame d'un chien que tu la traite avec un tel mépris? peut estre que tu dis vray, me répond-il, & qu'il y a quelque chose de bon en l'autre vie: mais nous autres en ce pays-cy n'en sçauons rien, que si tu me rends la santé ie feray ce que tu voudras. Ce pauvre miserable ne peut iamais releuer sa pensée plus haut que la terre: ne voyant donc aucune disposition en cet esprit superbe, qui croyoit pouuoir obliger Dieu, s'il croyoit en luy, ie le quittay pour lors, & me retiray pour reposer, car il estoit bien auant dans la nuit.

Le 3. de Decembre nous cōmençasmes nostre quatriesme station, ayans délogé sans trompette, mais non pas sans tambour: car le Sorcier n'oublioit iamais le sien, nous plantasmes nostre camp proche d'un fleuve large & rapi-

264 *Relation de la Nouvelle France,*
de, mais peu profond, ils le nomment
Capittetchionetz, il se va dégorger dans
le grand fleuve de saint Laurens, quasi
vis à vis de Tadoussac, nos Sauvages
n'ayans point icy de viandes pour faire
des festins, ils faisoient des banquets de
fumée, s'inuitans les vns les autres, dans
leurs cabanes, & faisans la ronde à vn
petit plat de terre remply de Tabac,
chacun en prenoit vne cornetée qu'il re-
duisoit en fumée, remettant la main au
plat s'il vouloit petuner dauantage: l'af-
fection qu'ils portent à ceste herbe est
au delà de toute creance, ils s'endormēt
le cabanet en la bouche, ils se leuent par
fois la nuit pour petuner, ils s'arrestent
souuent en chemin pour le mesme su-
jet, c'est la premiere action qu'ils font
rentrant dans leurs cabanes: ie leur ay
battu le fusil pour les faire petuner en
ramants dans vn canot, ie leur ay veu
souuent manger le baston de leur calu-
met, n'ayans plus de petun, ie leur ay
veuracler & pulueriser vn calumet de
bois pour petuner, disons avec com-
passion qu'ils passent leur vie dans la fu-
mée, & qu'ils tombent à la mort dans le
feu.

I'auois porté du petun avec moy, non pour mō vsage, car ie n'en prends point, i'en donnay largement selon que i'en auois à plusieurs Sauvages; m'en reseruant vne partie pour tirer de l'Apostat quelque mot de sa langue; car il ne m'eust pas dit vne parole qu'en le payāt de ceste monnoye, quand nos gens eurent consommé ce que ie leur auois donné, & ce qu'ils auoient en leur particulier, ie n'auois plus de paix, le Sorcier me pressoit avec vne importunité si audacieuse, que ie ne le pouuois souffrir, tous les autres sembloient me vouloir manger, quand ie leur en refusois: i'auois beau leur dire qu'ils n'auoient point de consideration, que ie leur en auois plus donné trois fois que ie ne m'estois reserué; vous voyez, leur disois- ie, que i'ayme vostre langue, & qu'il faut que ie l'achepte avec cēt argent, que s'il me manque on ne m'enseignera pas vn mot, vous voyez que s'il me faut vn verre d'eau, il faut que i'en aille chercher bien loing, ou que ie dōne vn bout de petun à vn enfant pour m'en aller querir; vous me dites que le petun rassasie, si la famine qui nous presse cōtinuë, i'en

266 *Relation de la Nouvelle France,*
veux faire l'expérience, laissez moy ce
peu que j'ay de reserve, il me fut im-
possible de resister à leur importunité,
il fallut tirer iusques au bout, ce ne fut
pas sans estonnement de voir des per-
sonnes si passionnées pour de la fumée.

Le sixiesme du mesme mois, nous délo-
geasmes pour la cinquiesme fois, il m'ar-
riua vne disgrace au départ, au lieu de
prédre le vray chemin, ie me iettay dans
vn autre que nos chasseurs auoient fort
battu, ie vay donc fort loing sans pren-
dre garde que ie me perdois, ayant fait
vne longue traite, ie m'apperceu que
mon chemin se diuisoit en cinq ou six
autres, qui tiroient qui deçà, qui delà,
me voila demeuré tout court, il y auoit
vn petit enfant qui m'auoit suiuy, ie ne
l'osois quitter, car aussi-tost il se mettoit
à pleurer, j'enfilay tantost l'vn, tantost
l'autre de ces sentiers, & voyant qu'ils
tournoient çà & là, & qu'ils n'estoient
marquez que d'une sorte de raquette, ie
concluds que ces chemins ne con-
duisoient point au lieu où mes Sau-
uages alloient cabaner, ie ne scauois
que faire du petit garçon: car s'estant
apperceu de nostre erreur il ne m'osoit

perdre de veüe sans se paſſer ; d'ailleurs n'ayant qu'environ ſix ans il ne me pouuoit pas ſuiure, car ie doublois mes pas : ie m'aduiſay de luy laiſſer mon manteau, pour marque que ie retournerois, ſi ie trouuois noſtre vray chemin, luy faiſant ſigne qu'il m'attendift, car nous ne nous attendions pas l'un l'autre: ie iettay donc mon manteau ſur la neige, & m'en reuay ſur mes brifées criant de temps en temps pour me faire entendre de nos gens, ſi tant eſt que le bon chemin ne fuſt pas loing de moy; ie crie, j'appelle dans ces grands bois, perſonne ne répond, tout eſt dans vn profond ſilence, les arbres meſme ne faiſoient aucun bruit, car il ne faiſoit point de vent: le froid eſtoit ſi violent que ie m'attendois infailliblement de mourir la nuit au cas qu'il me la falluſt paſſer ſur la neige, n'ayant ny hache ny fuſil pour faire du feu; ie vay, ie viens, ie tourne de tous coſtez, ie ne trouue rien qui ne m'égaré dauantage: la derniere choſe que l'homme quitte c'eſt l'eſperance, ie la tenois toujours par vn petit bout, me figurant à toute heure que j'allois trouuer mon chemin; mais enfin apres

268 *Relation de la Nouvelle France,*
auoir bien tourné, voyant que les crea-
tures ne me pouuoient donner aucun
secours, ie m'arrestay pour preséter mes
petites prieres au Createur dont ie
voyois ces grands bois tout remplis
aussi bien que le reste du monde: il me
vint vne pensée que ie n'estois pas per-
du, puis que Dieu sçauoit bien où i'e-
stois, & ruminant ceste verité en mon
esprit, ie tire doucement vers le fleuve
que i'auois trauersé au sortir de la caba-
ne, ie crie, i'appelle de rechef, tout le
monde estoit desia bien loing; ie com-
mençois desia à laisser cheoir de mes
mains le petit filet de l'esperance que
i'auois tenu iusques alors, quand i'adui-
say quelques vestiges de raquette der-
riere des broussailles, ie m'y transpor-
te, & *vidi vestigia virorum, & mulierum &*
infantium, en vn mot ie trouue ce que
i'auois cherché fort long-temps, au
commencement ie n'estois pas assuré
que c'estoit là vn bon chemin, voila
pourquoy ie me diligentay de le reco-
gnoistre: estant desia bien auancé ie
trouue l'Apostat qui nous venoit cher-
cher, il me demanda où estoit ce petit
enfant, ie luy repars que ie l'auois laissé

aupres de mon manteau: i'ay, me dit-il, trouué vostre manteau & l'ay reporté à la nouvelle cabane; mais ie n'ay point veu l'enfant: me voila bien estonné, de l'aller chercher, c'estoit me perdre vne autre fois; ie prie l'Apostat d'y aller, il fit la sourde oreille, ie tire droit à la cabane pour en donner aduis, où enfin i'arriuy tout brisé & tout moulu pour la difficulté & pour la longueur des chemins que i'auois fait sans trouuer hostellerie que des ruisseaux glacez: si tost que les Sauvages me virent ils me demandent où estoit le petit garçon, crians que ie l'auois perdu, ie leur raconte l'histoire, les asseurants que ie luy auois laissé tout exprez mon manteau pour l'aller retrouver, mais ayant quitté ce lieu là, ie ne sçauois où l'aller chercher, veu mesmement que ie n'en pouuois plus, n'ayant point mangé depuis le grand matin, & deux ou trois bouchées de boucan tant seulement, on me donna pour reconfort vn peu d'eau glacée, que ie fis chauffer dans vn chaudron fort sale, ce fut tout mon souper: car nos chasseurs n'ayans rien pris il fallut ieufner ce iour-là.

270 *Relation de la Nouvelle France,*
Pour l'enfant, deux femmes m'ayans ouy
depeindre l'endroit où ie l'auois laissé,
coniecturant où il auoit tiré, l'allerent
chercher, & le trouuerent. Il ne faut pas
s'estonner si vn François se perd quel-
quesfois dans ces forests, i'ay veu de nos
plus habiles Sauvages s'y esgarer plus
d'un iour entier.

Le 20. de Decembre, quoy que les
Sauuages ne se mettent pas ordinaire-
ment en chemin pendant le mauuais
temps, si fallut-il decabanner durant la
pluye, & desloger à petit bruit sans des-
ieuner, la fin nous faisoit marcher, mais
le mal est, qu'elle nous suiuoit par tout
où nous allions; car nous ne trouuions
partout, ou fort peu, ou point de chasse:
En ceste station, qui fut la sixiesme, le
Renegat me vint dire que les Sauvages
estoiient fort espouuantez, & mon hoste
m'abordant tout pensif, me demanda si
ie ne scauois point quelque remede à
leur mal-heur, il n'y a pas, me disoit-il,
assez de neige pour tuer l'Orignac, des
Castors, & des Porcs espics, nous n'en
trouuons quasi point, que ferons nous? ne
sçais tu point ce qui nous doit arriuer?
ne sens tu point dans toy-mesme ce qu'il

faut faire ? Je luy voulus dire que nostre Dieu estoit tres-bon , & tres puissant, qu'il falloit que nous eussions recours à sa misericorde, mais cōme ie ne parlois pas bien, ie priay l'Apostat de me servir de truchement; ce miserable est possédé d'un diable muet , iamaïs il ne voulut parler.

Le 24. Decembre, veille de la naissance de nostre Sauueur, nous decampasmes pour la septiesme fois, nous partismes sans manger, nous cheminassmes vn assez long temps; nous traueillassmes à faire nostre maison, & pour nostre souper N.S. nous donna vn Porc-espig gros comme vn cochon de lait, & vn lièvre, c'estoit peu pour dix-huict ou vingt personnes que nous estions, il est vray, mais la sainte Vierge & son glorieux Espoux saint Ioseph, ne furent pas si bien traittez à mesme iour dans l'estable de Bethleem.

Le lendemain iour de resiouissance parmy les Chrestiens, pour l'enfant nouveau né, fust pour nous vn iour de ieunesse, on ne me donna rien du tout à manger; la faim qui fait sortir le loup du bois, m'y fit entrer plus auant, pour chercher

272 *Relation de la Nouvelle France,*
des petits bouts d'arbres que ie m'ageois
avec delices, des femmes ayant ietté aux
chiens par mesgarde ou autrement, quel-
ques rongneures de peaux dont on fait
les cordes des raquettes, ie les ramassay,
& en fis vn bon disner, quoy que les
chiens mesmes, quand ils auoient tant
soit peu à manger, n'en voulussent pas
gouster: l'ay souuent mangé, notam-
ment ce mois cy, des raclures d'escor-
ces, des rongneures de peaux, & autres
choses semblables, & cependant ie ne
m'en suis point trouué mal.

Le mesme iour de Noël ie m'en allay
sur le soir visiter nos voisins, nous n'e-
stions plus que deux cabanes, celle du
Sauuage Ekhenneabamate auoit tiré
d'vn autre costé depuis cinq ou six
iours, à raison qu'il n'y auoit pas assez de
chasse pour nourrir tout le monde, ie
trouuay deux ieunes chasseurs tout tri-
stes, pour n'auoir rien pris ce iour là, ny le
precedent, ils estoient comme tous les
autres maigres & defaits, taciturnes &
fort pensifs, comme gens qui ne pou-
uoient mourir qu'à regret, cela me tou-
cha le cœur, apres leur auoir dit quelque
parole de consolation, & donné quel-
que

que esperance de chose meilleure, ie me retiray en ma cabane pour prier Dieu, l'Apostat me demãda quel iour il estoit? il est aujourd'huy la feste de Noël, luy respondis-je; Il fut vn peu touché, & se tournant vers le Sorcier, il luy dit, qu'à tel iour estoit né le Fils de Dieu que nous adorions nommé IESVS: Remarquant en luy quelque estonnement, ie luy dis que Dieu vsoit ordinairement de largesse en ces bons iours, & que si nous auions recours à luy qu'il nous assisteroit infailliblement; à cela point de parole, mais aussi point de contrarieté: prenant donc l'occasion au poil, ie le priay de me tourner en sa langue deux petites Oraisons, dont i'en dirois l'une, & les Sauvages l'autre. Esperant que nous serions secourus, l'extremité où nous estions réduits luy fit accorder que de bond, que de volée ce que ie demandois. Je composay sur l'heure deux petites prieres, qu'il me tourna en Sauvage, me promettant en outre qu'il me seruiroit d'interprete si i'assemblois les Sauvages, me voila fort content. Je recommande l'affaire à N. S. & le lendemain matin ie dresse vn petit Oratoire, ie pends aux

274 *Relation de la Nouvelle France,*
perches de la cabane vne seruiette que
i'auois portée, sur laquelle i'attachay vn
petit Crucifix & vn Reliquaire, que
deux personnes fort Religieuses m'ont
enuoyé: ie tire encore quelque Image
de mon Breuiare, cela fait ie fais ap-
peller tous les Sauvages de nos deux ca-
banes, & ie leur fais entendre tant par
mon begayemēt, que par la bouche d'un
Renegat, que la crainte de mourir de
faim faisoit parler, qu'il ne tiendrait qu'à
eux qu'ils ne fussent secourus, ie leur dis
que nostre Dieu est la bonté mesme, que
rien ne luy estoit impossible, qu'encore
bien qu'on l'eust mesprisé, que si neant-
moins on croyoit, & si on esperoit en luy
d'un bon cœur, qu'il se montreroit fa-
vorable: Or comme ces pauvres gens
n'auoient plus d'esperance en leurs arcs,
ny en leurs flesches, ils me tesmoignerēt
vn grand contentement de ce que ie les
auois assemblez, m'assurant qu'ils fe-
roient tout ce que ie leur commande-
rois; ie prens mon papier & leur lis l'O-
raison que ie desirois qu'ils fissent, leur
demandant s'ils estoient contens d'ad-
dresser au Dieu que i'adorois ces paroles
de tout leur cœur, & sans feintise; ils me

respondent tous *nimiroueritenan*, *nimiro-
ueritenan*, nous en sommes cōtens, nous
en sōmes contens. Je me mets le premier
à genoux, & eux tous avec moy, iettans
les yeux sur nostre petit Oratoire, le
seul Sorcier demeuroit assis, mais luy
ayant demandé s'il n'envouloit pas estre
aussi bien que les autres, il fit comme il
me voyoit faire, nous estions testes nuës,
ioignans tous les mains & les esleuans
vers le Ciel, ie commençay donc à faire
ceste Oraison tout haut en leur langue.

Mon Seigneur qui avez tout fait, qui
voyez tout, & qui cognoissez tout, fai-
tes nous misericorde. O I E S U S, fils
du Tout-puissant, qui avez pris chair
humaine pour nous, qui estes né pour
nous d'une Vierge, qui estes mort pour
nous, qui estes resuscité & monté au
Ciel pour nous, vous avez promis que si
on demandoit quelque chose en vostre
nom que vous l'accorderiez : ie vous
supplie de tout mon cœur de donner la
nourriture à ce pauvre peuple, qui veut
croire en vous, & qui vous veut obeïr,
ce peuple vous promet entierement
que si vous le secourez qu'il croira par-
faitement en vous, & qu'il vous obeïra

276 *Relation de la Nouvelle France,*
de tout son cœur, Mon Seigneur, exau-
cez ma priere, ie vous presente ma vie
pour ce peuple tres content de mourir
à ce qu'ils vivent, & qu'ils vous cognois-
sent. Ainsi soit-il.

A ces paroles de mourir pour eux que
ie proferois pour gagner leur affection,
quoy qu'en effect ie le disois de bon
cœur, mon hoste m'arresta & me dit; re-
tranche ces paroles, car nous t'aymons
tous, & ne desirons pas que tu meure:
ie vous veux témoigner, leur repartif-
ie, que ie vous ayme, & que ie donne-
rois volontiers ma vie pour vostre sa-
lut, tant c'est chose grande que d'estre
sauué. Apres que i'eus fait ceste Orai-
son, chacun d'eux à mains jointes, teste
nuë, & les genoux en terre, comme i'ay
remarqué, profera la suiuiante, que ie
prononçois deuant-eux fort posément.

Grand Seigneur qui auez fait le ciel
& la terre, vous sçauiez tout, vous pou-
uez tout, ie vous promets de tout mon
cœur (ie ne sçauois vous mentir) ie
vous promets entierement, que s'il vous
plaist nous donner nostre nourriture,
que ie vous obeïray cordialement, que
ie croiray asscurément en vous, ie vous

promets sans feintise, que ie feray tout ce qu'on me dira deuoir estre fait pour vostre amour, aydez nous, vous le pouvez faire, ie feray asseurement ce qu'on m'enseignera deuoir estre fait pour l'amour de vous, ie le promets sans feintise, ie ne ments pas, ie ne scaurois vous mentir, aydez nous à croire en vous parfaitement, puis que vous estes mort pour nous. Ainsi soit il.

Ils firent tous ceste priere, & l'Apostat & le Sorcier aussi bien que les autres, c'est à Dieu de iuger de leurs cœurs, ie leur dis apres cela qu'ils s'en allassent à la chasse avec confiance, ce qu'ils firent, la plus part témoignans par leur visage & par leurs paroles qu'ils auoient pris plaisir en ceste action; mais auant que d'en voir le succez couchons en leur langue ces deux Oraisons, afin qu'on voye l'œconomie de leurs paroles, & leur façon de s'enoncer.

Noukhimame missi ca khichitaien missi,
 Mon Capitaine tout qui as fait tout,
khesteritamen missi, ouabatamen chaoueri-
 qui sçais tout, qui vois, aye pitié
minan. Iesus oucouchichai missi ca nitaouitât
 de nous, Iesus Fils tout qui a fait

278 *Relation de la Nouvelle France,*
Niran ca outchi, arichirinicasouien, niran
de nous qui à cause es fait hōme de nous
ca outchi, iriniouien iscouechich, niran ca
qui à cause es né d'une fille de nous, qui
outchi nipien, niran ca outchi ouascoukhi,
à cause es mort de no^d, qui à cause au ciel
itoutaten; egou khisitaie, nitichenicassouimiki,
es allé ainsi tu disois en mon nom
khégoueia netou tamagaouian niga chaoueri-
quelque chose si ie suis requis i'ē auraypi-
kan, khitaia mibitin naspich ou mitchimi,
tié, ie te prie entierement la nourriture
a richirinou miri, ca ouitapouetasc,
à ce peuple dōne qui veux croire en toy,
ca ouipamitasc, arichirinou khiticou
qui te veux obeyr, ce peuple te dit
naspich, ouitchihien kbigatapouetatin
entierement, si tu m'ayde ie te croyray
naspich, kbiga pamtatim naspich, Nou-
parfaitemēt ie t'obeiray entieremēt mon
khimame chaoueritamitaouitou oui
Capitaine aye pitié de ce que ie dis, si tu
michoutchi nipousin, iterimien
veux en contrechāge ma mort penser
ouirouan mag iriniouisonan, egou inousin.
quant à eux qu'ils vivent, ainsi soit-il.

Voicy celle qu'ils prononcerent.

en l'année 1634.

279

Khicheou khiman ca *khichitaïen* ouascon,
Grand Capitaine qui as faict le Ciel
mag asti, *missi khikhisteriten*, *missi khi-*
& la Terre tout tu sçais toute chose, tu
picoutan, *khititin naspich*, tanté
fais bien ie te dis entierement comment
bona oukhiran? *khititin naspich*, oui mi-
pourrois-je mētir? ie te dis sās feintise si
riatchi nimitchimnan, *ochitau*
tu no⁹ veux dōner nostre nourriture tout
tapoué khiga pamitatin, *ochitau*,
expres asseurement ie t'obeiray tout ex-
tapoué khiga tapouetatin, *khititin*
pres, en verité ie te croiray, ie te le dis
naspich, *niga tin missi khè eitigaouané*;
entieremēt, ie feray tout ce qu'ō me dira
khir khe, *outchi khian*, *ouitchibinan*,
de toy à cause ie le feray ayde nous
khiga khi ouitchi binan, *naspich niga*
tu nous peux ayder absolument ie feray
tin missi, *khè eitigaouané khir khe*, *outchi*
tout ce qu'on me dira de toy à cause
khian, *Khititin naspich*, *nama*
ie le feray ie te le dis sans feintise, ie ne
nikhirassin, *nama khinita khirassin*,
mens pas, ie ne te sçaurois mentir,
ouitchibinan khigai tapouetatinan nasp-
ayde nous affin que nous te croyons par-

280 *Relation de la Nouvelle France,*
Pich ; ouitchibinan mag missi irinioua-
faictemēt, ayde nous puis de tous les hō-
khi ouetchi nipouané. Egou inousin.
mes à cause tu es mort, ainsi soit il.

Nos chasseurs ayans fait leurs pri-
res s'en allerent, qui de ça qui delà cher-
cher de quoy manger, mon hoste & deux
ieunes hommes s'en vont voir vne ca-
bane de Castors, qu'ils auoient voulu
quitter desesperans d'y rien prendre, il
en prit trois pour sa part : l'estant allé
voir apres midy, ie luy en vis prendre vn
de mes yeux, ses compagnons en pri-
rent aussi ie ne sçay pas combien, le Sor-
cier estant allé ce iour là a la chasse avec
vn sien ieune neveu, prit vn Porc epic,
& découurit la piste d'un Orignac qui
fut depuis tué à coup de fleches, contre
l'attente de tous tant qu'ils estoient, n'y
ayant que fort peu de neige, vn ieune
Hiroquois, dont ie parleray cy apres,
tua aussi vn fort beau Porc-epic ; bref
chacun prit quelque chose, il n'y eut
que l'Apostat qui reuint les mains vui-
des, le soir mon hoste apportant trois
Castors, comme il rentroit dans la ca-
bane ie luy tendis la main, il s'en vint
tout ioyeux vers moy recognoissant le

secours de Dieu, & demandant ce qu'il deuoit faire, ie luy dits *Nicanis*, mon bien aymé, il faut remercier Dieu qui nous a assisté; voila bien dequoy, dit l'Apostat, nous n'eussions pas laissé de trouuer cela sans l'ayde de Dieu. A ces paroles ie ne sçais quels mouuemens ne sentit mon cœur, mais si ce traistre m'eust donné vn coup de poignard, il ne m'eust pas plus attristé, il ne falloit que ces paroles pour tout perdre, mon hoste ne laissa point de me dire qu'il feroit ce que ie voudrois, & il se fust mis en deuoir, si le Sorcier ne se fust point ietté à la trauerse: car l'Apostat n'a point d'autorité parmy les Sauvages, ie voulu attendre le festin qu'on deuoit faire, où tous les Sauvages se deuoient trouuer; afin qu'ayant deuant leurs yeux les presents que nostre Seigneur leur auoit fait, ils fussent mieux disposez à recognostre son assistance; mais comme ie vins à leur vouloir parler, le Renegat fasché de ce que luy seul n'auoit rien pris, non seulement ne me voulut pas ayder, ains au contraire il m'imposa silence me commandant tout nettement de me taire; non feray pas luy dis-je, si vous estes

282 *Relation de la Nouvelle France,*
ingrat les autres ne le feront pas, le Sorcier voyant qu'on estoit assez disposé à m'écouter ; croyant que si on me prestoit l'oreille il perdrait autant de son credit, me dit d'une façon arrogante, tais-toy, tu n'as point d'esprit, il n'est pas temps de parler, mais de manger; ie luy voulu demander s'il auoit des yeux, s'il ne voyoit pas manifestement le service de Dieu, mais il ne me voulut pas écouter ; les autres qui estoient dans un profond silence, voyans que le Sorcier m'estoit contraire, n'oserent pas m'inviter à parler : si bien que celui qui faisoit le festin se mit à le distribuer, & les autres à manger ; voila mes pourccaux qui deuorent le gland sans regarder celui qui leur abbat, c'est à qui se réjouira davantage, ils estoient remplis de contentement & moy de tristesse, si fallut-il bien se remettre à la volonté de Dieu, l'heure de ce peuple n'est pas encore venue.

Cecy se passa le Lundy, le Mercredy suiuant mon hoste & un ieune chasseur tuerent à coups de fleches l'Orignac dont ils auoient veu les traces, ils en virent d'autres depuis, mais comme

il y auoit fort peu de neige ils n'en peurent iamais approcher à la portée de leurs arcs, si tost qu'ils eurent ceste proye ils la mirent en pieces, en apportant vne bonne partie dans nos cabannes, & enseueliffans le reste sous la neige; voila tout le monde en ioye, on fait vn grand banquet où iefus inuité, voyant les grandes pieces de chair qu'on donnoit à vn chacun, ie demanday à l'Apostat si c'estoit vn festin à manger tout, & m'ayant dit qu'ouy, il est impossible, luy reparty-ie, que ie mange tout ce qu'on m'a donné, si faut-il bien, me répondit-il, que vous le mangiez, les autres sont assez empeschez à manger leur part, il faut que vous mangiez la vostre: ie luy fais entendre que Dieu deffendoit ces excez, & que ie ne le cōmettrois point y allast-il de la vie, ce mechant blasphemateur pour animer les autres contre moy, leur dit que Dieu estoit fasché de ce qu'ils auoient à manger: Je ne dis pas cela, luy repliquay-ie en Sauuage, mais bien qu'il deffend de manger avec excez, le Sorcier me repart, ie n'ay iamais plus grand bien sinon quand ie suis saoul. Or comme ie ne pouuois venir à

284 *Relation de la Nouvelle France,*
bout de ma portion, i'inuite vn Sauua-
ge mon voisin d'en prendre vne partie,
luy donnant du petun en recompense
de ce qu'il mangeoit pour moy, i'en iette
vne autre partie secrettement aux
chiens, les Sauvages s'en estans doutez
par la querelle qui suruint entre ces ani-
maux, se mirent à crier contre moy, di-
sans que ie cõtaminois leur festin, qu'ils
ne prendroient plus rien, & que nous
mourrions de faim, les femmes & les
enfans ayans sceu cela, me regardoient
par apres comme vn tres-meschant
homme, me reprochant avec dedain
que ie les ferois mourir, & veritable-
ment si Dieu ne nous eust donné rien
de long-temps, i'estois en danger d'e-
stre mis à mort pour auoir commis vn
tel sacrilege: voila iusques où s'estend
leur superstition, pour obuier à cét in-
conuenient: les autres fois on me fit ma
part plus petite, & encore me dit on
que ie n'en mǎgeasse sinon que ce que ie
voudrois, qu'eux mangeroient le reste,
mais sur tout que ie me donnasse bien
de garde de rien ietter aux chiens.

Le trentiesme du mesme mois de De-
cembre, nous decabanasmes, faisans

chemin nous passasmes sur deux beaux lacs tout glacez; nous tirions vers l'endroit où estoit la cache de nostre Orignac, qui ne dura guere en ceste huitiesme demeure.

Le Sorcier me demanda si en verité j'aymois l'autre vie que ie luy auois figuré remplie de tous biens, ayant répondu que ie l'aymois en effect; & moy, dit-il, ie la haï: car il faut mourir pour y aller, & c'est dequoy ie n'ay point d'enue, que si j'auois la pensée & la creance que ceste vie est miserable, & que l'autre est pleine de delices, ie me tuerois moy mesme pour me deliurer de l'vne, & iouir de l'autre: Le luy repars que Dieu nous defendoit de nous tuer, ny de tuer autrui; & que si nous nous faisons mourir nous descendrions dans la vie de malheur, pour auoir contreuenue à ses commandemens: Hé bien, dit il, ne te tuë point toy-mesme, mais moy ie te tuëray pour te faire plaisir, afin que tu ailles au Ciel, & que tu iouisses des plaisirs que tu dis: Le me soufris, luy repliquant que ie ne pouuois pas consentir qu'on m'ostast la vie sans pecher: Le vois bien, me fit-il, en se mo-

286 *Relation de la Nouvelle France,*
quant que tu n'as pas encore enuie de
mourir non plus que moy, non pas re-
pliquay- ie en cooperant à ma mort.

En ce mesme temps nos chasseurs
ayans poursuiuy vn Orignac, & ne
l'ayans peu prendre, l'Apostat se mit à
blasphemer, disant aux Sauvages, le
Dieu qui est marry quand nous man-
geons, est maintenant bien ayse de ce
que nous n'auons pas dequoy disner: &
voyant vne autre fois qu'on apportoit
quelques Porcs-espics, Dieu, disoit-il,
se va fascher de ce que nous nous faou-
lerons. O langue impie que tu seras
chastié! esprit brutal que tu seras con-
fus, si Dieu ne te fait misericorde! que
les Anges & les saintes Ames redou-
blent autant de fois leur Cantique
d'honneur & des louanges, que cét
athée le blasphemera; ce pauvre mise-
rable ne laisse pas par fois d'auoir quel-
ques craintes de l'enfer, qu'il tasche
d'étouffer tant qu'il peut, comme ie le
menaçois vn iour de ces tourmens, peut
estre, me fit-il, que nous autres n'auons
point d'ame, ou que nos ames ne
sont pas faites comme les vostres,
ou qu'elles ne vont point en mesme

endroit: qui est iamais venu de ce pays là pour nous en dire des nouvelles ? ie luy reparty qu'õ ne pouuoit voir le Ciel sans cognoistre qu'il y a vn Dieu, qu'on ne peut conceuoir qu'il y a vn Dieu, sans conceuoir qu'il 'est iuste, & par consequent qu'il rend à vn chacun selon ses œuures, d'où s'ensuiuent de grandes recompenses, ou de grands chastimens: cela est bon, repliqua-il, pour vous autres que Dieu assiste, mais il n'a point soin de nous: car quoy qu'il fasse, nous ne laisserons pas de mourir de faim, ou de trouuer de la chasse; iamais cét esprit hebeté ne peut conceuoir que Dieu gouerne la grande famille du monde, avec plus de cognoissance & plus de soin qu'un Roy ne gouerne son Royau-me, & vn pere de famille sa maison; ie ferois trop long de rapporter tout ce que ie luy dis sur ses blasphemies & sur ses refueries.

Le quatriesme de Ianuier de ceste année mil six cens trente quatre, nous allasmes faire nostre habitation depuis nostre depart des riuies du grand fleuve cherchant tousiours à viure. I'obiectay en cét endroit au Sorcier qu'il n'estoit

288 *Relation de la Nouvelle France,*
pas bon Prophete, car il m'auoit asseu-
ré les deux dernieres fois que nous
auions decabané, qu'il neigeroit abon-
damment aussi tost que nous aurions
changé de demeure, ce qui se trouua
faux, j'ay rapportay cecy à mon hôte
pour luy oster vne partie de la creance
qu'il a en cét homme qu'il adore, il me
répondit que le Sorcier ne m'auoit pas
asseuré qu'il neigeroit, mais qu'il en
auoit seulement quelque pensée; non,
dit-il, il m'a assuré qu'il voyoit venir la
neige, & qu'elle tomberoit aussi-tost
que nous aurions cabané, *Khikhirassin*,
me fit-il, tu as menty, si tost que vous
leur dites quelque chose qu'ils ne veu-
lent point accorder, ils vous payent de
ceste monnoye.

La veille des Rois, mon hôte me dit
qu'il auoit fait vn songe qui luy don-
noit bien de l'apprehension; j'ay veu,
dit il, en dormant que nous estions re-
duits en la dernière extrémité de la
faim, & celuy que tu nous dis qui a tout
fait, m'a assuré que tu tomberas dans
vne telle langueur, que ne pouuant plus
mettre vn pied deuant l'autre tu mour-
ras seul delaisé au milieu des bois, ie
crains

crains que mon songe ne soit que trop veritable : car nous voila autant que jamais dans la necessité faute de neige : i'eu quelque pensée que ce songeur me pouuoit bien iouer quelque mauuais traict, & m'abandonner tout seul pour faire du Prophete ; voila pourquoy ie me seruy de ses armes, opposant *altare contra altare*, songe contre songe : & moy, luy dis-ie, i'ay songé tout le contraire, car i'ay veu dans mon sommeil deux Orignaux, dont l'un estoit desfiatué, & l'autre encore viuant, bon, dit le Sorcier, voila qui va bien, aye esperance, tu raconte de bonnes nouuelles, en effect i'auois fait ce songe quelques iours auparavant, hé bien, dis ie à mon hoste, lequel de nos deux songes sera trouué veritable, tu dis que nous mourrons de faim, & moy ie dis que non, il se mit à rire. Alors ie luy dis que les songes n'estoient que des mensonges, que ie ne m'appuyois point là dessus, que mon esperance estoit en celuy qui a tout fait, que ie craignois neantmoins qu'il ne nous chastiait, veu qu'aussi tost qu'ils auoient à manger, ils se gaussoient de

luy, notamment l'Apostat, il n'a point d'esprit, dirent-ils, ne prends pas garde à luy.

Le iour que les trois Rois adorèrent nostre Seigneur, nous receusmes trois mauuaises nouvelles; La premiere, que le ieune Hyroquois estât allé à la chasse le iour precedent n'estoit point retourné, & comme on scauoit bien que la faim l'ayant affoibly il ne se pouuoit pas beaucoup éloigner, on creut qu'il estoit mort, ou demeuré en quelque endroit si debile pour n'auoir dequoy manger, que la faim & le froid le tueroient, en effect il n'a plus paru depuis, quelques vns ont pensé qu'il pourroit bien s'estre efforcé de retourner en son pays; mais que la plus part asseurent qu'il est mort en quelque endroit sur la neige, c'estoit l'un des trois prisonniers à Tadoussac, dont i'ay parlé és premieres lettres que i'ay enuoyé de ce païs-cy, les deux compatriotes furent executez à mort avec des cruautéz nompareilles, pour luy comme il estoit ieune on luy sauua la vie à la requeste du sieur Emery de Can, que nous priasmes d'in-

recéder pour luy, ce pauvre ieune homme s'en souuenoit fort bien, il auoit grande enuie de demeurer en nostre maison; mais le Sorcier à qui il appartenoit ne le voulut iamais donner ny vendre.

La seconde mauuaise nouvelle nous fut apportée par vn ieune Sauvage qui venoit d'un autre cartier, lequel nous dit qu'un Sauvage d'une autre cabane plus esloignée estoit mort de disette, que ses gens estoient fort épouuentez ne trouuans pas de quoy viure, & nous voyant dans la mesme necessité, cela l'estonnoit encore dauantage. La troisieme fut que nos gens découurirent la piste de plusieurs Sauvages qui nous estoient plus voisins que nous ne pensions, car ils venoient chasser iusques sur nos marches, enleuans nostre proye & nostre vie tout ensemble: ces trois nouvelles abbatirent grandement nos Sauvages, l'alarme estoit par tout, on ne marchoit plus que la teste baissée, ie ne sçay comme i'estois fait, mais ils me paroissoient tous fort maigres, fort pensifs, & fort mornes, si l'Apostat m'eust voulu

292 *Relation de la Nouvelle France,*
ayder à porter & à gagner le Sorcier, c'estoit bien le temps ; mais son diable muet luy lioit sa langue.

Il faut que ie remarque en ce lieu le peu d'estime que font de luy les Sauvages, il est tombé dans vne grande confusion, voulant éviter vn petit reproche, il a quitté les Chrestiens & le Christianisme, ne pouuāt souffrir quelques brocards des Sauvages, qui se gaussoient par fois de luy de ce qu'il estoit Sédentaire, & non vagabond comme eux, & maintenāt il est leur ioüct & leur fallot, il est esclaué du Sorcier, deuant lequel il n'oseroit branler, ses freres & les autres Sauvages m'ont dit souuent qu'il n'auoit point d'esprit, que c'estoit vn busart, qu'il ressembloit à vn chien, qu'il mourroit de faim si on ne le nourrissoit, qu'il s'égaroit dans les bois comme vn European, les femmes en font leur entretien, si quelque enfant pleuroit n'ayant pas de quoy manger, elles luy disoient, tais-toy, tais-toy, ne pleure point, *Petrichtrich*, c'est ainsi qu'on le nomme par mocquerie, rapportera vn Castor, & tu mangeras ; quand elles

l'entendoient reuenir, allez voir, disoiēt elles aux enfans, s'il n'a point tué vne Orignac se gaussant de luy comme d'un mauvais chasseur, qui est vn grand blafme parmy les Sauvages: car ces gens là ne sçauoient trouuer ou retenir des femmes, l'Apostat en a desia eu quatre ou cinq à la faueur de ses freres, toutes l'ont quitté, celle qu'il auoit cēt hyuer me disoit qu'elle le quitteroit au Prin-temps, & si elle eust esté de ce pais, elle l'auroit quitté dés lors; i'apprends qu'en effect elle l'a quitté.

Certain iour nos chasseurs estans tous dehors, il se tint vn conseil des femmes dans nostre cabane: or comme elles ne croyoient pas que ie les peusse entendre, elles parloient tout haut, & tout librement, déchirant en pieces ce pauvre Apostat, l'occasion estoit que le iour precedent il n'auoit rien rapporté à sa femme d'un festin où il auoit esté inuité, & qui n'estoit pas à tout manger, ô le gourmand, disoient-elles, qui ne donne point à manger à sa femme! encore s'il pouuoit tuer quelque chose, il n'a point d'esprit, il mange tout

294 *Relation de la Nouvelle France,*
comme vn chien: il y eut vne grande
rumeur entre les femmes sur ce sujet:
car comme elles ne vont point ordinai-
rement aux festins, elles seroient bien
affligées, si leurs marys perdoient la
bonne coustume qu'ils ont de rappor-
ter leurs restes à leurs familles, le Re-
negat suruenant pendant que ces fem-
mes le depeignoient, elles sceurent
fort bien dissimuler leur ieu, luy témoi-
gnant vn aussi bon visage qu'à l'ordi-
naire, voire mesme celle qui en di-
soit plus de mal, luy donna vn bout de
petun, qui estoit pour lors vn grand
present.

Le neufiesme de Ianuier, vn Sauua-
ge nous venant visiter nous dit, qu'un
homme & vne femme du lieu dont il
venoit estoient morts de faim, & que
plusieurs n'en pouuoient plus, le pau-
vre homme ieusna le iour de sa venue
aussi bien que nous, pource qu'il n'y
auoit rien à manger, encore fallut il
attendre iusques au lendemain à dix
heures de nuit, que mon hoste rappor-
ta deux Castors qui nous firent grand
bien.

Le iour ſuiuant nos gens tuerent le ſecond Orignac, ce qui cauſa par tout vne grande ioye, il eſt vray qu'elle fut vn peu troublée par l'arriuée d'un Sauuage, & de deux ou trois femmes, & d'un enfant que la famine alloit bien toſt égorger, s'ils n'euffent fait rencontre de noſtre cabane, ils eſtoient fort hideux, l'homme particulièrement plus que les femmes, dont l'une auoit accouché depuis dix iours dans les neiges, & dans la famine, ayant paſſé pluſieurs iours ſans manger.

Mais admirez s'il vous plaiſt l'amour que ces barbares ſe portent les vns aux autres, on ne demanda point à ces nouueaux hoſtes pourquoy ils venoient ſur nos limites, s'ils ne ſçauoient pas bien que nous eſtions en auſſi grand danger qu'eux, qu'ils nous venoient oſter le morceau de la bouche; ains au contraire on les receut, non de paroles, mais d'effect, ſans courtoisie exterieure, car les Sauvages n'en ont point, mais non pas ſans charité: on leur ietta de grandes pieces de l'Orignac nouuellement tué,

296 *Relation de la Nouvelle France,*
sans leur dire autre parole, *mitisoukon*
mangez, aussi leur eust on fait grand
tort d'appliquer pour lors leurs bou-
ches à autre usage : pendant qu'ils
mangeoient on prepara vn festin, au-
quel ils furent traictez à grand plat,
ie vous en répons : car la portion
qu'on leur donna à chacun, sortoit
beaucoup hors de leurs *ouragans* qui
sont tres capables.

Le seiziesme du mesme mois nous
battismes la campagne, & ne pouuans
arriuer au lieu où nous pretendions,
nous ne fismes que gister dans vne ho-
stelerie que nous dressames à la haste,
& le lendemain nous poursuiuismes no-
stre chemin passans sur vne monta-
gne si haute, qu'encore que nous ne
montassions point iusques au sommet,
qui me paroissoit armé d'horribles ro-
chers, neantmoins le Sorcier me dit,
que si le Ciel obscurcy d'un brouillard
eust esté serain nous eussions veu à
mesme téps Kebec & Tadoussac, esloi-
guez l'un de l'autre de quarante lieues
pour le moins, ie voyois au dessous de
moy avec horreur des precipices, qui me

faisoient trembler, i'apperceuois des montagnes au milieu de quelques plaines qui me paroissoient comme des petites tours, ou plustost comme de petits chasteaux, quoy qu'en effect elles fussent fort grandes & fort hautes: figurez vous quelle peine ont ces barbares de traifner si haut leur bagage, i'auois de la peine à monter, i'en trouuois encore plus à descendre: car quoy que ie m'esloignasse des precipices, neantmoins la pente estoit si roide, qu'il estoit fort aisé de rouler à bas, & de s'aller fendre la teste contre vn arbre.

Le vingt neufiesme nous acheuâmes de descendre ceste montagne portant nostre maison sur la pente d'une autre où nous allâmes: voila le terme de nostre pelerinage, nous commencerons d'oresnauant à tourner bride & à tirer vers l'Isle où nous auons laissé nostre Chaloupe, nous vismes icy les sources de deux petits fleuves, qui se vont rendre dans vn fleuve aussi grand au dire de nos Sauvages, que le fleuve de S. Laurens, ils l'appellent *Oueraouachticou*.

298 *Relation de la Nouvelle France,*

Ceste douziesme demeure nous a deliuré de la famine, car les neiges se trouuant hautes assez pour arrester les grandes iambes de l'Elan, nous eusmes dequoy manger. Au commencement ce n'estoient que festins & que danses, mais cela ne dura pas, car on se mit bien-tost à faire seicherie passant de la famine dans la bonne nourriture, ie me portay bien: mais passant de la chair fraische au boucan ie tombay malade, & ne recouray point entierement la santé que trois semaines apres mon retour en nostre petite maisonnette. Il est vray que depuis le commencement de Fevrier iusques en Aupil nous eusmes tousiours dequoy manger, mais d'un boucan si dur & si sale & en si petite quantité, horsmis quelques iours d'abondance qui se passoient en festins que nos Sauvages contoient ces derniers, mois aussi bien que les precedens entre les mois & les hyuers de leurs famines. Ils me disoient que pour estre traicté mediocrement & sans patir, il nous falloit vn Elan gros comme vn bœuf en deux iours, tant à raison du

nombre que nous estions, comme aussi qu'on mange beaucoup de chair quand on n'a ny pain ny autre chose pour faire durer la viande, adioustez qu'ils sont grands disneurs, & que la chair d'Elan ne demeure pas long-temps dans l'estomach.

Je me suis oublié de dire ailleurs que les Sauvages content les années par les hyuers, pour dire quel aage as-tu, ils disent combien d'hyuers as-tu passé? ils content aussi par les nuits comme nous faisons par les iours, au lieu que nous disons, il est arriué depuis trois iours, ils disent depuis trois nuits.

Le cinquiesme de Feurier nous quit-
tasmes nostre douziesme demeure pour
aller faire la treiziesme, ie me trouuois
fort mal, le Sorcier me tuoit avec ses
cris, ses hurlemens, & son tambour, il
me reprochoit incessamment que ie fai-
sois l'orgueilleux, & que le *Manitou*
m'auoit fait malade aussi bien que les
autres. Ce n'est pas, luy disois-je, le
Manitou ou le diable qui m'a causé ce-
ste maladie, mais la mauuaise nourri-
ture qui m'a gasté l'estomach, & les

300 *Relation de la Nouvelle France,*
autres travaux qui m'ont debilité, tout
cela ne le contentoit point, il ne lais-
soit pas de m'attaquer, notamment en
la presence des Sauvages, disant que ie
m'estois mocqué du *Manitou*, & qu'il
s'estoit vangé de moy comme d'un su-
perbe. Vn iour comme il me faisoit ces
reproches ie me leue en mon seant, ie
luy dis, afin que tu sçache que ce n'est
point ton *Manitou* qui cause les ma-
ladies & qui tuë les hommes, escoute
comme ie luy parleray, ie m'escrie en
leur langue grossissant ma voix, appro-
che *Manitou*, vien demon, massacre
moy si tu as le pouuoir, ie te deffie, ie
me mocque de toy, ie ne te crains point,
tu n'as point de pouuoir sur ceux qui
croient & qui ayment Dieu, viens &
me tuë si tu as les mains libres, tu as
plus de peur de moy que ie n'ay de toy,
le Sorcier fut espouuenté, & me dit
pourquoy l'appelle tu? puis que tu ne le
crains pas, c'est signe que tu l'appelle
afin qu'il te tuë, non pas luy dis-je, mais
ie l'appelle afin que tu ayes cognoissan-
ce qu'il n'a point de puissance sur ceux
qui adorent le vray Dieu, & pour te fai-

en l'année 1634. 301
re voir qu'il n'est pas la seule cause des
maladies comme tu crois.

Le neufiesme du mesme mois de Fe-
urier nous battismes la campagne, le
Sorcier nonobstant ma maladie me vou-
loit faire porter du bagage à toute for-
ce, mais mon hoste eust pitié de moy,
voire mesme m'ayant rencontré en che-
min que ie n'en pouuois quasi plus, il
prit de son bon gré ce que ie portois, &
le mit sur sa traïsne.

Le quatorziesme & quinziesme nous
fismes de longues traictes pour aller
planter nostre cabane proche de deux
petits Orignaux que mon hoste auoit
tué: faisant chemin on reconneust la
piste d'un troisieme, mon hoste fit arre-
ster le camp pour l'aller descouurir: i'e-
stois en l'arriere garde de nostre armée,
c'est à dire que ie venois doucement
derriere les autres quand tout à coup
ie vis paroistre cét Elan qui couroit
droit à moy, & mon hoste apres, qui
luy donnoit la chasse, la neige estoit fort
haute, voila pourquoy il ne fit qu'enui-
ron cinq cens pas deuant que d'estre
mis à mort, nous cabanames aupres &
en fismes curée.

L'Apostat continuant icy ses blasphemes, me demandoit deuant ses freres pour les animer contre Dieu, pourquoy ie priois celuy qui n'entendoit ny ne voyoit rien, ie le repris fort vertement & luy imposay silence.

Le sixiesme iour de Mars nous changeasmes de demeure, le Sorcier, le Renegat, & deux ieunes chasseurs tirerent deuant nous droit aux riues du grand fleuve, l'occasion de cette separation fut que mon hoste braue chasseur ayant descouvert quatre Orignaux, & quantité de cabanes de Castors, ne pouuant luy seul en mesme temps chasser en tant d'endroits fort separez, le Sorcier mena ces ieunes chasseurs pour courre les Orignaux, & luy demeura pour les Castors: cette separation me fit du bien & du mal. Du bien, pource que ie fus deliuré du Sorcier, ie n'ay point de paroles pour declarer l'importunité de ce meschant homme. Du mal, pource que mon hoste ne prenant point d'Orignaux nous ne mangions que du boucan qui m'estoit fort contraire, que s'il prenoit des Castors on en faisoit seiche-

rie, excepté des petits que nous mangions, les plus beaux & les meilleurs estoient reservez pour les festins qu'ils deuoient faire au Printemps, au lieu où ils s'estoient donnez le rendez-vous.

Le treiziesme du mesme mois nous fismes nostre dix-huictiesme demeure proche d'un fleuve dont les eaux me sembloient sucrées apres la saleté des neiges fonduës que nous beuions es stations precedentes dans vn chauderon gras & enfumé, ie commençay à ressentir en ce lieu l'incommodité du coucher sur la terre bien froide pendant l'hyuer & fort humide au Printemps, car le costé droit sur lequel ie reposois s'estourdit tellement par la froidure qu'il n'auoit quasi plus de sentiment: or craignant de ne remporter que la moitié de moy mesme dans nostre petite maison, l'autre demeurante paralytique, ie promis vne chemise & vne petite robbe à vn enfant pour vn meschât bout de peau d'Orignac que sa mere me donna, ceste peau non passée estoit bien aussi dure que la terre, mais non pas si humide,

304 *Relation de la Nouvelle France,*
i'en fis mon liët qui se trouua si courti
que la terre qui auoit iusques alors pris
possession de tout mon corps en retint
encore la moitié.

Depuis le depart du Sorcier, mon
hoste prenoit plaisir à me faire des que-
stions, notamment des choses naturel-
les, il me demanda vn iour comme la
terre estoit faite, & m'apportant vne
écorce & vn charbon, il me la fit dé-
crire, ie luy despeins donc les deux
Hemispheres, & apres luy auoir tracé
l'Europe, l'Asie, & l'Afrique, ie vins à
nostre Amerique, luy montrant com-
me elle est vne grande Isle, ie luy d'écri-
uy la coste de l'Acadie, la grande Isle
de Terre-neufue, l'entrée & golfe de
nostre grand fleuve de saint Laurens,
les peuples qui habitent ses riuës, le
lieu où nous estions pour lors, ie montay
iusques aux Algonquains, aux Hiro-
quois, aux Hurons, à la nation neu-
tre, &c. luy designant les endroits plus
& moins peuplez, ie passay à la Floride,
au Perou, au Brasil, &c. luy parlant en
mon jargon de ces contrées le mieux
qu'il m'estoit possible, il m'interrogea
plus

plus particulièrement des païs dont il a connoissance, puis m'ayans escouté fort patiemment, il s'escria prononçant vne de leurs grandes admirations *Amo-nitatinaniouikhi* ! Ceste robbe noire dit vray ! parlant à vn vieillard qui me regardoit, puis se tournant deuers moy il me dit, *nicanis*, mon bien aymé tu nous donne en verité de l'admiration, car nous connoissons la plus part de ces terres & de ces peuples, & tu les a descrit comme ils sont, i'insiste là dessus, comme tu vois que ie dis vray parlant de ton pays, aussi dois-tu croire que ie ne ments pas parlant des autres, ie le croy ainsi, me repartit-il, ie poursuy ma pointe, comme ie suis veritable en parlant des choses de la terre, aussi tu dois te persuader que ie ne voudrois pas mentir quand ie te parle des choses du Ciel, & partant tu dois croire ce que ie t'ay dit de l'autre vie: il s'arresta vn peu de temps tout court, puis ayant vn peu pensé à part soy, ie te croiray, dit-il quand tu scauras bien parler, nous auons maintenant trop de peine à nous faire entendre.

Il m'a fait mille autres questions, du Soleil, de la rondeur de la terre, des Antipodes, de la France, & fort souvent il me parloit de nostre bon Roy, il admiroit quand ie luy disois que la France estoit remplie de Capitaines, & que le Roy estoit le Capitaine de tous les Capitaines, il me prioit de le mener en France pour le voir, & qu'il luy feroit des presens, ie me mis à rire luy disant que toutes leurs richesses n'estoient que pauureté à comparaison des grandeurs du Roy, le veux dire, me fit-il, que ie feray des presens à ceux de sa suite, pour luy ie me contenteray de le voir, il racontoit par apres aux autres ce qu'il m'auoit ouy dire. Il me demanda vne autrefois s'il y auoit de grands faults dans la mer, c'est à dire des cheutes d'eau, il y en a beaucoup dans les fleuves de ce pais cy, vous verrez vne belle riuiera coulant fort doucement tomber tout à coup dans vn lit plus bas, les terres ne s'abbaissant pas également, mais comme par degrez en certains endroits, nous voyons vn de ces faults proche de Kebec nommé le faut de

Montmorency, c'est vne riuiere qui vient des terres, & qui se precipite de fort haut dans le grand fleuve de saint Laurens, les riuers qui le bornent estans fort releuées en cét endroit: Or quelques Sauvages croyoient que la mer a de ces cheutes d'eau dans lesquelles se perdent quantité de nauires ie luy oltay cét erreur, ces inegalitez ne se retrou-uans point dans l'Ocean.

Le vingt-troisiesme de Mars nous repassames le fleuve *Capititetchioneth*, que nous auions passé le troisiesme de Decembre.

Le trentiesme du mesme mois, nous vinsmes cabaner sur vn fort beau lac, en ayant passé vn autre plus petit en nostre chemin, ils estoient encore autant glacez qu'au milieu de l'hyuer, mon hoste me consoloit icy me voyant fort foible & fort abbatu, ne t'attriste point, me disoit-il, si tu t'attriste tu seras encore plus malade, si ta maladie augmente tu mourras, considere que voicy vn beau pays, ayme-le, si tu l'ayme, tu t'y plairas, si tu t'y plais tu te resioüiras, si tu te resioüis tu guariras, ie

308 *Relation de la Nouvelle France,*
prenoïſ plaisir d'entendre le diſcours de
ce pauvre barbare.

Le premier iour d'Auril nous quittaf-
mes ce beau lac & tiraſmes à grande
erre vers noſtre rendez vous, nous paſ-
ſames la nuit dans vn meſchant trou
enfumé & dès le matin continuaſmes
noſtre chemin faiſant plus en ces
deux iournées que nous n'auions faiſt
en cinq, Dieu nous fauoriſa d'un beau
temps : car il gela bien fort, & l'air
fut ſerein, s'il euſt fait vn degel com-
me les iours precedens, & que nous
euſſions enfoncé dans la neige, com-
me quelques fois il nous eſt arriué, ou
il m'eũt fallu traîner, ou ie fuſſe de-
meuré en chemin tant i'eũs mal. Il
eſt bien vray que la nature a plus de
force qu'elle ne s'en fait accroire, ie
l'experimentay en ceſte iournée en la-
quelle i'eũs ſi foible, que m'aſſeant
de temps en temps ſur la neige pour
me reposer, tous les membres me trem-
bloient, non pas de froid, mais par vne
debilité qui me cauſoit vne ſueur au
front. Or comme i'eũs alteré vou-
lant puiser de l'eau dans vn torrent

que nous rencontraſmes, la glace que ie caſſois avec mon baſton tomba deſſous moy, & fit vn grand eſcarre: quand ie me vis avec mes raquettes aux pieds ſur ceſte glace flottante ſur vne eau fort rapide, ie ſautay pluſtoſt ſur le bord du torrent, que ie n'euy conſulté ſi ie le deuois faire, & la nature qui ſuoit de foibleſſe trouua aſſez de force pour ſortir de ceſte grande eau n'en voulant pas tant boire à la fois, ie n'eus que la peur d'un peril qui fut pluſtoſt eſuité que reconnu.

Le danger paſſé ie pourſuiuis mon chemin aſſez lentement, auſſi ne pouuois-ie pas eſtre bien fort, car outre la maladie qui ne m'auoit point quitté parfaitement depuis le dernier iour de Ianuier, ie ne mangeois ces derniers iours que trois bouchées de boucan le matin, & cheminois quaſi tout le reſte du iour ſans autre rafraichiffement qu'un peu d'eau quand i'en pouuois rencontrer. Enfin i'arriuay apres les autres ſur les riuies du grand fleuve, & trois iours apres no-

310 *Relation de la Nouvelle France,*
stre arriuée, sçauoir est le quatriesme
du mesme mois d'Auril nous fismes
nostre vingt-troisiesme station allant
planter nostre cabane dans l'Isle où
nous auions laissé nostre Chaloupe,
nous y fismes tres-mal logez: car ou-
tre que le Sorcier s'estoit remis avec
nous, nous estions si remplis de fu-
mée que nous n'en pouuions plus,
d'ailleurs le grand fleuve estant icy sa-
lé, & l'Isle n'ayant aucune fontai-
ne nous ne beuions que des eaux de
neige, ou de pluye encore tres sa-
le. Je ne fis pas long sejour en ce lieu,
mon hoste voyant que ie ne guerissois
point, prit resolution de me remener en
nostre maisonnette, le Sorcier l'en vou-
lut detourner, mais ie rompis ses me-
nées, i'obmets mille particularitez pour
tirer à la fin.

Le cinquiesme du mois d'Auril,
mon hoste, l'Apostat, & moy, nous
embarquasmes dans vn petit canot
pour tirer à Kebec sur le grand fleu-
ue, apres auoir pris congé de tous les
Sauuages: or comme il faisoit encore
froid nous ne fismes pas loin que

nous trouuâmes vne petite glace formée pendant la nuit, qui seruoit de superficie aux eaux, voyant qu'elle s'estendoit fort loing, nous donnons dedans, l'Apostat qui estoit deuant, la brisant avec son auiron : or soit qu'elle fut trop trenchante, ou l'écorce de nostre gondole trop foible, il se fit vne ouuerture qui donna entrée à l'eau dans nostre canot & à la crainte dans nostre cœur, nous voilà aussi tost tous trois en action, mes deux Sauvages de ramer, & moy de ietter l'eau, nous tirons à force de rames dans vne Isle que nous rencontraâmes fort à propos, & mettant pied à terre les Sauvages empoignent leur canot, le tirent de l'eau, le renuersent, battent leur fusil, font du feu, recousent l'escorce fendue, y appliquent de leur bray, qui est vne espee d'encens qui decoule des arbres, remettent le canot à l'eau, nous nous rembarquons & continuons nostre chemin: ie leur dy voyant ce peril que s'ils croyoient rencontrer souuent de ces glaces tran-

312 *Relation de la Nouvelle France,*
chantes, qu'il valloit mieux retourner
d'où nous estions partis, & attendre
que le temps fut plus chaud, il est vray
me fit mon hoste que nous auons pen-
sé perir, si l'ouuerture eust esté vn peu
plus grande c'estoit fait de nous, pour-
suiuons neantmoins nostre chemin
ces petites glaces ne m'estonnent pas.
Sur les trois heures du soir nous ap-
perceusmes deuant nous vn banc de
glaces espouuentables qui nous bou-
choit le chemin, s'estendant au tra-
uers de ce fleuve à plus de quatre
lieuës loin: nous fusmes vn peu eston-
nez, mes gens ne laissent pas pour-
tant de les aborder ayant remarqué
vne petite esclaircie, ils se glissent là
dedans faisant tournoyer nostre peti-
te gondole, tantost d'vn costé & puis
tantost de l'autre pour gagner touf-
jours pais, en fin nous trouuasmes ces
glaces si fort serrées qu'il fut impossi-
ble d'auancer ny de reculer, car le
mouuement de l'eau nous enferma de
toutes parts, au milieu de ces glaces
s'il y fut suruenu vn vent vn peu vio-
lent nous estions froissez & brisez &

nous & nostre canot comme le grain entre les deux pierres du moulin, car figurez-vous que ces glaces sont plus grandes & plus espaises que les meules & la tremuë tout ensemble, mes Sauvages nous voyant si empressez sautent de glaces en glaces comme vn ecririeux d'arbres en arbres, & les repoussant avec leurs auirons font passage au canot dans lequel i'estois tout seul plus prest de mourir par les eaux que de maladie, nous combattismes en cette sorte iusques à cinq heures du soir que nous prîmes terre: ces barbares sont tres habiles en ces rencontres, ils me demandoient par fois dans la plus grande presse des glaces si ie ne craignois point, veritablement la nature n'ayme point à iouer à ce jeu là, & leurs sauts de glaces en glaces me sembloient des sauts perilleux & pour eux & pour moy, veu mesmes que leur pere, à ce qu'ils me disoient, s'est autrefois noyé en semblable occasion. Il est vray que Dieu dont la bonté est par tout aymable, se trouue aussi bien dessus les eaux

314 *Relation de la Nouvelle France,*
& parmy les glaces que dessus la terre,
nous eschappasmes encore de ce dan-
ger qui ne leur sembla pas si grand que
le premier.

Arriuez que nous fusmes à terre no-
stre maison fut de nous coucher au
pied d'un arbre, nous mangeasmes un
peu de boucan, beusmes un peu d'eau
de neige fonduë, ie fis mes petites prie-
res & me couchay aupres d'un bon feu
qui contrequarra la gelée & le froid de
la nuit.

Le lendemain nous nous embarquas-
mes de bonne heure, la marée qui nous
auoit amené ces armées de glaces les
porta la nuit d'un autre costé, nous
fismes donc quelque chemin deliurés
de cette importunité, mais le vent s'a-
nimant & nostre petite gondole, com-
mençant à dancier sur les vagues nous
nous iettasmes incontinent à terre.
I'auois prié mes gens de prendre avec
eux des escorces pour nous faire la
nuit vne cabane & des viures pour
quelques iours n'estant pas asseurez
du retardement que le mauuais temps
nous pourroit apporter, ils ne firent

ny l'un ny l'autre, si bien qu'il fallut
coucher à l'air, & manger en qua-
tre iours les viures d'une iournée, ils
s'attendoient d'aller à la chasse, mais
les neiges se fondans ils ne pou-
voient courre, le temps faisant mi-
ne de s'appaiser nous nous rembar-
quâmes, mais à peine auions nous
faict trois lieues que le vent se ren-
forçant nous va ietter dans des gla-
ces que la marée nous ramenoit, &
nous d'enfiler viste un petit ruisseau,
de sauter tous trois sur ces grandes
glaces qui estoient aux bords, & de
gagner la terre, nos Sauvages por-
tant sur les espaules nostre nauire d'é-
corce.

Nous voila donc logez à une poin-
te de terre exposée à tous vents, nous
mettons nostre canot derriere nous
pour nous abrier, & comme nous
craignons la pluye ou la neige mon
hoste iette une meschante peau sur
des perches, & voila nostre maison
faicte. Les vents furent si violens tou-
te la nuit qu'ils nous penserent en-
leuer nostre canot, le lendemain la

316 *Relation de la Nouvelle France,*
tempeste continuant dessus l'eau, mes
gens n'ayant dequoy manger vont à
la chasse par vn tres mauuais temps,
le Renegat ne prit rien, mon hoste
rapporta vn perdreau qui nous seruit
de deieusner, de disner, & de soup-
per, vray que i'auois mangé quelques
fueilles de fraisiens, que la terre nou-
uellement descouuerte de neige en
quelques endroits me donna, nous
passasmes donc cette iournée sans
faire chemin, la nuit les tempestes,
les foudres de vent, & le froid nous
assaillirent avec telle furie qu'il fallut
ceder à la force, nous estions cou-
chez à platte terre, car ils n'auoient
pas pris la peine de la couvrir de
branches de pin, nous nous leuas-
mes tout glassez pour entrer dans le
bois & emprunter des arbres l'abry
contre le vent & le couuert contre
le Ciel, nous fismes vn bon feu, &
nous nous endormismes sur la terre
encore toute humide pour auoir ser-
uy de liét à la neige peut-estre la nuit
precedente, Dieu soit beny sa proui-
dence est adorable, nous mettions ce

iour & ceste nuit dans le catalogue des iours & des nuits mal-heureux, & ce nous fut vn temps de bon-heur, car si ces tempestes & ces vents ne nous eussent tenus prisonniers sur terre pendant qu'ils escartoient les glaces les poussant à val la riuere, elles se fussent referrées au trauers des Isles où nous deuions passer, & nous eussent fait mourir de trop boire ecrasant nostre canot, ou de trop peu manger, nous arrestans dans quelque Isle deserte. Bref si nous fussions eschappez c'eust esté à grand peine, de plus i'estois si debile & si malade quand ie m'embarquay, que si i'eusse preueu les trauaux du chemin i'au-rois creu deuoir mourir cent fois, & neantmoins Nostre Seigneur com-mença à me fortifier dans ces diffi-cultez, en sorte que i'ayday mes Sau-uages à ramer notamment sur la fin de nostre voyage.

Le iour qui suiuit ces tempestes pa-roissant encor animé de vents, mon hôte & l'Apostat s'en allerent à la chasse, vne heure apres leur depart le

318 *Relation de la Nouvelle France,*
Soleil paroist beau, l'air serein, les
vents s'appaisent, les vagues cessent,
la mer se calme, en vn mot il abonit
pour parler en matelot, me voila bien
en peine de vouloir suiure mes Sau-
uages à la trace pour les appeller,
c'estoit mettre vne tortuë apres des
leuriers, ie iette les yeux au Ciel com-
me au lieu de refuge, les abbaisant
vers la terre ie vy mes gens courre
comme des cerfs sur l'orée du bois, ti-
rans vers moy, aussi-tost ie me leue
portant nostre petit bagage vers la
riuere, mon hoste arriuant *eco, eco, pou-
sitau, poustitau, viste, viste,* embarquons
nous, embarquons nous, plustost fait
qu'il n'est dit, le vent & la marée
nous fauorisent, nous allons à rames
& à voile, nostre petit vaisseau d'es-
corce fendant les ondes d'vne vites-
se incomparable, nous arriuasmes
en fin sur les dix heures du soir à la
pointe de la grande Isle d'Orleans,
il n'y auoit plus que deux lieues iuf-
ques à nostre petite maison, mes gens
n'auoient point mangé tout le iour,
ie leur donne courage, nous nous

efforçons de passer outre, mais le courant de la marée qui descendoit encor estant fort rapide, il fallut attendre le flot pour trauffer la grande riuere, nous entraismes cependant dans vne anse de terre, & nous nous endormismes sur le sable aupres d'un bon feu que nous allumames.

Sur la minuit le flot retournant nous nous embarquames, la Lune nous éclairant, le vent & la marée nous faisoient voler, mon hôte n'ayant pas voulu tirer du costé que ie luy dis, nous pensames nous perdre dans le port, car comme nous vinsmes pour entrer dans nostre petite riuere nous la trouuames encore toute glacée, nous voulusmes approcher du riuage, mais le vent y auoit rangé vn grand banc de glace, qui se choquoient les vnes les autres nous menaçoient de mort si nous les abordions, si bien qu'il fallut tourner bride, mettre le cap au vent & se roidir contre la marée, c'est icy que ie vy les vaillances de mon hôte, il s'e-

320 *Relation de la Nouvelle France*,
estoit mis deuant comme au lieu le
plus important dans les grands pe-
rils, ie le voyois au trauers de l'ob-
scurité de la nuit qui nous donnoit
de l'horreur & augmentoit nostre
danger, bander ses nerfs, se roidir
contre la mort, tenir nostre petit
canot en estat dans des vagues capa-
bles d'engloutir vn grand vaisseau,
ie luy crie *Nicanis ouabichtigoueiakhi*
ouabichtigoueiakhi, mon bien-aymé à
Kebec, à Kebec, tirons là. Quand
nous vismes à doubler le saut au Ma-
telot, c'est le detour de nostre riuie-
re dans le grand fleuve, vous l'eus-
siez veu ceder à vne vague, en cou-
per vne autre par le milieu, éuiter
vne glace, en repousser vne autre,
combattre incessamment contre vn
furieux vent de Nordest qu'il auoit en
teste.

Ayans éuité ce danger nous voulu-
mes aborder la terre, mais vne armée de
glaces animée par la fureur des vents
nous en deffendoit l'entrée: nous allōs
donc iusques deuant le fort costoyant
le riuage, cherchant dans les tenebres

vn petit iour ou vne petite eclaircie
parmy ces glaces; mon hôte ayant ap-
perceu vn rerin ou detour qui est au bas
du fort, où les glaces ne branloient point
pour estre à l'abry du vent, en detourne
avec son airon trois ou quatre furieu-
ses qu'il rencontre, & vous iettelà de-
dans, il saute viste hors du Canot, crai-
gnant le retour des glaces, criant *Capa-
tan*, de sembarquons nous; le mal estoit
que les glaces estoient si hautes & si
épaisses sur le riuage, qu'à peine y pou-
uois-je atteindre avec les mains; ie ne
sçauois à quoy m'aggraffer pour sortir
du Canot, & monter sur ces riuages gla-
cées; ie prends mon hôte par le pied
d'une main, & de l'autre vn coing de
glace que ie rencontre, & ie me iette en
sauueté, vn avec les deux autres, vn
lourdaut deuiant habille homme en ces
occasions: estant fort du Canot, ils
l'enleuent par les deux bouts, & le met-
tent en lieu d'assurance: cela fait nous
nous regardons tous trois, & mon hôte
reprenant son haleine, me dit, *nicaus k he-
gat nipiaco*, mon grand amy, nous auons
pensé mourir; il auoit encore horreur,
de la grandeur du peril. Il est vray que

324 *Relation de la Nouvelle France,*
s'il n'eust eu des bras de Geant (il est
hōme grand & puissant & d'une indu-
strie non commune, ny aux François ny
aux Sauvages,) ou vne vague nous eust
englouty, ou le vent nous eust renuer-
sé, ou vne glace nous eust escrasé; disons
plustost que si Dieu n'eust esté nostre
Nocher, les ondes qui battent les riués
de nostre demeure auroient esté nostre
sepulchre. De verité quiconque habite
parmy ces peuples, peut bien dire avec
le Roy Prophete, *anima mea in manibus*
meis semper: depuis peu vn de nos Fran-
çois s'est noyé en semblable occasion, &
encore moindre, car il ny auoit plus de
glaces.

Estant échappé de tant de perils,
nous trauersâmes nostre riuere sur la
glace, qui n'estoit point encore partie;
& sur les trois heures apres minuit, le
Dimanche de Pasques fleurie 9. d'Auril,
ie r'entray dans nostre petite maison-
nette, Dieu sçait avec quelle ioye de
part & d'autre, ie trouuay la maison
remplie de paix & de benediction, tout
le monde en bonne santé par la grace de
nostre Seigneur. Monsieur le Gouver-
neur sçachant mon retour, m'enuoya

deux des principaux de nos François pour ſçauoir de ma ſanté, ſon affection nous eſt tres ſenſible; l'un des chefs de l'ancienne famille du pays accourut auſſi pour ſe reſioüyr de mon retour, ils auoient connu par le peu de neige qu'il y a eu cét Hiuier, moins rigoureux que les autres, que les Sauuages & moy par conſequent eſtions preſſez de la faim; c'eſt ce qui en reſioüit quelques-uns iuſques aux larmes, me voyant reſchappé d'un ſi grand danger; noſtre Seigneur ſoit beny dans les temps & dans l'éternité.

I'ay bien voulu d'eſcrire ce voyage, pour faire voir à V. R. les grands travaux qu'il faut ſouffrir en la ſuite des Sauuages, mais ie ſupplie pour la dernière fois ceux qui auroient enuie de les ayder, de ne point prendre l'eſpouuente, non ſeulement pource que Dieu ſe faiet ſentir plus puiffamment dans la diſette, & dans les delaiſſements des creatures, mais auſſi pource qu'il ne ſera plus de beſoin de faire ces courſes, quād on aura la connoiſſance des langues, & qu'on les aura reduites en preceptes: I'ay rapporté quelques particularitez

324 *Relation de la Nouvelle France,*
qui se pouuoient obmettre, i'en ay passé
beaucoup sous silence, qu'on auroit
peu lire avec plaisir, mais la crainte d'e-
stre long, & mon peu de loisir, me fait
tomber dans le desordre: il est vray que
i'elcris à vne personne, *qua ordinabit me*
charitatem, les autres qui verront cette
Relation par son entremise, me feront
la meisme faueur. le dirois volontiers ces
deux mots, à quiconque lira ces escrits,
ama & fac quod vis, retournons à nostre
journal.

Le 31. de May, arriua vne chalouppe
de Tadoussac, qui apportoit nouuelle
que trois vaisseaux de Messieurs les As-
sociez estoient arriuez, deux estoient
dans le port, & le troisieme au Moulin
Bande, c'est vn lieu proche de Tadeus-
sac, que les François ont ainsi nommé:
on attendoit le quatrieme, dans lequel
commandoit Monsieur du Plessis, gene-
ral de la flotte, qui vint bien-tost apres,
& loua grandement le Capitaine Bon-
temps, pour s'estre rendu fort recom-
mandable en la prise du nauire Anglois,
dont i'ay parlé cy-dessus; si tost que ces
bonnes nouuelles furent portées à M^or-
sieur de Champlain, comme il n'obmet

aucune occasion de nous tesmoigner son affection, il nous en fit donner aduis par homme exprés, nous enuoyans en outre les lettres du R. P. L. allement, qui m'escriuoit qu'il estoit arriué avec N. F. Iean Ligeois en bonne santé, & qu'au premier vent il seroit des nostres; il est aisé à conjecturer avec quelle ioye nous benîmes & remercialmes nostre Seigneur de ces bonnes & si fauorables nouvelles; il arriua deux iours apres dans la barque que commandoit Monsieur Castillon, qu'on dit s'estre fort bien comporté en la prise de l'Anglois.

Le quatrieme iour de Iuin Feste de la Pentecoste, le Capitaine de Nesle arriua à Kebec, dans son vaisseau estoit Monsieur Giffard, & toute sa famille, composée de plusieurs personnes qu'il ameine, pour habiter le pays, sa femme s'est montrée fort courageuse à suiure son mary: elle estoit enceinte quand elle s'embarqua; ce qui luy faisoit apprehender ses couches, mais nostre Seigneur la grandement fauorisée, car huit iours apres son arriuée, sçauoir est le Dimanche de la sainte Trinité, elle s'est deliurée fort heureusement d'une fille qui se porte

326 *Relation de la Nouvelle France*,
fort bien, & que le Pere Lallemant baptisale lendemain.

Le 24. du mesme mois, feste de S. Iean Baptiste, le vaisseau de l'Anglois commandé par le Capitaine de Lormel, monta iusques icy, & nous apporta le P. Iacques Buteux en assez bonne santé, Monsieur le General nous honorant de ses lettres, me manda que ce bon Pere auoit esté fort malade pendant la trauersée, & le Pere nous dit qu'il auoit esté secouru & assisté si puissamment, & si charitablement de Monsieur le General & de son Chirurgien, qu'il en restoit tout confus, maintenant il se porte mieux que iamais il n'a fait.

Le premier de Iuillet le P. Brebœuf & le P. Daniel partirent dans vne barque, pour s'en aller aux trois Riuieres, au deuant des Hurons, la barque alloit commencer vne nouvelle habitation en ce quartier là, le P. Dauost qui estoit descendu de Taboussac, pour l'assistance de nos François, suiuit nos Peres trois iours apres, en la compagnie de Monsieur le General, qui se vouloit trouuer à la traite avec ces peuples. Ils attendirent là quelque temps les Hurons, qui ne font point

descendus en si grand nombre cette année qu'à l'ordinaire, à raison que les Hiroquois estans aduertis que cinq cens hommes de cette nation tiroient en leur pays, pour leur faire la guerre, leur allèrent au deuant au nombre de quinze cens dit on, & ayant surpris ceux qui les vouloient surprendre: ils en ont tué environ deux cens, & pris plus d'une centaine de prisonniers, dont Louys Amantacha est du nombre: on disoit que son pere estoit mis à mort, mais le bruit est maintenant qu'il s'est sauué des mains de l'ennemy. On nous rapporte que ces Hiroquois triomphans ont renuoyé quelques Capitaines aux Hurons pour traiter de paix, retenans par deuers eux les plus apparens, apres auoir cruellement massacré les autres.

Cette perte a esté cause que les Hurons sont venus en petites troupes, au commencement ils ne sont descendus que sept Canots: Le Pere Brebœuf en ayant eu nouuelle, les aborde, & fait tout ce qu'il peut pour les engager à le receuoir, & ses compagnons, & les porter en leur pays, ils s'y accordent volontiers. Là des-

328 *Relation de la Nouvelle France*,
sus vn Capitaine Algonquain, nommé la
Perdrix, qui demeure en ville, fit vne
harangue, par laquelle il recomman-
doit qu'on n'embarquast aucun Fran-
çois: Voila les Hurons qui doiuent pas-
ser par le pays de ce Capitaine, à leur re-
tour entierement refroidis: sur ces en-
trefaites arriue Monsieur du Plessis,
tout cecy se passoit en vn lieu nommé
les trois Riuieres, trente lieues plus haut
que Kebec; comme il desiroit ardem-
ment que nos Peres penetraissent dans
ces nations, il fit assembler les Algon-
quains en Conseil, notamment ce Capi-
taine, pour luy faire rendre raison de sa
deffence; il en apporte plusieurs, on luy
satisfaiet sur le chāp, il insistoit, comme
ie le conjecture, des lettres du Pere Bre-
bœuf, sur le desordre qui arriueroit, au
cas que quelque François mourut aux
Hurons; on luy repart que les Peres n'e-
stans point en son pays, la paix entre les
Francois, & ses Compatriotes, ne seroit
point rompue, quoy qu'ils mourussent
d'vne mort naturelle ou violente. Voila
les Algonquains contents: mais les Hu-
rons commencerent à s'excuser sur leur

petit nombre, qui ne scauroit passer
 tant de François sur la petitesse de leurs
 Canots, & sur leurs maladies; en vn mot
 ils eussent bien voulu embarquer quel-
 ques François bien armez, mais non pas
 de ces longues robbes, qui ne portent
 point d'arquebuses. Monsieur du Plessis
 presse tant qu'il peut, prent nostre
 cause en main, on trouue place pour
 quelques vns; vn certain Sauvage s'a-
 dresse au Pere, & luy dit, fais moy traiter
 mon petun pour de la porcelaine, &
 mon Canot estant deschargé; ie pren-
 dray vn François, le Pere n'en auoit
 point, mais Monsieur du Plessis scachāt
 cela, & Monsieur de l'Espinay achete-
 rent ce petun; voila donc place pour six
 personnes, quand se vint à s'embar-
 quer, les Sauvages qui estoient malades
 en effect, disent qu'ils n'en scauroient
 porter que trois, deux ieunes hommes
 François, & vn Pere; les Peres promettēt
 qu'ils rameneront, ils font des presents,
 Monsieur du Plessis en fait aussi, insiste
 tant qu'il peut, ils n'en veulent point
 receuoir dauantage.

Le Pere Brebœuf a recours à Dieu,

330 *Relation de la Nouvelle France,*
voicy comme il parle en sa lettre : Iamais
ie ne veys embarquement tant balotté &
plus trauersé par les menées, comme ie
croy, de l'ennemy commun du salut des
hommes, c'est vn coup du Ciel que nous
foyons passés outre, & vn effect du pou-
voir du Glorieux saint Ioseph, auquel
Dieu m'inspira dans le desespoir de tou-
tes choses, de promettre 20. sacrifices en
son honneur; ce veu fait, le Sauvage qui
auoit embarqué Petit Pré, l'vn de nos
François, le quitta pour me prendre, veu
mesme que Monsieur du Pleffis insistoit
fort que cela se fist. Et ainsi le Pere Bre-
bœuf, le Pere Daniel, & vn ieune homme
nommé le Baron, furent acceptez de ces
Barbares qui les portent en leur pays
dans des Canots d'escorce. Restoient le
Pere Dauost, & cinq de nos François,
ne demandez pas si le Pere estoit triste:
voyant partir ses compagnons sans luy,
& sans quasi rien porter des choses neces-
saires pour leur vie, & pour leurs habits:
De verité ils ont monsté qu'ils auoient
vn grand cœur! car le desir d'entrer dans
le pays de la Croix, leur fit quitter leur
petit bagage, pour ne point charger

leurs Sauvages qui setrouuoient mal, se contentants des ornements de l'Autel, & se confiant du reste en la prouidence de nostre Seigneur, leur depart des trois Riuieres fut si precipité, qu'ils ne purent pas nous rescrire : mais estant arriuez au lōg Sault, à quelque quatre vingts lieuës de Kebec, & rencontrant des Hurons qui descendoient, ils nous enuoyèrent quelques lettres, dans l'une desquelles le Pere Brebœuf ayant raconté les difficultez de son embarquement, parle ainsi : Je prie V. R. de remercier, mais de bonne façon M. du Pleffis, auquel apres Dieu nous deuõs certes grandement en nostre embarquement : car outre les presents qu'il a fait aux Sauvages, tant publics que particuliers, & la Porcelaine qu'il a traittée, il a tenu autant de conseils que nous auons desiré, il nous a fourny de viures 'au depart, & nous a honorez de plusieurs coups de Canon; & le tout avec vn grand soing & vn tesmoignage d'une tres-particuliere affection.

Nous nous en allons à petites iournées bien sains, quand à nous, mais nos Sauvages sont tous malades, nous ramons

continuellement, & ce d'autant plus que nos gens sont malades pour Dieu & pour les âmes rachetées du sang du Fils de Dieu, que ne faut-il faire ! tous nos Sauvages s'ont très-cōtents de nous, & ne voudroient pas en avoir embarqué d'autres ; ils disent tant de bien de nous à ceux qu'ils rencontrent, qu'ils leurs persuadent de n'en embarquer point d'autres, Dieu soit beny. V. R. excuse à l'écriture & l'ordre, & le tout : nous partons si matin, gistons si tard, & ramons si continuellement, que nous n'avons quasi pas le loisir de satisfaire à nos prières ; de sorte qu'il m'a fallu acheuer la presente à la lueur du feu, ce sont les propres paroles du Pere, qui adjouste en vn autre endroit, que les peuples par où ils passent sont quasi tous malades, & meurent en grand nombre. Il y a eu quelque espee d'Epidémie cette année, qui s'est mesme communiquée aux François, mais Dieu mercy personne n'en est mort, c'estoit vne façon de rougeolle, & vne oppression d'estomach ; reuenons aux trois Riuieres.

Ceux qui attendoient quelque autre occasion pour s'embarquer, furent con-

folez par la venuë de trois Canots, dans lesquels Monsieur du Plessis fit embarquer le Pere Dauost, & deux de nos François, avec vne vigilance incomparable, comme m'escrit le Pere. A quelque temps de là vindrent encore d'autres Hurons, il plaça dans leurs Canots & hommes & bagage; en vn mot tout ce qui restoit, si bien que trois de nos Peres, & six de nos François, sont montrez aux Hurons.

Ils ont trois cents lieuës à faire dans des chemins qui font horreur à en ouyr parler les Hurons, avec lesquels ils vous cachent de deux iours en deux iours de leur farine pour manger au retour, il n'ya point d'autres hostelleries que ces cachettes, s'ils manquent à les retrouver, où si quelqu'un les desrobe, car ils sont larrons au dernier point, il se faut passer de manger, s'ils les retrouuent; ils ne font pas pour cela grande chere, le matin ils detrempent vn peu de cette farine avec de l'eau, & chacun en mange environ vne ecuellée; là dessus ils iouent de leur airon tout le iour & sur la nuit: ils mangent comme

au point du iour, c'est la vie que doiuent mener nos Peres iusques à ce qu'ils soient arriués au païs de ces barbares, où estants, ils se feront bastir vne maison d'escorce, dans laquelle ils viuront de bled & de farine d'inde, de poisson en certain temps: pour la chair, comme il ny a point de chasse où ils sont, ils n'en mangent pas six fois l'an, s'ils ne veulent manger leurs chiens, comme fait le peuple qui en nourrit, comme on fait des moutons en Frâce; leur boisson c'est de l'eau. Voila les delices du païs, pour les sains & pour les malades, le pain, le vin, les diuerſes sortes de viandes, les fruits, & mille raffraichissements qui s'ont en France, ne sont point encore entrés dans ces contrées.

La monoye dont ils acheteront leurs viures, leur bois, leur mais d'escorce, & autres necessités, sont des petits canons ou tuiaux de verre, des couteaux, des alefnes, des castelognes, des chaudières, des haches: & choses semblables, c'est l'argent qu'il faut porter avec soy: si la paix se fait entre les Hurons, & les Hiroquois, ie preuoy vne grande porte ouuerte à l'E-

uangle, nous dirons alors avec ioye
& avec tristesse *messis, quidem multa opera-*
rij vero pauci: car on vera la difette de
personnes qui entendent les langues.
I'apprend qu'en 25 ou 30 lieües de pays
qu'occupent les Hurons, d'autres en
mettent bien moins; il se trouue plus de
trente mille ames, la nation Neutre est
bien plus peuplée, les Hiroquois le sont
grandement, les Algonquains ont vn
pays de fort grande estenduë. Je ne
souhaitteroïs maintenant que cinq ou
six de nos Peres en chaqu'une de ces
nations, & cependant ie n'oseroïs les
demander quoy que pour vn qu'on de-
sire, il s'en presente dix tous prests de
mourir dans ces croix: mais i'apprend
que tout ce que nous auons en France
pour cette mission est peu: comme dont
prendrons nous les enfans, notamment
de ces nations peuplées, pour les nour-
rir & les instruire, las! faut il que les
biens de la terre, empeschent les biens
dû Ciel! que n'auons nous tant seule-
ment les mies de pain qui tombent de
la table des riches du monde, pour don-
ner à ces petits enfans! Je ne me plains

point, ie ne demande rien à qui que ce soit : mais ie ne puis tenir mes sentimens, quand ie voy que la fange (que font autres choses les biens d'icy bas) empesche que Dieu ne soit conneu & adoré de ces peuples. Et si quelqu'un trouue estrange que ie parle en cette sorte, qu'il vienne, qu'il ouure les yeux, qu'ils voyent ces peuples crier apres le pain de la parole de Dieu, & s'il n'est touché de compassion, & s'il ne crie plus haut que moy, ie me condamray à vn perpetuel silence.

Le troisieme d'Aoust Monsieur de Champlain retournant des trois Riuieres où il estoit allé apres le depart de nos Peres, nous dit qu'un truchement François pour la nation Algonquine venant d'auec les Hurons, auoit rapporté nouvelle que le Pere Brebeuf souffroit grandement, que ses Sauvages estoient malades, qu'il ramoit incessamment pour les soulager : que le Pere Daniel estoit mort de faim, où en grand danger d'en mourir, à raison que les Sauvages qui l'ont embarqué quittans le chemin ordinaire où ils auoient faict les chaches
de

de leurs viures, auoient tiré dans les bois, esperant trouuer vne certaine nation qui leur dōneroit à manger, mais n'ayant point trouué ce peuple errant qui s'estoit transporté ailleurs, on conjecture qu'ils sont tous, Sauvages & François en danger de mort; veu mesmement qu'il n'y a point de chasse en ce quartier là, & que la pluspart de ces Barbares sont malades, Dieu soit beny de tout. Ceux qui meurent allants au martyre, ne laissent pas d'estre martyrs. Quand au Pere Dauost, il se porte bien, mais les Sauvages qui le menent luy ont desrobé vne partie de son bagage; i'ay desia dit qu'estre Huron & Larron, ce n'est qu'une mesme chose; voila ce qu'a rapporté ce truchement. Les Peres nous escrirons l'an qui vient, s'il plaist à Dieu, toutes les particularitez de leur voyage, nous ne scaurions pas auoir de leurs nouuelles deuant ce temps-là: si leur petit equipage est perdu ou volé, ils sont pour beaucoup endurer en ces contrées, si esloignées de tout secours.

Le quatriéme, Monsieur du Plessis descendit des trois Riuieres comme ie

l'allay saluër, il me dit qu'il nous amenoit vn petit Sauvage orphelin, nous en faisant present, pour luy seruir de pere; si tost qu'on aura moyen de recueillir ces pauvres enfans, on en pourra auoir quelque nombre, qui seruiron par apres à la conuersion de leurs Compatriottes. Il nous dit encore qu'on travailloit fort & ferme au lieu nommé les trois Riuieres, si bien que nos François ont maintenant trois habitations sur le grand fleuve de saint Laurens, vne à Kebec fortifiée de nouueau, l'autre à quinze lieuës plus haut dans l'Isle de sainte Croix, où Monsieur de Champlain a faict bastir le fort de Richelieu. La troisiéme demeure se bastit aux trois Riuieres, quinze autres lieuës plus haut, c'est à dire à trentelieuës de Kebec. Incontinent apres le depart des vaisseaux, le Pere Iacques Buteux & moy irons là demeurer pour assister nos François, les nouvelles habitations estant ordinairement dangereuses, ie n'ay pas veu qu'il fut à propos d'y exposer le Pere Charles Lallemant, ny autres, le Pere Buteuxy vient avec moy

pour estudier à la langue.

V. R. connoistra maintenant, que la crainte qu'ont eu quelques vns que l'estrange ne vint vne autre fois rauager le pays, & empescher la conuersion de ces pauvres Barbares n'est pas bien fondée: puis que les familles s'habituent icy, puis qu'on y bastit des forts & des demeures en plusieurs endroits, & que Monseigneur le Cardinal fauorise cette entreprise honorable deuant Dieu, & deuant les hommes. Cét esprit capable d'animer quatre corps, à ce que i'apprend, void de bien loing, ie le confesse, mais i'ay quelque creance, qu'il n'attend point de nos Sauuages qui entendent la parole de Dieu, & les veritez du Ciel par son entremise, car c'est luy qui nous a honorez de ses cōmandements; nous renuoyant en ces contrées avec la bien-veillance de Messieurs les Associez: Je croy, dis-je, qu'il n'attend point de cette vigne, qu'il arrouse de ses soings les fructs quelle luy presentera en terre, & qu'il les gousterà vn iour dedans les Cieux. Pleust à Dieu qu'il veist cinq ou six cens Hurons, hommes

340 *Relation de la Nouvelle France*,
grands, forts, & bien-faits, prester l'o-
reille aux bonnes nouvelles de l'Euan-
gile qu'on leur va porter cette année:
le me figure qu'il honoreroit parfois la
nouvelle France d'un de ses regards, &
que cette veuë luy donneroit autant de
contentement, que ces grandes actions
dont il remplit l'Europe; car de procu-
rer que le sang de Iesus-Christ soit ap-
pliqué aux ames pour lesquelles il est
respandu, c'est vne gloire peu connue
des hommes, mais enuiée des grandes
intelligences du Ciel & de la terre.

Il est temps de sonner la retraite, les
vaisseaux sont prests à partir, & cepen-
dant ie n'ay pas encore releu ny inter-
ponctué cette grãde Relation, qui peut
suffir pour trois années: V. R. iugera
par la necessité que i'ay eu d'emprunter
la main d'autrui, pour luy escrire que ie
n'ay pas tout le loisir que ie pourrois de-
sirer. Je ne sçay cōme cela se fait, que les
nouvelles s'escriuent tousiours avec
empressement, aussi n'y recherche-on
pas tant de politesse que la verité & la
naïfueté, mon cœur a plus parlé que
mes leures, & n'estoit la pensée que i'ay

qu'en escriuant à vne personne, ie parle à plusieurs, il se respandroit bien davantage.

Encore ce mot, puisque V. R. nous ayme si tendrement, & que ses soins nous viennent si puissamment secourir iusques au bout du monde, dōnez nous, mon R. P. s'il vous plaist des personnes capables d'apprendre les langues, nous pensions nous y appliquer, certe année, le Pere Lallemant, le Pere Buteux & moy, cette nouuelle habitation nous separe. Qui sçait si le Pere Daniel est encore en vie? & si le Pere Dauost arriuera avec les Hurons: car ses Sauvages ayans commencé à le derobier, luy pourront bien iouer vn autre plus mauuais trait. Depuis la mort d'vn pauvre miserable François massacré aux Hurons, on a decouuert que ces Barbares auoient fait noyer le R. P. Nicolas Recolect, tenu pour vn grand homme de bien; tout cecy nous fait voir qu'il est besoing de tenir icy le plus de Peres qu'on pourra; car si par exemple le Pere Brebœuf & moy venions à mourir, tout le peu que nous sçauons de la langue Huron-

342 *Rel. de la Nouel. Fr. en l'année 1634.*
ne & Montaignaise se perdrait, & ainsi
ce seroit toujours à recommencer & à
retarder le fruit que l'on desire recueillir
de cette Mission, Dieu suscitera des
personnes qui auront compassion de
tant d'ames, secourras ceux qui les vien-
nent chercher parmy tant de dangers;
c'est en luy que nous remercions tous
V.R. de son affection si cordiale, & de
son assistance, la suppliant tres-hum-
blement de se souuenir à l'Autel & à
l'Oratoire de ses enfans, & de ses sub-
jets, notamment de celuy qui en a plus
de besoin; lequel se dira confidem-
ment ce qu'il est de tout son cœur.

Mon R. PERE.


Vostre tres-humble & tres-obeissant
seruiteur en N. S. IESVS. CHRIST.

PAUL LE IEVNE.


De la petite Maison de N.
Dame des Anges, en la
Nouvelle France, ce 7.
d'Aoust 1634.



V. R. Nous permettra, s'il luy plaist, d'implorer prieres de tous
nos Peres, & de tous nos freres de sa Prouince. Nostre
grand secours doit venir du Ciel.







Red Star

1848

1848

8712
L 11
732
(2)





